

增補文獻備考

三十五

庫	文	閣	內
无	大		漢
四	一		書
函	五		
一	一		
架	冊	三	類
		號	

內閣文庫	
番號	漢 6143
冊數	51 (36)
函號	294 19




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



增補文獻備考卷之一百七十二

弘文館纂輯 校正

交聘考

歷代朝聘

高麗太祖五年

後梁末帝龍德二年

契丹遣使來聘

遣使進寶劍于契丹

年條未攷

六年

龍德三年

遣福府卿尹質朝梁及還獻五百羅漢像

九年

後唐明宗天成年

遣張彬朝後唐

十六年

後唐長興四年

後唐遣太僕卿王瓊太府少卿楊昭業册王為特進檢

校太保使持節玄菟州都督上柱國充大義軍使高麗王始行年號

二十年後晉高祖天福二年遣使朝後晉始行後晉年號

二十二年天福四年後晉遣國子博士謝攀册王為開府儀同三司檢校太

師餘如故

二十五年天福七年契丹遣使來聘遺橐駝五十匹王以契丹嘗與渤海連

和卒背盟殄滅此甚無道不足連結為隣遂絕交聘流其使三十人于

海島繫橐駝于萬夫橋下皆餓死

惠宗元年後晉出帝開運元年遣廣評侍郎韓玄珪禮賓卿金廉朝後晉告嗣位

兼賀破契丹

二年開運二年後晉遣通事舍人郭仁遇來諭夾擊契丹

定宗元年開運三年始行後漢年號

光宗二年後周太祖廣順元年始行後周年號

四年廣順三年後周遣衛尉卿王演册王為特進檢校太保使持節立菟州

都督充大義軍使兼御史大夫高麗王

六年後周世宗顯德二年遣大相王融朝周獻方物

九年顯德五年後周遣水部員外郎韓彥卿來市銅

十年顯德六年再遣使朝後周進別序孝經等書詳見藝文考

十三年宋太祖建隆三年遣廣評侍郎李興祐副使李勵希判官李彬等朝貢

于宋翌年付制書以還曰古先哲后奄宅中區曷嘗不同文軌於萬方

覃聲教於四海顧予涼德猥被鴻名爰致賓王宜優錫命開府儀同三

司檢校太師立菟州都督充大義軍使高麗國王昭日邊鍾粹遼左推

雄習箕子之餘風撫朱蒙之舊俗而能占雲候海奉贄充庭言念傾輸
實深嘉尚是用錫之懿號酬以公田載推柔遠之恩式獎拱辰之志於
戲來朝萬里美愛戴之有孚柔撫四封庶混并之無外永保東裔聿承
天休

十四年宋乾德元年宋遣時贊册王在海遇風溺死者九十人贊獨免始行

宋年號

十六年乾德三年遣內奉令王輅朝宋獻方物帝禮接之甚厚授輅尚書左

僕射實封三百戶並賜官誥以寵異之

二十三年宋開寶五年遣內議侍郎徐熙內奉卿崔鄴廣評侍郎康禮廣評

員外郎劉隱等朝宋時不朝宋久矣熙至容儀中度帝嘉之制加王食

邑賜推誠順化守節保義功臣號授熙檢校兵部尚書鄴檢校司農卿
判官禮試少府少監錄事隱檢校尚書金部郎中並厚禮遣之

景宗二年宋太宗太平興國二年遣王子朝宋獻良馬甲兵方物

三年太平興國三年遣使朝宋貢方物兵器

四年太平興國四年宋遣閣門祇候王僎加册王爲侍中增食邑一千戶

成宗元年太平興國七年遣使告哀于宋

又遣金全朝宋貢金銀線罽錦袍褥金銀筋刀劍弓矢名馬香藥等物

正匡崔承老上言我太祖情專事大然猶數年一遣行李修聘禮而

已今非但聘使且圖貿易使价煩夥恐爲中國所賤且因往來敗船

隕命者多請自今因聘使兼行貿易其餘非時買賣一皆禁斷

二年 太平興國八年 宋遣光祿少卿李巨源將作少監孔維來册王為光祿大

夫檢校太保使持節立菟州諸軍事立菟州都督充大順軍使上柱國

高麗王食邑二千戶

五年 雍熙三年 宋出師北伐以我國與契丹接境常為所侵遣監察御史韓

國華賈詔諭之曰幽薊之地中朝土疆晉漢多虞戎醜盜據今國家照

臨所及書軌大同豈使齊民陷諸獷俗今已董諸師旅殄滅妖氛惟王

久慕華風素懷明略效忠順之節撫禮義之邦而接彼邊疆罹於蠱毒

舒泄積憤其在茲乎可申戒師徒迭相掎角協比隣國同力盪平奮其

一鼓之雄勦此垂亡之寇良時不再王其圖之應俘獲生口牛羊財物

器械并給賜本國將士用申賞勸王遷延不發兵國華諭以威德王始

許之

契丹遣使請和

八年 端拱二年 遣選部侍郎韓藺卿兵部郎中魏德柔朝貢于宋宋並授金

紫光祿大夫判官李光檢校水部員外郎先是本國遣僧如可表請大

藏經至是詔賜之並令歸國

九年 淳化元年 宋遣戶部郎中柴成務兵部員外郎趙化成加册王推誠順

化功臣食邑一千戶食實封四百餘戶如故國俗拘忌陰陽每朝廷使

至必擇月日受詔成務在館踰月乃遣書於王曰王奕葉藩輔尊獎王

室凡行大慶首被徽章今國家特馳信使以申殊寵皇朝眷遇斯亦隆

矣而乃牽於禁忌泥於卜數眩惑日者之浮說稽緩天子之命書惟典

冊之垂文非卜祝之能曉是以書稱上日不惟六甲之元辰禮載仲冬俾取一陽之嘉會粲然古訓足以明稽所宜改圖速拜君賜儻鳳綽無滯克彰拱極之誠則龍節有輝免貽辱命之責謹以誠告王其聽之王猶以雨為辭成務復遣書以責之王翌日乃拜命自是不復擇日

十年淳化二年遣韓彥恭朝貢于宋求印佛經詔賜之詳見藝文考帝以彥恭儀

容中度授金紫光祿大夫檢校兵部尚書兼御史大夫

十一年淳化三年遣翰林學士白思柔謝賜經及御製

宋遣秘書丞陳靖秘書少監劉式加冊王檢校太師食邑一千戶王留靖等七十餘日而遣還遣以襲衣金帶金銀器數百兩布三萬餘端付表謝恩

白思柔之行孔目吏張仁銓上書于宋獻便宜策思柔意其持國陰事以告仁銓懼不敢歸帝詔陳靖等領以還國仍命本國勿治其罪

遣使謝恩仍請板本九經許之詳見藝文考

陳靖之還本國遣元證衍護送至安香浦口值風損船溺所賣物詔登州給證衍文據遣還仍賜王衣段二百匹銀器二百兩羊五十口

十三年淳化五年遣侍中朴良柔為禮幣使入覲契丹徐熙曰臣與蕭遜寧

約蕩平女真收復舊地然後朝覲可通今纔收江內俟得江外修聘未晚王日久不修聘恐有後患遂遣之契丹賜女真國鴨綠江東地數百里又遣崇祿卿蕭述管御史大夫李浣報聘王復遣使進妓樂契丹却

之自是交使不絕

復遣使乞師于宋以報契丹宋以北鄙甫寧不許遂與宋絕始行契丹年號

十四年元至道元年遣使如契丹請婚又請所俘生口契丹主隆緒命贖還

之仍以東京留守蕭恒德女許嫁選童子十人遣使如契丹留習其語

十五年至道二年契丹遣翰林學士張幹忠正軍節度使蕭熟葛册王為開

府儀同三司尚書令高麗王使至西郊築壇傳册王遣使如契丹納幣

翌年成宗薨契丹盡還其幣

遣李周禎貢鷹于契丹

穆宗即位至道三年契丹遣千牛衛大將軍耶律廸烈來賀千秋節王迎命

告于梓宮前

遣使如契丹告嗣位後遂為例

三年宋真宗咸平三年王嘗遣兵校徐遠來候朝廷德音遠不至至是其臣吏

部侍郎趙之遴遣牙將朱仁紹至登州偵之州將以聞帝特召見仁紹

自陳國人思慕皇華為契丹羈制之狀帝賜王鈿函詔一道優禮遣還

五年咸平五年遣使貢本國地圖于契丹

六年咸平六年遣戶部郎中李宣朝宋謝恩且訴契丹侵伐乞王師屯境優

詔答之

顯宗即位宋大中祥符二年遣使貢龍鬚席于契丹

元年大中祥符三年契丹遣使來問前王之故又連遣使來告親征王連遣使

請和好契丹主不許並拘之前後被拘者陳廸尹餘金延保王佐暹白

日昇李禮均王同穎金德華金佑徵金得宏等凡十餘人

二年 大中祥符四年 遣使如契丹謝班師 是後使价不絕

三年 大中祥符五年 契丹勅王入朝遣刑部侍郎田拱之修聘且告王病不能

朝契丹主怒詔取興化等六城

五年 大中祥符七年 時久與宋絕至是遣內史舍人尹徵古入朝獻金線織成

龍鳳鞍幪繡龍鳳鞍幪各二幅良馬二十二匹仍請歸附如故帝賜詔

書七通并衣帶銀綵鞍馬

六年 大中祥符八年 遣民部侍郎郭元如宋獻方物仍告契丹連年來侵借以

聖威預垂救急之恩帝以契丹既受盟難於答辭學士錢惟演草詔略

曰念鄉本道固深軫於懷恩睽彼封隣亦久從於盟好所期輯穆用泰

黎蒸帝覽之喜曰雖契丹見之無妨密使館伴張師德諭元曰今陛下

一統寰海猶且養卒習戰以備北方况貴國與之連境結好息民是遠

圖也元辭貌恭恪每受宴賜必自製謝表粗有文采朝廷待之亦厚及

明年辭還賜詔書七函襲衣金帶器幣鞍馬及經史日曆聖惠方等書

詳見藝文考 元又請錄國朝登科記及所賜御詩以歸從之

七年 大中祥符九年 契丹使至鴨綠江不納復行宋年號

宋詔登州置館於海次以待高麗使者

九年 宋天禧二年 遣使契丹請和不許

十年 天禧三年 遣禮賓卿崔元信李守和如宋賀正遭風覆舟漂失貢物登

州奏其狀遣內臣慰撫使入見貢罽錦衣褥烏漆甲金筋長刀七首罽

錦鞍馬紵布藥物又進中布二千疋求佛經詔賜經却布以其覆溺匱
乏別賜衣服二人還以奉使汗辱並流之

十一年天禧四年時契丹使耶律行平只刺里等被拘凡六年朝廷恐邊患

不息并歸之仍遣使稱藩納貢契丹亦遣使報聘是後使价不絕

十三年宋乾興元年契丹遣使册王為開府儀同三司守尚書令上柱國高

麗國王食邑一萬戶食實封一千戶賜車服儀物時朝廷於契丹四季

各有問候使正朝及其主太后生辰皆有賀使至是契丹主命一年再

聘諸問賀之禮皆於聘使兼行

復行契丹年號

十四年宋仁宗天聖元年契丹遣使來册太子為輔國大將軍檢校太師守太

保兼侍中高麗公

契丹又遣使來賀生辰自是歲以為常

十七年天聖四年契丹遣使請假道如東北女真不許

二十一年天聖八年遣使契丹賀平東京

遣民部侍郎元穎等二百九十三人奉表朝宋貢金器銀厨刀劍鞍馬

香油人蔘細布銅器琉璃黃青鼠皮明年歸賜物遣使護送登州其後絕不通中

國者四

德宗即位天聖九年契丹主隆緒殂工部郎中南承顏來告哀宣詔於顯宗

返魂堂

遣尚書左丞柳喬如契丹會葬給事中金行恭賀即位

王可道請因契丹主殂內叛可與之絕及金行恭廻又不從所奏

前年賀使

行兼請毀鴨綠城橋歸我被留行人

遂停賀正使仍用聖宗太平年號

元年

宋明道元年

契丹歸所留行人不納決議絕契丹故也時李禮均等八

人被拘二十餘年王憐之賜其妻子米穀

靖宗二年

宋景祐三年

遣尙書右丞金元冲入貢于宋至甕津船敗而還

四年

宋寶元元年

契丹遣馬保業報聘

自是聘問復如故

復行契丹年號

五年

寶元二年

遣殿中監李成功如契丹獻方物戶部郎中庾先謝安撫仍

請罷鴨綠江加築城堡契丹主以事在先朝不許

六年

宋康定元年

契丹橫宣使秦州防禦使蘇世長等來

橫宣使卽年例常使之外別遣之名

也

文宗九年

宋至化二年

契丹主宗眞殂鴻臚少卿張嗣復來告哀王聞使過

江減常膳輟音樂禁屠宰斷弋獵及使至京王服襴素出昌德門外迎

詔舉哀行服輟朝市三日遣知中樞院事崔惟善工部郎中李得路等

如契丹吊喪會葬

回謝使崔宗弼還自契丹啓曰臣如契丹禮部書帝名宗眞汝名犯

宗字宜改之臣於表狀改稱崔弼門下省奏宗弼宜答以我國不知

誤犯表章何可輕改彼若強之但減點劃庶合於禮擅改辱命請科

罪不從

十二年

宋嘉祐三年

契丹遣使告太皇太后哀王以立冠素服迎之

王欲於耽羅及靈巖伐材造船將通於宋內史門下省言國家結好

北朝近無讐怨民樂其生若泄此事必生釁隙如非永絕契丹不宜通使宋朝乃止

十七年

嘉祐八年

契丹遣使送大藏經王郊迎

互見藝文考

十九年

宋英宗治平二年

契丹遣使加册王功臣號太子兼侍中賜九旒冠九

章服玉圭玉册象輅等物王及太子受册于南郊遣使謝之

二十年

治平三年

遣使如遼賀改國號

契丹改國號遼

二十二年

宋神宗熙寧元年

宋明州教鍊使顧允恭牒報帝遣使通信之意王

曰敢期大朝降使外域寡人一喜一驚凡百執事各揚爾職館待之事罔有闕遺謹勤著能者當行超擢怠劣有過者別論貶黜

二十四年

熙寧三年

禮賓省移牒福建轉運使羅拯云本朝商人黃真洪萬

來稱運使奉密旨令招接通好當國僻居暘谷邈戀天朝頃從祖禰以來素願梯航相繼蕞爾平壤邇大遼附之則為睦隣疎之則為勁敵慮邊騷之不息蓄陸襲以靡遑久因羈縻難圖携貳故違述職致有積年累卜雲祥雖美聖辰於中國空知日遠如迷舊路於長安運屬垂鴻禮稽展慶大朝化覃無外度豁包荒山不謝乎織埃海不辭乎支派謹當遵尋通道遄赴藁街但茲千里之傳聞恐非重霄之紆眷今以公狀附真萬西還俟得報音即備禮朝貢拯以聞議者謂可結之以謀契丹帝許之

二十五年 熙寧四年 遣民官侍郎金梯等百十人奉表朝宋禮物御衣便服金帶金合勒帛金盤盞金注子金鋤鑼弓箭銀裝長刀細馬金鞍香油

二十缸松子二千二百斤人蔘一千斤生中布二千匹生平布二千匹
華鮮之物不可勝記如宋由登州入貢帝賜勅書五道褒獎之贈與甚
厚明年六月還帝以本國尚文每賜書詔必選詞臣著撰而擇其善者
所遣使者書狀官召赴中書試以文乃遣之

二十六年 熙寧五年 遼遣使來聘 是後三年一次修聘其餘別遣賀節等使不在此限

二十七年 熙寧六年 先是表請求醫于宋宋遣醫官王愉徐先等來王遣太

僕卿金良鑑中書舍人盧朝奉表謝恩舊例麗使往返皆自登州至是
以欲遠契丹乞改道由明州從之以供頓擾民詔立式頒下費悉官給
又恐規利者私與交關令所在禁止

三十年 熙寧九年 遼太后殂遣使告哀王素服率百官迎詔舉哀遣使奔慰

會葬 日本車...

遣工部侍郎崔思諒入宋謝恩獻方物宋以本國為禮樂文物之待
之浸厚題使臣下馬所曰小中華之館所至太守郊迎其餞亦如之

三十三年 宋元豐元年 宋有伐遼之意欲結恩信於東方選侍從文士諫議

大夫安燾起居舍人陳睦賈詔來造兩艦於明州一日凌虛安濟次日
靈飛順濟皆名為神舟自定海絕洋而東朝廷遣工部尚書文晁戶部
侍郎崔思訓通于安興亭使到禮成江遣兵部尚書為延伴至西郊亭

遣刑部尚書金悌為延伴入順天館 宋史云順天館言 遣戶部尚書金

良鑑為館伴命太子導宋使入慶會殿詔書獎諭特厚賜王衣帶綵段
樂器等物甚多時自呂端往來之後久不見中華使命及燾等之來衆



皆想望風彩將還例贈衣帶鞍馬外所贈金銀寶貨米穀無數舟不勝

載請以所得物件買銀且日減供億之饌折價買銀國人唾鄙自是兩國使价

連續往來 三十二年元豐 先是安燾等之歸王以風痺表請醫藥至是帝遣翰林

醫官邢慥等來看病兼賜名品藥物數百種及法酒

三十四年元豐 遣尚書柳洪侍郎朴寅亮奉表謝到洋遭風幾覆舟方

物失亡殆半帝慰諭遣還錫賚甚多勅王勿問又遣醫官馬安世來時

有金觀者從寅亮入宋宋人見寅亮及觀所著尺牘表狀題詠稱歎至

刊二人詩文號小華集人宋國恩德文詩宋以本國為樂文詩之詩

會洪獻日本車一乘云諸侯不貢車服誠知非禮本國所以進者欲中

朝見日本工拙耳其知禮如此洪武人以一言取重於中國可見辭

命之為重云○前此貢物至輒下有司估直價以萬緡至是命勿復

估以萬緡定數

寅亮撰表用事精切請復還疆界表云歸汝陽之故田撫存編邑

回長沙之拙袖抃舞昌辰又遇颶風漂至通州謝太守啓曰望斗

極而乘槎初離下國指桃源而迷路誤到仙鄉等句膾炙人口

李暉光曰前朝朴寅亮與金觀宋神宗時使宋所著表狀題詠華

李之人稱之至刊二人詩文號小華集云其見重如此至于皇朝赴京

使臣門禁甚密不得與中國文人相接雖有如寅亮之才無以自

見矣說郭曰知明州張中坐私與麗人朴寅亮倡和詩廢錮終身

云是知禁制之嚴自宋如此奉使者亦宜慎之

三十七年

元豐六年

王薨宋遣楊景略王舜封祭奠錢勰宋球吊慰景略辟

李之儀書狀帝以之儀文稱不著宜得問學博洽器宇整秀者召赴中書試以文乃遣又以遠服不責其備諭使者以相見之所殿名鴟吻皆聽勿避

祭奠使聚僧徒設道場於二王魂堂三晝夜祭之宋使既行吊祭王

再設宴以待之及歸又設餞宴群臣無敢言其非

遣使如遼告哀

同年順宗薨又遣侍御史李資仁告哀于遼遼主不許入京館詰問二君連逝之故資仁曰國王夙有疾加以哀毀遂至大漸實無他故願留

臣等遣使究問若誣罔當服重罪言甚切直遼主引見慰諭而遣之

宣宗元年

元豐八年

遼遣使吊祭兩王

二年

宋哲宗即位初

宋神宗崩哲宗即位遣戶部尚書金上琦行吊慰工部尚

書林概賀登極請市書惟賜文苑英華一書

詳見藝文考

以名馬錦綺金帛

報禮

五年

宋元祐三年

遼免本國歲貢

六年

元祐四年

麗使不至于宋者累年至是遣王子義天使僧壽介至杭州

祭亡僧言國母使持二金塔為兩宮壽知杭州蘇軾奏却之

宋復通使賜銀器五千兩

遼遣利州觀察使張思說來賀生辰王以生日宴遼使作賀聖朝詞以

娛之其詞曰露冷風高秋夜清月華明披香殿裡欲三更沸歌聲擾擾人生都似幻莫貪榮好將美醪滿金觥暢歡情

七年元祐五年遣戶部尚書李資義禮部侍郎魏繼廷入宋謝恩帝命館伴

書本國書目錄以授之使寫進一百二十三種詳見藝文考

九年元祐七年遼使王鼎來賀生辰時太后喪纔四日矣朝廷議所以待之

者有司奏天子諸侯三年之喪既葬釋服不與士大夫同禮今賀使已至宜以日易月二十七日釋服迎命從之

遣使如宋表奏誤書遼大安年號宋朝却其表不受尚書右僕射李子威以監校封進表奏坐罷

遣黃宗懿獻黃帝鍼經請市書甚衆禮部尚書蘇軾言高麗入貢無絲

髮利而有五害今請諸書與收買金箔皆宜勿許詔只許金箔然卒市

冊府元龜以歸互見藝文考

獻宗即位宋紹聖元年遼遣使吊祭且起復冊王爲驃騎大將軍檢校太尉

兼中書令上柱國高麗王食邑七千戶食實封七百戶

元年紹聖二年始行遼年號

肅宗即位遣左司郎中尹瓘等奉前王表陳其病不視政傳位新王之意兼上新王受命攝位表遼主許之

二年紹聖三年尹瓘之回遼主雖命攝政久不行冊命至是始遣使賜玉冊

圭印冠冕車服鞍馬匹段等物冊王受冊于南郊遼遣使赦

三年紹聖四年遣尹瓘等告嗣位于宋

五年

宋元符二年

先是遼使王萼見興王寺小鍾歎美曰我朝所未有也王子釋煦請獻皇帝萼許之煦請鑄金鍾二箇至是屬使臣李載獻于遼遼主洪基以載奉使妄有求索加峻刑却其鍾

六年

元符三年

宋明州牒報哲宗崩徽宗立遣尙書任懿等入吊又遣王嘏吳延寵等賀登極時奉使者多貪冒懿獨廉謹宋人稱之嘏等還帝賜太平御覽神醫普救方

詳見藝文考

館伴謝文瓘謂副使吳延寵曰聞國王

好文近來海東文物大興所上表章甚佳朝廷頗美之王喜得二書出宣政殿受之使副下並加爵賞

遼主洪基殂遣使告哀王遣使吊慰

八年

宋徽宗崇寧元年

宋遣國信使戶部侍郎劉遠給事中吳拭來賜王衣帶

匹段金玉器弓矢鞍馬等物并遣醫官牟介呂昞陳爾猷范之才等四

人從王表請也使還附表以謝兼告王改名

避遼道宗嫌名故也

九年

崇寧二年

遣樞密院使崔弘嗣秘書監鄭文入宋謝恩宋人觀者稱其儀度中規帝加賜金幣口宣云顧惟樞近之臣宜有褒嘉之寵館伴曰此語如待朝廷近臣可見皇帝寵使臣也文受賜分與從人餘買書以歸宋人多之

十年

崇寧三年

王薨遣中書舍人金緣如遼告哀緣至遼賜宴將奏樂緣曰臣來時本國君臣皆服衰絰今至上國獲蒙賜宴雖感恩榮然臣子之情不忍聞樂遼主義而許之朝見時又乞除吉服舞蹈學士孟初謂緣曰殿庭服色宜從吉但除舞蹈可也

睿宗元年崇寧五年遼遣使來吊時遼國遣使有吊慰有起復有賀生辰有橫宣使命之頻繁恩禮之稠疊世世漸加矣

三年宋大觀二年遣使告女真捷于宋

四年大觀三年遣使如遼告築九城

遣使如遼告還九城

五年大觀四年宋遣兵部尚書王襄中書舍人張邦昌賈詔來賜王衣帶段匹金玉器弓箭鞍馬襄等曰皇帝明見萬里間已受北朝册命南北兩

朝通好百年義同兄弟故不復册王但令賜詔已去權字即是寵王以真之禮且此詔皇帝御筆親製北朝必無如此禮數王迎詔甚恭宴宋使于會慶殿及使還王附表謝之

六年宋政和元年遣樞密副使金緣少府監林有文如宋直翰院金富轍以

書狀至京上表乞赴辟雍觀講帝以其文詞兼麗優詔許之時帝待之甚厚宴器皆用白玉緣觀其華侈知時事之將變翌年緣還至慶源郡

今仁川聞父喪以使事付其价不復命時人譏其失禮

金富轍嘗朝宋帝愛其才以禮待之侍宴方醉帝以六韻長句示之促令和進富轍不構思援筆和進其末句云無路少酬天地德惟將醉筆謝生成覽而嘉歎

八年政和三年遣使如遼謝起復初事遼賀正賀節吊慰之外有四季問候

使後來定三年一聘之規而賀吊慰禮猶前又有謝恩謝橫宣等使遣禮部尚書洪灌如遼謝吊祭

文公元嘗使遼私贈儻者以白銅螺鈿器書畫屏扇奇玩自是遼人援例徵索無厭遂為鉅弊

十年

政和五年

遣吏部尚書王字之戶部侍郎文公美朝宋謝賜樂仍遣進

士金端甄惟底趙奭康就正權適等五人赴太學表曰弊邑夙慕華風在開寶之時神宗之世每馳使价參遣生徒俾以觀周厥後中廢士無定論學有多歧况法度憲章之際聲名文物之儀或歷代之遺經諸家之異說苟非質疑於有識豈能成法於將來

遼再遣使請援來督發兵廷議不一久不決遼使不成禮而去

十一年

政和六年

王字之還詔賜大晟樂

詳見樂考

又以金函盛佛牙頭骨以賜

遣知樞密李資諒朝宋謝賜大晟樂資諒至汴京帝御睿謨殿盡召一

行賜宴仍製詩示之命和進資諒賡韻曰鹿鳴嘉會宴賢良仙樂洋洋

出洞房天上賜花頭上艷盤中宣橘袖中香黃河再報千年瑞綠醕輕

浮萬壽觴今日陪臣叅盛際願歌天保永無忘帝見詩大加稱賞明日

流傳諸舖店至書之為簇掛諸壁上云

資諒還帝密諭曰聞汝國與女真接壤後歲來朝宜招數人與偕對

曰女真人面獸心夷獠中最為貪醜不可通上國宋倖臣曰女真珍

奇雜出高麗交通貿易資諒恐分利欲沮中國通信今不必借高麗

可遣一介招致後果交通竟致靖康之禍

文獻通考曰政和中升高麗使為國信使禮在夏國上與遼人皆隸

樞密院又改引伴押伴官為接伴送伴賜以大晟燕樂籩豆簠簋罇

疊等器至宴使者於睿謨殿中

金富軾嘗朝宋帝賜秋成欣樂圖富軾上表謝之

十二年

政和七年

金遣阿只等來寄書于我曰兄大女真金國皇帝致書于

弟高麗國王仍請和親大臣極言不可至有欲斬其使者中丞金富轍

上疏極諫以為非計請權以濟道無致後悔宰樞無不笑排遂不答和

使

十三年

宋重和元年

先是王太子從明州乞借大方脉瘡腫科等醫于宋帝

令閣門祇候曹誼押送醫官楊宗立等翌年誼還附表以謝

遣鄭克永等謝賜權適等制科御筆詔書

十四年

宋宣和元年

金遣使致書有詔諭高麗王等語兼賜馬匹

遣中書主事曹舜舉報聘于金國有况彼發源於吾土之語金主以不

遜不受

遼遣使來聘時道路久阻至是遼使來傳詔並賜衣着復遣使諭以同

仇大順之意

十五年

宣和二年

宋遣承信郎許立校尉林大容等來聘及還王欲許階上

參見起居注韓冲等曰今詔使本商人嘗到我國與市井販賣而又秩

卑傳詔日拜階上已是過謙今宜拜階下王從之

朱子語類曰方徽宗通好女真高麗有所聞欲納忠不可得遂托疾

遣使求醫於本朝願得供奉庭上所親信者遂擇二國醫以往至則

館御供帳甚厚但經月無引見之意二醫恠之私自請於館伴一日

得旨入見引至內庭盡屏左右諭二醫曰寡人非病也願有誠款願效於上國欲得附卿奏知幸密以聞女真人面獸心貪婪如豺狼安可與之共事今不早圖後悔無及二醫歸俱奏本末徽宗聞之滋不樂且懼其語泄丞相章蔡輩乃爲食於家召二醫食之食畢斃

仁宗元年宣和五年宋遣給事中路允迪中書舍人傅墨卿等御製祭文及詔書來行奠慰允迪等盛言大朝恩禮殊異因曰貴國曾受北朝册命今遼運已訖宜請命於朝廷王答曰弊邦祖宗以來樂慕華風先考以禮事大以忠述職雖在海外心係王室天子灼見屢加恩寵小子何足以當之至於册命天子所以褒賞之大典也今憂制未終而遽求大典於義未安惟附表謝恩而已

二年宣和六年金遣高隨等來聘到境上以接待之禮不遜不敢進金主晟曰高麗世臣於遼當以事遼之禮事我而我國有新喪遼主未獲勿遽強之召隨等還

三年宣和七年遣使如金以國書非表又不稱臣不納

四年宋欽宗靖康元年時金國日強會百官議事金可否皆言不可獨李資謙拓俊京力請遣使乃遣鄭應文李侯上表稱臣金主晟回詔褒獎之

時宋徽宗禪位欽宗立遣閣門祇候侯章歸中孚等詔諭新承內禪金兵侵逼之故且曰糾逃王慝以報中國之恩大忠也討誅淫暴伸威沙漠之外大義也覆其巢穴報驟驕不臣之虜大威也侯章在館又致書申勉王復書謝以不敢之意亦以此意表奏其答章書曰本國自祖先

增補文獻備考 卷一百一十一
承事上朝恭順之誠未嘗敢怠神宗皇帝降使修聘恩禮尤厚道君太
上皇帝待遇加等實百生難報之恩今者伏承宣詔以金人不道將起
兵問罪令小國相爲表裡奉讀流涕惟金人之始也固嘗臣屬於我國
而常以寇掠爲事我固以邊鄙甫寧不欲生事要在羈縻而已昨者被
掠人自金來言金人陷沒契丹遂犯上朝因其請和而許之以中國之
大而如此况小國孤立其將安恃乎載念本國天灾流行府庫焚蕩以
殘敝之兵當新勝之虜恐非勉強所及也但冀訓礪師徒修整器械待
王師壓彼境敢不盡力
遣樞密副使金富軾等朝宋賀登極至明州時金兵入汴道梗不得通
明年乃還

文獻通考曰欽宗立賀使至明州御史胡舜陟言高麗靡敝國家五
十年政和以來人使歲至淮浙之間苦之彼昔臣事契丹今必事金
國安知其不窺我虛實以報宜使勿來乃詔留館明州而納其贄幣
明年始歸國自王徽以降雖通使於我然受契丹封册奉其正朔上
朝廷及他文書盖有稱甲子者歲貢契丹至於六而誅求不已常云
高麗乃我奴耳南朝何以厚待之遼使至其國尤倨暴館伴及公卿
少失意輒行捽箠聞我使至必假他事來覘分取賜物嘗詰其西向
修貢事高麗表謝曰中國三甲子方得一朝大邦一周天每修六貢
契丹主意解

金遣同簽書樞密事高伯淑等爲宣諭使金主勅其使臣曰高麗凡遣

使往來當盡循遼舊仍取邊地被掠人口及保州地賜之

詳見兵考

王回表

謝之凡金使迎餞等禮一依事遼舊例

遣衛尉卿金子鏐如金謝宣諭子鏐從者與金人鬪傷金人誚讓及還諫官論奏辱命免官

五年

靖康二年

金遣使來賀生辰

自是歲以為常

先是金兵入汴邊報妄傳金兵已敗北宋師乘勝深入鄭知常金安等奏時不可失請亟出兵應接宋師以成大功王時在西京遣人致問金仁存對曰傳聞之事恒多失實不宜聽浮言遽興師旅以怒強敵及金富軾等還果知其妄至是金師陷汴京遣宣慶使耶律居瑾張淮等詔諭以趙主并燕越鄆王以下宗族四百七十餘人差押解送赴闕等事

使還附表以謝

遣使如金謝賀生辰及賀正也

歲以為常

文獻通考曰高宗建炎元年即位遣廸功郎胡彝假宗正少卿以為

高麗國信使朝廷蓋憂其與金人通也金人亦以王樞持冊使高麗

憂其為我用故也

六年

宋高宗建炎二年

宋遣綱首蔡世章來頌高宗即位詔宋高宗即位聞金

人遷二帝於五國城與本國相近欲自本國取路通問遣刑部尚書楊

應誠

宋史作楊應忱

為國信使航海而來宣詔於王諭以帝意應誠等至館移

書請假道迎二帝甚懇且曰若貴國或慮因此生事於金人應誠等只

是持國書禮幣前去請和即非爭鬪貴國但津發使人一行至界上先

增補文獻備考 卷一百七十一
報知金人以聽其可否則無由生事然則不虧二百年忠順之義亦以
報列聖眷遇之恩王以書答曰伏聞二帝遠征舉國憂憤雖不能應時
奔問官守而臣子之心豈遑寧處皇帝初登寶位首遣侍臣欲令小國
津發前去迎請二帝使副繼以公牒懇意備至敢不拜命然女真之始
嘗臣屬我國隨我使入貢近者陷沒大遼侵犯上國自此兵威益大抑
令小國稱臣小國不得已而從之彼嘗疾我樂率上國近欲侵陵如聞
使節假途入境必猜疑生事非特如此必以報聘爲名假途入朝則我
將何辭以拒苟知海道之便則小國之保全難矣淮浙緣海得不慮其
窺覷耶應誠又往復不已又答書曰上朝先是令小國往諭女真來朝
小國竊慮女真不可使窺中國富盛不敢奉詔朝廷不以爲然遂多方

招諭厚賜金帛彼既知中國虛實窺心一動長驅深入騷擾京師小國
與金國疆場相接熟知情僞今使節由此而往則彼必由此復禮又况
其國東濱大海尤善於水戰彼托以復禮審知淮浙形勢萬一具戰艦
浮海而下襲其不意則竊恐北苦陸戰南苦水戰首尾受敵爲患必鉅
事至於此雖悔可追小國所以不獲奉詔者天地洞鑑不敢飾辭王且
以此意附表欲令應誠轉奏應誠等怒不受附表及禮幣而去

文獻通考曰建炎三年詔舉能使絕域者浙東副總管楊應忱自言
高麗女真路甚徑請身使三韓結鷄林以達燕雲假刑部尙書往使
浙東帥臣翟汝文奏曰若高麗辭以大國假途以至燕雲而金人或
請問津以窺吳越將何辭以對必致辱命取笑遠夷請毋遣不從至

增補文獻備考 卷一百一十一
高麗諭旨國王楷曰大國自有山東路何不由登州往應忱曰不如
貴國最徑第煩國王傳達金國爾三節人皆二十八騎皆自齎糧楷
有難色命其臣傅佺至館言金人見造舟將往二浙若引使者至其
國異時欲假途至浙何以答之應忱曰女真不能水戰佺曰彼嘗於
海道往來况女真舊臣本國近乃欲令本國臣事之可見強弱居數
十日復令其臣崔弘宰等就館議執前說不變館伴使文公仁亦曰
往年公仁入貢上國嘗奏上皇金人人面獸心不可相親今十二年
矣應忱留高麗六十四日終不奉詔不得已受其拜表而回至闕具
言其狀上怒楷負國恩尙書朱勝非曰彼與金爲隣與中國隔海遠
近利害甚明此乃曩時待之太厚今安能責報右僕射黃潛善曰若

以巨艦載精兵數萬徑造其國彼寧無懼乎勝非曰越海征代燕山
之事可鑑上怒始霽時開封尹宗澤亦請遣使通高麗令出兵攻賊
應忱之回九月癸未發王朝戊子至明州昌國縣僅六日耳

馬氏端臨論曰高麗之事中國蓋慕華風而利歲賜耳中國之招
徠高麗蓋欲柔遠人以飾太平耳國運中否強胡來侵則蕞爾島
夷昔日臣遼以自存金之強暴既滅遼而有之且荐食中華傾覆
中京謂高麗能禦之耶然則楊應忱之行亦無謂耳欲倚以求成
也則彼豈能主宋人弭兵之盟欲倚以救雖也則彼豈能效秦人
無衣之賦乎且當時所遣卑辭祈請之使如傅雱王倫之徒未嘗
不得以自達於金也然我使之往也如石沈海彼兵之來也如火

燎原卒不得其要領又何順涉鯨波而踐異境假途於三韓以求
達耶若高麗奉命導應忱以往而金人有假途於虞之謀則揚帆
直指吳會而更無顧忌矣然則翟汝文所料王楷所以答使者之
語皆忠言至謀未可訾也朱丞相之言得之矣然政和之求醫而
獻忠謀建炎之肅使而不奉詔則麗人固已能報恩而未嘗負恩
也至於黃潛善之妄言謬計尤爲可笑所謂精甲數萬豈可襲高
麗於海外胡爲異時不能以此抗金人於維揚耶

遣禮部侍郎尹彥頤等上表具陳事勢不敢從命其表曰竊念本國地
分東鄙不能奔問官守以伸臣子之誠又未能首倡義兵以徇國家之
難今伏遇皇帝陛下起從元帥之府先襲先王之基臣屬室家板蕩之

餘當軍國擾攘之際雖命出重嚴乃事難遵稟蓋彼金國接我鴨濱既
乘猾夏之威又有害隣之意常令密謀以待釁端如聞仗節之假途則
必應時而生事或揚兵可畏而責禮或復禮爲名而請行在此路衝將
何辭拒彼衆我寡既難可以與爭唇亡齒寒又焉知其非禍豈獨今日
之扼腕必有他時之噬臍職此多艱理非自慢伏望皇帝陛下念臣內
懷嚮慕閔臣外迫侵凌山藪示藏雷霆収怒小國有保全之幸上朝無
藩屏之危率諸侯而尊周王非敢期齊晉之故事任厥土而作禹貢願
不失青徐之舊儀丹慊不誣皇天是證金富儀之辭也辭理明懇宋禮
待遣還因詔曰顧孝友之思雖欲伸於已志然幾微之際亦當盡於人

情

遣吏部尙書崔濡如金謝宣慶並進方物員外郎俞元胥賀生辰通事

金澤賀正

自是貢
獻不絕

金遣錦州管內觀察使司古德等詔諭降封趙佶昏德公趙桓重昏侯仍賜衣帶段匹銀器司古德等書上語錄云聖上以保州之地特行割賜而貴國尙未進納誓表逃移戶口亦皆稱物故近代夏國與舊遼洎朝廷立誓書及表皆有若渝斯盟社稷傾危而子孫不紹神明殛之無克祚國之語今貴國若納誓表朝廷亦當回賜誓詔以爲長遠之計王答書申辨兼附表以謝

七年

建炎三年

金既許保州之請督進誓表至是令金富轍撰表遣盧令琚

洪若伊等如金上表曰竊以周官之司盟掌盟約之法盟邦國之不協

與萬民之犯命而詛其不信而已至於衰季春秋列國交相猜疑不能必於誠信而惟盟誓之爲信故詩人譏其屢盟夫子與其胥命伏惟陛下略諸細故待以殊禮錫以邊鄙之地輸以貢輸之式謹當誓以君臣之義苟或渝變神其殛之

金史曰金國信使韓昉來督誓表高麗徵國中讀書知古今者商確辭旨凡涉旬乃始置對謂昉曰小國事遼宋二百年無誓表未嘗失藩臣禮今事上國當與事遼宋同而累盟長亂聖人所不與必不敢用誓表昉曰貴國必欲用古禮舜五載一巡狩群后四朝周六年五服一朝又六年王乃時巡諸侯各朝于方岳今天子方事西狩則貴國當從朝會矣高麗無以對乃進誓表如約

八年建炎四年帝謂輔臣曰聞上皇遣內臣及宮女各二人隨高麗貢使來

朕聞之悲喜交集呂頤浩曰此必金人之意也不然高麗亦不敢安知

非窺我虛實以報乎帝於是使汪藻撰詔遣進武校尉王政忠諭止信

使其略曰王緬修基圖夙同文軌乃附乘槎之信嗣修貢篚之恭惟忠

順之無他質鬼神而靡愧屬關聽聞良用歎嘉言念晚年實為多故舉

中原之生聚遭強敵之震驚既涉壤以深深猶稱兵而未已茲移仗衛

暫駐江湖如行使之果來恐有司之不戒俟休邊境當問聘期壞晉館

以納車庶無後悔閉漢關而謝質非用前規想彼素懷知吾誠意

金遣使來聘金人自歸保州責還投入人口累歲不已曰新舊戶口其

數不少無因俱為物故至如身沒須有遺骸或其子孫婆婦疾速刷聞

至是遣左史郎中金端請寢其事是後更不責還

九年宋紹興元年先是金主領兵三萬到東京朝廷莫測其意遣閣門祇候

庾績名為持禮使如東京密探動靜不達而還冬復遣之

時以武人崔逢深為書狀官諫官等奏曰武舉人書狀非其任恐生

事不允

宋史曰紹興元年高麗將入貢禮部侍郎柳約言四明殘破之餘荒

蕪單弱恐起戎心宜屯重兵以俟其至詔柳約奉使高麗不果行

十年紹興二年遣使朝宋去年宋都綱卓榮來言宋已平兩浙皇帝駐蹕越

州王以榮所奏狀示宰輔曰前者侯章歸中孚來請援不能從楊應誠

欲假途入貢又不從祖宗以來蒙恩至厚而再不從命如信義何於是

崔弘宰等請遣使使宋遣禮部員外郎崔惟清閤門祗候沈起等奏表入朝曰屬兩朝之遠征既不能奔問官守及大人之繼照又不得稱慶闕庭上尊周室愧莫追晉伯之前功內屬漢庭冀不失朝廷之舊事仍貢金百兩銀千兩綾羅百匹人參五百斤惟清所獻亦三之一帝御後殿引見賜惟清起金帶二答以溫詔遣還曰朕省方南國通道東藩載嘉享上之恭重有觀光之請歸視事於宰旅將效勤誠會諸侯於塗山更慚睿德又曰顧秋塞馬肥或戒嚴之未暇而春潮舟穩庶利涉而無虞

宋史曰紹興二年冬宋聞高麗遣知樞密院事洪彝叙等六十五人來貢議以臨安府學館其使言者謂雖在兵間不可無學恐爲所窺

詔以洪惠寺爲同文館以待之既而卒不至以入洋風敗舟爲辭議者謂設詐以侮我也

十一年紹興三年遣韓惟忠李之氏如宋謝恩至洪州海上遇風舟幾覆不達而還

十三年紹興五年金主晟殂右散騎常侍王政來告哀遣少卿金端侍御史李時敏等如金吊祭

宋聞我西京亂遣迪功卽吳敦禮諭以欲發十萬兵相助王以賊魁已殲餘黨破在朝夕海洋萬里天兵東下恐非便宜附表辭謝仍遣使入謝

十四年紹興六年宋遣商客傳言西夏遣使欲與本國共圖金云遣金稚圭

劉待舉等如宋明州陳告不敢圖金生事之意夏使亦不果來
金遣使來告太后喪遣殿中監尹彥植左司諫崔允儀等吊祭

文獻通考曰是歲朝廷懼其與金人為間詔賜銀帛遣之自是不至
者二十餘年

十九年紹興十一年金遣使告受尊號改元遣使賀之金以農時不納至秋
再遣之

二十年紹興十二年金遣使册王為開府儀同三司上柱國高麗王仍賜冠
冕章服珪印象輅等物故事受册於南郊至是因金使指揮始於王宮
頒詔

王禮接北使甚恭詞臣應製或指北朝為胡狄則瞿然曰安有身事

大國而慢稱如是

毅宗二年紹興八年遣殿中侍御史李公升等如金謝恩舊例使金者例

受管下軍銀人一斤公升不取一錢世服其清

四年紹興十年遣朴純冲如金道聞完顏亮弑其主亶而自立不至而復

遣使如金謝宣諭又遣知樞密使文公裕賀即位

五年紹興十一年金遣使以名諱來告

八年紹興十四年金遣使來聘賜羊一千頭自此逐年吉凶往來使
价之外例三年一大聘

十六年紹興十二年宋明州移牒告獲金主亮

金遣使來告即位遣使進賀

本國與宋海路相通宋商往來皆有都綱管領其事至是都綱徐德榮

來獻孔雀及珍玩又以宋帝密旨獻金銀合一副盛以沈香至是遣內侍崇班趙冬曦如宋獻鍮銅器以報之

宋史云紹興三十二年高麗綱道徐德榮詣明州言本國欲遣賀使守臣韓仲通以聞殿中侍御史吳芾奏曰高麗金人接壤昔金稚主之來朝廷懼其爲間亟遣還今兩國交兵德榮得無可疑使其果來猶恐不測萬一不至貽笑遠方詔止之

文獻通考曰隆興二年明州言高麗入貢孝光寧三朝使命遂絕慶元間詔禁商人持銅錢入高麗朝廷亦絕之也每麗人之入朝也明越二郡困於供給騷然不寧既至闕則館宇燕賚之費以鉅萬計而饋其主者不預焉我使之行二神舟長大數倍戰船費不貲三節官

吏糜爵捐廩皆仰縣官蘇軾謂高麗入貢有五害者以此也

二十三年 宋孝宗乾道五年 金遣使來聘賜羊二千頭 詳見物類考

二十四年 乾道六年 金遣大宗正丞耶律記來賀生辰至境邊吏以前王讓位却之

同年毅宗廢明宗嗣位遣工部侍郎庾應圭奉前王讓位及新王攝位二表如金金主以其廢篡讓之應圭對曰前王不幸有病子亦不慧故遵先父王遺命讓位于弟耳陪臣雖就湯鑊更無異辭金主猶疑之只荅前王表不許讓位應圭奏陪臣所獻二表也新王之表何無回詔也使於四方不辱君命臣之職也臣今辱命罪不容死與其生還本國不若隕身上國聞於天下因不食具服立庭向闕待命晝夜不移三日館

伴以聞金主屢使勸食猶不食從者夜密進水漿應圭叱之曰汝亦人耳何行詐之甚也及五日形容枯槁氣息將絕力不能立數至顛仆金主憐其忠誠遣大臣慰諭曰爾國雖小有臣若此已寢問罪之議將降詔依允汝且就食毋傷生應圭曰臣不受回詔何敢食乎受詔之日乃臣續命之辰不食七日金主益憐之授回詔賜御饌厚慰而遣之後金使价往來必問應圭安否

明宗元年乾道七年金遣完顏靖來問傳授之故王對金使言前王避位出居他所病加無損不能就位拜命路又險遠非使臣所宜往乃具前王表陳以病宣授之意以故靖不得見前王傳詔

時郎中崔均爲接伴金使屢致詰問隨問辨解無差舛金使服其敏

給

十四年淳熙十一年遣使如金進方物兼賀萬春節至義州金以我有太后

喪止之

金遣祭奠使太府監完顏辜來接伴大將軍張仁舞蹈行問上禮辜以國恤舞蹈饑之將祭辜問太后畫像立耶坐耶對曰坐辜曰諸侯王母坐以天子使拜可乎必藏影幘乃行事王遣人再三陳諭辜始從之王立庭下辜登堂再拜奠爵後數日吊慰使起復使續至王宴金使使以王既起復禮宜從吉王答曰雖起復練祥未闕可從吉禮乎金使怒不赴後十餘日乃宴只除結棚插花奏樂

十九年淳熙十六年金主雍殂邊臣馳報遣使吊慰兼會葬金遣使告哀王

率百官舉哀于都省廳金使見王哀慟為之動色
金又遣完顏臣告太后喪遣大將軍韓正修郎中崔敦禮吊喪大將軍
文得呂司業李世長致祭
李英樞嘗求使于金沿路需索郡縣奔走賂遺萬計金人曰汝向為
義州戍卒州人皆呼獸心人汝國無人而俾汝拜高官啣使命歟所
至皆慢罵不禮及還語其子曰汝輩免使異邦幸矣
太子文學趙通奉使如金會有徵詰羈留三年金人愛其才嘉其節
乃令歸報○元時張原績以書狀被留三年同行先還原績作詩
送之曰三韓一介人暮雪江天去歸舟載太平此外無他語元帝覽
之命居學館與一時名儒相從講論三年後得還本國

時奉使如金者利其懋遷多齎土物轉輸多弊驛吏苦之挾帶私饋
皆有定額違者奪職居無何使金者恐失厚利請復舊例王柔而寡
斷又許之

神宗即位 宋 寧 宗 慶 元 三 年 遣考工員外郎趙通告前王讓位請命一如明宗

故事

元年 慶 元 四 年 金遣宣問使孫侯詰前王遜位事欲面見前王傳詔門下侍

郎趙永仁日前王養疾南州計程三十日乃至必欲親授詔書請留待

二三月然後可候遂傳詔于王而還

五年 宋 嘉 定 二 年 王聞金主璟殂告哀使未至先遣洪紀奉慰李淳中祭奠

淳中請祭器於金金人不許淳中曰道途遼遠聞訃最晚騰裝速赴未

暇費來大國何責人以細故吝惜此器耶乃許之及祭奠物精腆金人嘉之

遣使如金賀即位少府監崔甫淳製表有曰五馬渡江表晉朝之開新主六龍御極符羲易之見大人時金主兄弟爭立嫌其觸實中書省詰其表辭不當甫淳坐免

七年

嘉定四年

金遣使賀生辰王遣將軍金良器謝恩至通州遇蒙古兵與

下節九人皆遇害金人收屍以還遣賀節使李孝全如金值蒙古道梗不至而還

康宗元年

嘉定五年

遣使如金告嗣位金遣完顏惟基册王賜印章車輅圭

冕等物王受詔金使欲入自儀鳳正門知奏事琴儀曰若大國枉蹕小

國當入自何門惟基答曰天子出入捨中門而何儀曰然則人臣由正門可乎惟基大服其言乃入自西門

增補文獻備考卷之一百七十二
 四回平對基大張其言代天自西門
 增補文獻備考卷之一百七十二
 入籍中門而西曰然順人亞由而

增補文獻備考卷之一百七十三

弘文館 纂輯 校正

交聘考 三

歷代朝聘 三

高宗六年 宋嘉定十二年 蒙古使蒲里帑也偕東真人來督歲貢

八年 嘉定十四年 蒙古皇太弟遣著古與等來索土物獺皮一萬領細紬三

千匹細苧二千匹綿子一萬觔龍團墨一千丁筆二百管紙十萬張其

餘需索不可勝紀著古與等又出懷中物投王前皆年前所與麤紬布

也遂不赴宴蒙古安只女大王繼遣這可等及女使一人來督國贖王

患其谿壑難充命卜于太廟又召群臣問後來蒙使迎接可否皆曰若



不迎接後必來侵王不悅乃以將軍金希碑知詩書善辭命為類會使使償接蒙使這可等責其不即迎接希碑曰若其迎迓之禮國贖等事敢不盡心然君在都護府手射一人死生未可知若生則君之福死則君之一行必見拘留這可等慙屈一從希碑處分

十一年嘉定十年蒙古使札古也等來聘厚接而遣之蒙使至鴨綠江盡

棄紬布等物但持獺皮而去

蒙古使著古與等來聘翌年春還渡鴨綠江中道為盜所殺後開金元帥弓哥下

殺之也時弓哥下及東真惡我與蒙古結好欲搆蒙寇我邊則若蒙古服遮截蒙使則着我服故莫得以辨之也後蒙使過東真萬奴言高麗背爾慎勿前去蒙使欲驗其真偽不聽而前去萬奴先遣人於西國界山谷間偽為我服潛伏射之由是蒙古疑之絕和

停金年號

十八年宋理宗紹定四年遣將軍金寶鼎郎中趙瑞章如蒙古

時金坵每撰表因事措辭皆中於理元學士王鶚每見表辭必稱美恨不見其面

十九年紹定五年蒙古使齊朝來聘自言我統高麗事欲入處大內朝廷難

之閉廣化門以拒之及其邀宴欲與王連坐仍欲留處宮中相詰至夕乃還館所怒郎中閔懷迪不能支持杖殺之

遣使稱臣于蒙古始行蒙古年號

蒙古以我國遷都江華移牒數罪朝廷遣使陳辨遷都之由有曰雖潛藏江海之間猶夢寐雲霄之上心無間於始終地何論於彼此

二十年紹定六年遣司諫崔璘奉表如金路梗不至而還

蒙古主遣使切責數罪曰自平契丹未嘗遣一介使罪一也命使賈訓言省諭輒敢射回罪二也謀害著古與乃敢稱萬奴殺之罪三也抗拒朝命竄諸海島罪四也汝等民戶不拘執見數輒敢妄奏罪五也

二十五年 宋嘉熙二年 遣將軍金寶鼎侍御史宋彥琦如蒙古乞罷兵

二十六年 嘉熙三年 蒙古遣甫可吃叱等諭王親朝罷兵還

蒙古遣甫可波等復徵王親朝

遣新安公佺及將軍金寶鼎少卿宋彥琦等四十八人奉表入貢辭以母喪請勿親朝

二十七年 嘉熙四年 新安公佺偕蒙古使多可波下等來還

遣禮賓卿宋彥琦侍御史權躉如蒙古辭親朝

宋彥琦嘗四使蒙古講和安邊高宗欲復使蒙古適遭疾時人為之語曰宋之生國之福宋之亡國之憂尋卒

時蒙古壓境屢加徵詰李奎報久掌兩制製表陳情蒙帝感悟遂撤兵

李純孝嘗奉使不賈一物而來囊橐皆空巷婦郵卒皆服其清曰真官人也

三十年 淳祐三年 遣使如蒙古蒙古亦遣使報聘

時兩國使价往來無定限或一歲而四五焉蒙使之來一行至數十百人贈遺供億不可勝紀

三十七年 淳祐十年 蒙古遣多可無老孫等來審出陸之狀到昇天府館責

增補文獻備考 卷一百七十三

王出迎江外王不出遣新安公佺迎入江都
冬復遣洪高伊等來止昇天館令王出迎于梯浦宮是日大風寒苦百
官凍縮失容

三十八年淳祐十一年宴蒙使于梯浦宮蒙使謂王曰國之北鄙殘破如家
無藩籬何以復都舊京宜據江以自固我當歸奏皇帝無令東擾王悅
厚待之

蒙古使洪高伊等復來至梯浦宮時蒙皇新即位詔王親朝令還舊京
王會群臣議或言太子親朝或言辭以王老病未得親朝待更詰遣太
子未晚

三十九年淳祐十二年遣樞密副使李峴使蒙古蒙主問出陸與否峴受崔

沆旨答以今年六月當出且言已營宮闕于昇天浦白馬山蒙主遂留
峴遣多可阿土等密勅曰王出迎陸則雖百姓未出猶可也不然則待
汝來當發兵致討李峴之介張鎰知其謀具以白王王以問崔沆沆曰
大駕不宜輕出江外公卿皆希沆意執不可王從之遣新安公佺迎蒙
使入梯浦宮王乃出見宴未罷多可等怒還昇天館
時張鎰前後入使蒙古不辱君命

四十一年寶祐二年遣秘書少卿李守孫博士金良瑩使蒙古被拘三年死
於懿州

蒙古使多可等來王移御昇天新闕多可曰國王雖已出陸侍中崔沆
尚書李應烈周永珪柳璈等不出是為真降耶仍責誅降城官吏王召

趙邦慶鄭臣朝于配所乘傳入京以示不誅

四十二年寶祐三年遣平章事崔璘奉表朝貢于蒙古乞罷兵璘與蒙使偕

來時議館待使臣雖厚無益璘曰若不得已遣使帝所則今來使不可

不償接王出迎于梯浦宮

更遣侍御史金守剛如蒙古乞罷兵蒙主以不出陸為辭守剛對曰譬

如獵人逐獸入窟穴持弓矢當其前因獸何從而出又如冰雪慘烈地

脉閉塞草木其能生乎蒙主然之曰汝誠使乎當結兩國之好遂命罷

兵翌年秋始定和議而歸

四十四年寶祐五年崔沆以蒙國連年加兵事之無益停春例

四十五年寶祐六年遣將軍朴希實趙文柱散員朴天植如蒙古請復置達

魯花赤曰本國所以未盡事大之誠徒以權臣擅政不樂內屬故爾今

崔瑄已死即欲出水就陸以聽上國之命而天兵壓境比之鼠穴為貓

所守不敢出耳

四十六年宋開慶元年遣郎將金器成等如東界蒙古兵屯所至文州趙暉

與蒙古兵殺之掠國贖而去

蒙古使溫陽加大等來問太子入朝之期王對以五月蒙使怒曰我兵

進退在太子行李遲速五月何其晚也王不得已約以四月蒙使見太

子面約而去

四月太子奉表如蒙古叅政李世材樞副金寶鼎等四十人從行

朴希實趙文柱等踰蜀山追及蒙主于陝州請罷西界義州屯兵蒙主

日爾等既與我同心何憚我兵賜二人金符遣之遂與蒙使尸羅問等
來未幾朴天植偕蒙使加大等來分往南道審視人民出陸之狀
蒙古使加大等偕我使李世材來責出陸遲緩

王薨遣使蒙古告哀

元宗元年

宋景定元年

蒙古主聞太子

即元宗

至西京久留不來疑國中有變

遣荆節等開諭本國蕩滌罪過以復王位又遣其臣多大等來頒登極
詔兩人怒贈遺不如意捲座席而去

遣王子永安公僖如蒙古賀登極蒙古以國王封册印及虎符賜之仍
謂本國使臣張李烈曰朕即昨後爾國最先來賀朕甚喜焉今朝會者
八十餘國汝等見有禮待如爾國者乎

三年

景定三年

蒙古賜王曆書

蒙主遣按脫麥徹兒等來索鷓子及好銅二萬斤好銅者鑰鈔也不產
本國轉買上國而得之於是令宰樞至六品收鑰鈔得六百十二斤並
鷓子二十遣郎中高訥獻之蒙主以欺詐責之以四事於是復遣使來
索而俱未奉詔蒙主益怒不賜回詔翌年訥等還中書省云帝怒爾國
前降詔書內置郵籍民出師輸餉事置不奏故不賜回詔更遣禮賓
卿朱英亮郎將鄭卿甫等上表陳情曰本國被兵三十年民之在者百
不二三請俟民力粗完當如詔旨蒙主回詔曰向以細事見卿之心未
孚故有責備之報今茲來復辭意懇實理當允俞朝貢物數亦命稱其
力自三月至六月高麗凡三遣使入貢詔賜羊五百

五年景定五年蒙古遣必閣赤古乙獨等傳詔曰朝覲諸侯之大節今歲朝

王公群牧於上都卿宜來修世見之禮王會宰樞議皆持疑未決平章

事李藏用曰王覲則和親否則生釁太尉金俊曰萬一有變奈何藏用

曰必無事脫有變甘受孥戮遂與樞密副使蔡禎等五十人奉王朝燕

蒙古主再親宴賜與甚厚冬奉王還

李藏用文辭有餘應對精詳蒙人甚重之謂之海東賢人有寫真以禮者

六年宋度宗咸淳元年遣使蒙古謝恩冬又遣使賀正自是以後賀正賀節陳

奏謝恩等節皆遵遼金故事其尊奉之節尤為隆重矣終世祖三十一

凡三十有六

七年咸淳二年蒙古主有驚遠服柔之意遣使黑的殷弘等詔曰今欲通和

日本卿其導達去使開悟彼心勿以風濤險阻未嘗通好為辭朝廷不

得已遣樞密副使宋君斐侍御史金贊與黑的等往日本翌年正月至

巨濟松邊浦畏風濤遂還李藏用度日本竟不至將累我國貽書黑的

細陳日本之反覆風濤之難險欲令轉聞王怒其不先聞疑有二心即

配藏用于靈興島在南陽黑的曰我歸奏此書幸而聽之天下之福不聽

言者何罪固止之獲免王令君斐隨黑的如蒙古辭以風濤蒙主復遣

黑的下詔切責

九年咸淳四年遣起居舍人潘阜賈蒙主詔往日本日本人不納王都未得

要領而還乃遣潘阜如蒙古陳奏事狀蒙主猶疑其不實

增補文獻備考 卷一百七十三
賀正使安慶公滄回蒙主面勅本國負德食言之六罪因不賜答詔尋
又遣北京摠管于也孫脫等下詔切責又令金俊李藏用入朝俊托故
不往遣藏用奉表入奏以稟命承從之意蒙主曰王綽曾奏爾國有精
兵四萬雜色一萬故朕勅以一萬衛王國四萬助戰爾言綽言非實呼
綽與辨藏用曰我國昔有四萬軍三十年間死於兵疫殆盡雖百戶千
戶但虛名耳蒙主曰有死者獨無生者乎藏用曰有生長者皆幼少不
堪充軍蒙主曰爾國於宋風順可兩三日日本則朝發夕至何不主
是事綽復欲言軍事藏用曰至尊前不當爭辨遣人就視便可立驗蒙
主遂遣使偕藏用來閱戰艦軍額蒙使還復遣使入奏曰小邦全盛時
人民尙寡况兵疫死亡多方調發僅得萬人舟艦則庀材營造至是蒙

主復遣其將軍脫朶兒劉傑等閱軍額戰艦

潘阜謁蒙主俱陳日本驕傲蒙主猶不信復遣黑的等下詔切責朝廷
不得已遣知門下省事申思佺禮部侍郎陳并起居舍人潘阜等從國
信使黑的等赴日本使禮部侍郎張鎰奉表從脫朶兒入朝翌年思佺
等以對馬島倭人入蒙古蒙古主大喜許其忠節厚賜匹帛

十年

咸淳五年

世子謙自蒙古還至婆娑府聞林衍廢立還入蒙古○安慶

公滄爲林衍所立遣使如蒙古告遜位攝位一依前日廢立故事又遣
李藏用如蒙古欲令彌縫廢立之事仍說世子東還藏用至蒙古具告
林衍廢立之罪

蒙古欲封世子謙爲東安公遣兵來討時金暉以節使書狀如蒙古上

增補文獻備考 卷一百七十三
書言賊若聞世子受冊爲公必諭國人曰上國已削王爵國當制矣莫如死守社稷則人皆信之如此難以歲月下非朝廷利也蒙主遂遣幹朶兒不花李諤等來問遜位之故溥復遣金方慶等上表陳辨蒙古遣兵部侍郎黑的淄萊路判官徐世雄等來詔諭令王與溥及林衍偕詣闕下面陳情實如逾期不至當窮詰首惡盡兵勦絕衍恐懼廢溥復立王王復位宴黑的使坐上座黑的讓曰今王太子許尙帝女我等帝臣王乃帝駙馬大王之父何敢抗禮王西向我北面王南面我東向王辭以天子之使不可下坐東西相對時朝廷畏林衍莫敢言廢立王亦稱因病遜位遣奉御朴休奉表告復位

冬王親朝蒙古林衍恐泄廢立之事使其子惟幹從行翌年至燕京上書都堂請世子尙公主又請兵俱至舊京除權臣復舊都蒙主令東京行省國王頭輩哥率兵偕王及世子發還

十一年

咸淳六年

遣世子諶與樞密副使元傅等如蒙古賀節且奏三別抄

叛狀又請還西京以北諸城不許連歲陳奏竟不許蒙主遣斷事官不花孟棋等與世子偕來以誣訴行省及交通南宋日本事下詔切責

十二年

咸淳七年

郎將李瑛逃入蒙古奏本國司天監伍允孚能曉天文郎

將金希牧手能裂石又前大卿閔昉聞帝有足疾妄言能醫蒙主並命召之王並遣之上將軍李應公之子樞逃入蒙古誣奏本國土產多有稀恠不可名狀之物蒙主信之遣必閣赤黑狗及樞等求宮室材及金漆青藤八郎蟲榧木榧實冬栢實奴台木海竹冬栢竹篔烏梅華梨藤

席等物本國以金漆十缸榷木奴台木等進獻而烏梅等華梨藤席非
土產而有宋商所獻故亦並進樞言青藤八郎蟲出於喬桐珍島海南
等處而往取不得先時蒙主有足疾用本國產阿吉兒合蒙合魚以皮
爲靴則脚腫立愈詔索之得十七領以獻後又求蜃樓脂即鯨魚油也
十三年咸淳八年遣使如元賀建國號

遣諫議大夫郭汝弼如元請減軍料閭門副使琴熏請討耽羅郎將李
有庇請鳳州留屯軍糧料乞令東寧府添助

十四年咸淳九年遣使如元請罷鬱陵島斫木減洪茶丘麾下衣服元並從
之

十五年咸淳十年元求蠻子婦元謂來降者爲蠻子置結婚都監送無夫女百四十名

分與蠻子

王薨世子謙自元奔喪元遣册封使偕行先入京詔王襲位受朝賀仍
宴册使册使以王駙馬推王南面使東面王行酒使拜受飲訖又拜

遣樞密副使奇蘊如元迎公主王親迎于肅州以來遣李信孫如元賀
正

忠烈王元年宋恭宗德祐元年遣贊成俞千遇如元賀正告改官制兼貢女先

是元帝詔曰我太祖皇帝征十三國其王爭獻美女良馬珍寶爾所聞
也於是王禁國中婚嫁選處女十人進獻元帝只留崔甸崔之守女餘
放還

聞詔使來率宰樞侍臣迎于西門外王既尙公主詔使未嘗出城而

迎舌人金台如元省官語之曰國王不迎詔使不為無例然王是外國之主也詔書至不可不迎至是迎之

二年德祐二年元遣使賈幣帛來為歸附軍五百人聘妻乃遣寡婦處女推

考別監五人於諸道採女後改稱歸附軍行聘別監

三年宋端宗景炎二年元遣使鑄劍一千于忠州

又遣本國中郎將曹允通來採人蔘自是允通歲巡州郡發民採蔘或非地產未及納期輒徵銀幣王遣張舜龍奏曰人蔘惟產東北界允通強令諸道採納今請隨所產處以時採納乞令允通毋得擅便

遣趙仁規印請侯廢太妃慶昌宮主為庶人

四年景炎三年王及公主如元元帝寵遇無比及還使人護送賜王海東青

一連駙馬金印鞍馬皇后賜公主綵段一車命罷達魯花赤及王京留

鎮合浦鎮戍西北屯田等軍皇太子亦遣人餞之皇子皇女歌舞侑觴

王使忽赤能歌者歌感皇恩曲以酬之是行也凡國家弊事一切奏除

王復如元以叛人金甫成之讒親朝辨誣翌年還元帝賞賜忠烈王

金甕一事

元太后嘗遣使賜忠宣王淑妃姑姑蒙古婦人所戴冠名曰姑姑

五年元世祖至元十六年遣帶方公激率禿魯花赤如元侍衛金方慶元傅許洪

等衣冠子弟二十五人皆超三職以送之

遣禮部侍郎杜世忠率三十人使日本倭人皆殺之四人逃還遣使

如元奏事實

增補文獻備考 卷一百七十三

六年至元十年遣趙仁規如元上書中書省曰諸侯入相古之道也遼金

兩國册我祖先為開府儀同三司予亦蒙恩拜特進上柱國諸侯而帶

上國輔宰之職古今有例伏望善奏於是元册王為開府儀同三司中

書左丞相行中書省事

七年至元十年自事元以來王與使者東西相對至是元遣元帥忻都等

來與王議事王南面忻都等東面不敢抗禮國人大悅

公主聞皇后計科斂銀苧又選良家女奔喪至懿州盛京廣寧縣有帝勅不

至而復

八年至元十年遣使如元請醫巫帝謂使臣曰病非巫所能已醫則前已

遣鍊德新何必他醫不許

德新宋御醫也能合助陽丸得幸於王公主伍允孚嘗曰此藥不宜

胎產使三韓支胤不蕃必此人也公主連歲妊娠及得德新藥更不

妊娠

十二年至元十年元中書省因國史院報令具錄本國累朝事迹及臣服

日月與帝即位以來使价名目國王親朝年月以進於是命史官撰國

史

十三年至元十四年遣將軍柳庇如元報王親將兵助征乃顏元帝已親征

擒乃顏罷助征兵命王入賀王遂乘傳入朝公主又請從王入朝王至

燕京召公主世子入朝公主使印侯等選良家女巡軍忽赤搜索人家

雖無女者亦被驚擾怨泣之聲遍於閭巷全羅道王旨別監權宜以銀

四十斤虎皮二十領獻世子助行李世子曰此物皆剝民歛怨悉還其
主公主至西京聞賊起咸平路道梗乃還

二十一年元成宗元貞元年遣判三司金之淑如元賀聖節與交趾使者爭班

之淑奏曰本國雖小白太祖奮義之初首先臣服兄弟有盟甥舅有親
敢先設幣陳賀帝從之賜坐諸侯王列

二十二年元貞二年遣使如元請世子婚元許之趣王入覲王及公主如元

從臣二百四十三人僉從五百九十人馬九百九十四匹行資幣物不可

勝數翌年夏始還

二十三年元大德元年公主還自元薨遣密直元卿告訃于元世子諱自元

奔喪元遣岑魯忽孫來吊追封齊國長公主

世子諱如元迎公主

翌年春還

二十四年元大德二年有人貼榜宮門云趙仁規妻呪咀公主元遣使百輩來

鞠仁規及其女趙妃並其婿崔冲紹朴瑄等執之以歸元帝杖流仁規

于安西冲紹瑄于鞏昌

元遣孛魯兀宣詔上王曰嗣王莅政以來頗涉專擅處決失宜蓋以年

未及壯少所經鍊故未能副朕親任之意今詔卿依前統理國政詔諫

入侍闕庭使之明習于事因以帝命取國王印授上王趣嗣王及公主

入朝

二十七年元大德五年遣密直副使金台鉉如元賀聖節適帝幸甘肅中書省

奉勅諸路使臣一切停住台鉉爭於中書省曰下國自事大以來歲時

增補文獻備考 卷一百一十三
朝賀未嘗有闕停住京師帝命也達於行在吾君命也吾寧獲罪於帝不敢廢吾君命也省許之遂達行在帝嘉忠懇大加賞賚賜御饌以寵之

元征東平章事濶里吉思還朝奏以本國濫罰官冗民弊等事元帝遣使下詔曰王以宗國生靈爲念威福與奪常出自己事體有未便民情有未安者其審圖之緊爾群臣悉心奉正各修乃職敢有蹈襲前非專恣不法王雖容爾朕必不貸中書省又移咨申飭

遣知都僉議司事閔萱如元請改嫁公主及忽刺歹等所占田民還本主其請改嫁表萱不敢進而還

二十九年大德七年元遣斷事官帖木兒不花翰林李學士等來收石冑及

其子天補天卿天棋及金世以去本國遣崔有滄柳庇押送元又遣兵部尙書脫脫帖木兒來捕吳祁祁已押付元使而不知而來元又遣刑部尙書塔察兒翰林直學士王約執宋璘金元柱囚征東省旣而釋之遣齊安公淑如元表謝聽讒之過請前王還國

三十二年大德十年元遣兵部尙書伯伯劉學士執宋邦英宋璘等以歸旣而釋之

元以前王有定策功授開府儀同三司太子太傅上柱國駙馬都尉進封瀋陽王令入中書叅議政事賜金虎符玉帶碧甸金帶黃金五百兩銀五千兩

初國人雖學蒙古語未有善敷對者我使入元必使康守衡引入及

趙仁規奉使敷奏明辨時稱專對之才前後奉使凡三十

忠宣王二年至大年政丞崔有滄等遣使奉箋請王還國時帝及皇后待

王甚寵故王不樂東歸凡留燕六年支應轉輸之繁民力殆竭

三年至大年順正君璫奉御香還自元故事迎香不用禮服璫遣人強之

百官用禮服

五年元仁宗皇慶二年王傳位于次子江陵大君燾于燕邸嗣王始奉上王東

歸上王既遜位欲留元元不聽不得已與公主及王東歸傳車百四十

兩馬稱是元亦遣丞相納刺忽等護送

忠肅王元年元延祐元年上王如元謁元帝命留京師

上王構萬卷堂于燕邸召李齊賢充府中迎置大儒閻復姚燧趙孟

頽虞集等與之從遊

三年元延祐三年王如元聘元營王也先帖木兒之女亦憐真八刺公主為妃

以歸以營王之請親選童女

時元諸王宰相及使臣各請童女國家又選私獻于帝士大夫家生

女則輒秘之雖親戚不相見

李齊賢奉使西蜀所至題詠膾炙人口

七年元延祐七年元流上王于吐蕃任伯顏禿古思本國尙書朱冕家奴也自

宮為闖資緣事元仁宗於藩邸佞險多不法無寵於上王百計誣讒於

元元流上王于吐蕃撤思結之地去京師一萬五千里隨從宰相皆逃

匿不見惟直寶文閣朴仁幹大護軍張元趾等十八人從至流所禿古

思讒訴不已禍幾不測賴丞相拜住營救得免李凌幹時從行在元潛

懷金附驛吏獻上王上王及從臣賴以不乏

翌年冬到吐蕃十年春量移于朶思麻之地多有還

燕京

八年元英宗至治元年王如元時藩王高有寵於元帝窺覩本國選部典書曹

頤及內豎朴仁平等陰附於高訴王陰事讒搆於元元徵王入朝王受

詔即發夜四更出陽善門百官不及拜謝柳清臣吳潛元忠韓渥尹碩

柳有奇安珪等從行既至燕舍于伯顏禿古思家元收王印章留之於

是柳清臣吳潛之徒反王附高侍從皆離畔高持王甚力惡本國輸錢

財為王費遣其臣楊成柱以元帝命責宰相金利用令刷送所輸文字

獨司僕副正韓宗愈與金仁愆不聽

元使金家奴來以帝命赦權漢功蔡洪哲而召之

元遣使來問公主不諱之故高黨譖漢國公主不得其死於是中書省

遣宣使李常志來囚宮女及饗人訊問公主薨故遂執之以歸

九年至治二年高潛王不奉帝勅帝遣待制沙的等來訊沙的在行省鞫式

目都監錄事李允緘允緘言臣賈至王宮授代言安珪時有別駕徐允

公見之沙的遂執允緘等以歸帝命鞫珪等辭及於王王不能自明於

是曹頤蔡河中趙璉趙延壽金元祥等憇患而織成之間事使臣絡繹

不絕

節使林仲沆如元未達而還時藩王高持王甚力臣遣使朝賀者皆

至遼東達魯花赤不給驛不得而還

遣護軍楊起等如元賀正自是使价朝賀皆用壽命

十年至治三年柳清臣吳潛上書于元請罷國號立行省比內地帝遣平章

事潤兒察中書恟烈等于本國元前通事舍人王觀上書丞相陳六弊

力言其不可本國金怡崔誠之李齊賢等呈書都堂歷陳情懇立省之

議遂寢

十一年元泰定帝泰定元年元復賜王印章

十二年泰定二年王及公主至自元凡留元五年而還

上王薨于燕邸凡入元十年而薨遣三司左使尹莘傑等奉迎上王梓宮

公主薨遣使告訃于元元遣使來吊追封曹國公主

十五年元致和元年遣世子禎如元留宿衛

元遣平章事買驢等來審王疾時鬲黨誣王盲聾啞柳清臣吳潛詣

中書省訴王有疾不親政事帝乃遣買驢等來買驢見王對辨有序禮

容肅嚴乃曰上所以命臣者察王疾也以今所見見之向者之訴皆誣

也前來使臣凌辱宰相擅作威福多納賄賂買驢疾其所為並督令還

歸王使崔安道餽金銀段匹皆不受

忠惠王二年元至順三年元遣理問郎中蔣伯祥來收王璽綬因徵王入朝

前王復位

元遣客省太師都赤來囚閔祥正趙炎輝于行省獄執蔣伯祥以歸伯

祥奉使在本國多作威福贖于貨賂百官以書訴于使臣故也

忠肅王後二年元順帝至統元年王及公主還自元

五年元至元二年元徵王入朝遣癯王歸國

七年元至元四年元遣失里迷求宦者童女時典醫副令李穀在元製疏給御

史臺請罷童女帝納之其疏畧曰今高麗婦女在后妃之列配王侯之

及閱閱豪富之家特蒙詔旨情願自來且有媒聘之禮焉固非常事而好利者援而為禮凡今使其國者皆欲妻妾非但取童女而已聞高麗之人生女者秘之每有使者相顧失色軍吏四出家搜戶探繫累束縛見而後已使臣憑藉受賂每取一女謝數百家父母宗族聚哭送于國門牽衣頓仆號呼悲痛或投井自縊其弊不可殫記

李穀入元中制科授檢閱奉興學詔東還

八年元至元五年王薨遣前評理李揆如元求襲位太師伯顏言王熹本非好

人且有疾宜死矣潑皮元人呼忠惠王曰潑皮雖嫡長不必為王唯高

即瀋陽王可揆等百計請之不得宰相權溥等上書中書省又遣使請之伯

顏皆不受

元遣斷事官頭麟等執王及宰相洪彬等十二人以歸王召彥陽君金

倫偕行都官正郎金光載曰吾君危矣吾忍獨免乎金海君李齊賢奮

然曰吾知吾君之子而已遂皆從之元囚王及宰相金倫洪彬等十餘

人于刑部命中書樞密御史翰林宗正五部雜治之時即本國叛臣曹頤黨

多利口王不能自明事將危殆倫折以片言辭簡理直五府官改容目

之曰白鬢宰相彬曰頤王之奴奴而欲戕王王法所不赦且彬以先王

遺命權行省事事干邦憲者彬實當之辭氣慷慨翌年脫脫奏釋王復

位

忠宣王後四年元至元三年元遣使求童女

五年至正四年元遣桑哥來頒元子昕襲位詔是日王宴元使桑哥用禮樂百官侍宴皆簪花名曰君臣慶會宴

史臣元松壽曰三年之喪自天子達於庶人先王岳陽之喪未返而至用女樂使百官簪花如禮何

元遣使册王爲開府儀同三司征東行中書省左丞相上柱國

忠穆王二年至正六年元徵前政丞王煦入朝

四年至正八年王薨王叔江陵大君祺在元庶弟慶昌府院君眡在本國莫

適所立政丞王煦遣金海君李齊賢如元請定嗣君翌年春元徵慶昌

府院君眡入朝盧頊孫守卿李君佺閔評尹時遇崔濡等奉眡如元政

丞王煦如元賀節且定新君也元立慶昌府院君眡爲王遣翰林學士

雙哥護行以歸王與德寧公主宴雙哥于延慶宮公主南面王東面監察大夫李衍宗上書言其非禮

忠定王三年至正一年元立江陵大君祺爲王遣斷事官完者不花封府

庫宮室收國璽以歸王及公主至自元

恭愍王元年至正二年遣使如元告誅趙日新翌年元遣使誅其黨鄭天

起等二十人

二年至正三年遣使如元賀皇后誕日皇后誕日之賀始此

五年至正六年元聞我國殺奇氏又攻西站及雙城乃囚賀節使金龜年

于遼陽省聲言發八十萬兵來討又遣斷事官撒迪罕詢問侵邊事狀

於是王附表元使謝罪仍陳奇轍謀逆之罪又以侵邊歸罪於印璫而

誅之以說于元

元復遣撒迪罕來赦王前過許其自新時天下兵起元不暇問罪於我復通信使

遣政堂文學李仁復如元謝赦過兼陳雙城本末請復舊疆元不從

九年至正十年遣使如元不至而復時元朝朝聘久絕初平紅賊遣使告

捷至遼陽道梗而還至是復遣益山君李公遂戶部尚書朱思忠如元

審賊勢至湯站道梗還王怒更遣之至瀋陽數月未得達而還

十年至正十一年遣使如元以道路復通也

十一年至正十二年遣使如元告平紅賊

十二年至正十三年遣贊成事李公遂如元時德興君諱誣奏王薨於紅賊

之變於是元立德興君諱為王公遂以奏復王位為已任行至西京謁太祖原廟誓曰吾君不復位臣死不復還至元元令奉德興君東歸公遂以死自誓不肯歸元不敢強乃拜太常禮儀院使公遂辭不獲宗廟大享再為太常卿循蹈禮則觀者敬之諱以公遂在都事或中變重賂禿魯帖木兒欲得公遂以歸公遂謂書狀林樸曰吾當祝髮入山決不從彼也崔濡令林樸從德興樸曰臣等若從僧王無異於婦人之背夫也元遂不許濡請諱又除樸曲理摠郎以誘之樸誓死不從遣密直商議洪淳同知密直李壽林如元百官耆老呈書御史臺中書省詹事院陳王有功無罪之狀且言德興君非忠宣之子乃忠宣賤妾出宮後嫁白文舉而生者請械送本國元不許

元遣李家奴賈遞位詔收王印章王聞家奴來遣人執其使者問廢立之故使至王陳兵迎送附表請執送崔濡等

十三年至正十四年元遣使復王位初崔濡因元權臣搠缺監及宦者朴不

花構誣廢王至發兵而來既敗還又托權勢謀起大兵丞相孛羅帖木

兒等以為高麗王有功無罪而為小人所困盍先申理監察御史紐憐

上書訟王之功且言濡惡帝即收塔思帖木兒印章置永平府命王復

位遣翰林承旨奇田龍來宣詔都堂請王郊迎王不從命百官迎之曰

詔使若問不郊迎則對以寡居嘗獲罪天朝貶爵今雖復位未承明命

不敢迎詔及元使至行省王以便服聽旨乃具冕服拜命

李公遂林樸還自元以終始不貳並擢拜以褒之

十四年至正十五年公主薨遣使告哀于元元贈魯國徽翼大長公主

元遣使册王為太尉又以壬寅平紅賊功宣授韓方信安遇慶黃裳李

龜壽等官

十五年至正十六年時廓擴帖木兒為天下元帥主征討故王遣密直提學

田祿生軍簿佐郎金齊顏聘之至燕京元惡其私交不許往齊顏謂祿

生曰公大臣不可留我且留必達使命遂稱疾留燕單騎間走河南竟

致國書因上書陳國王忠悃廓擴帖木兒大喜奏授兵部郎中遣其中

書檢校郭永錫偕齊顏報聘

十六年至正十七年元遣使賜三王諡永陵曰忠惠明陵曰忠穆聰陵曰忠

定並賜功臣號

十七年至正十八年遣文大式如元路梗而還杖流之

遣禮儀判書張子溫聘于吳王吳王禮接甚厚使御史大夫慰張樂大夫謂子溫曰憲司之會未嘗用樂今以為子耳子溫曰樂以和為主諸公既以和氣相接何必用樂大夫曰尚書既知禮樂之本不必用樂乃止吳王聞之加厚禮以送

元遣使請兵

十八年明太祖洪武二年明太祖遣符寶郎僂斯由海道賜王璽書報定天下

王率百官出迎于崇仁門外僂斯以二羊享王及還王遣斯鞍馬衣服不受遣使聘元淮王

遣禮部尚書洪尙載等入朝于明賀登極仍謝恩帝遣宦者金麗淵領

東土流民歸國

遣摠部尚書成准得賀聖節千牛衛大將軍金甲兩賀千秋節工部尚書張子溫賀正仍請賜本國朝賀儀注

北元遣使來聘又吳王淮王並遣使報聘

始停元年號

十九年洪武三年明帝遣朝天官道士徐師昊祭本國山川又立碑于京城

南風川記其事詳見輿地考王疑道士行壓勝之術稱疾不出命百官迎詔

明帝遣尙寶司僂斯來錫王命賈金印誥文封王為高麗王凡儀制器用許從本俗仍賜大統曆錦繡絨段並賜大妃王妃及相國辛毗待中李春富李仁任色段線羅紗各四疋未幾成准得等辭歸賜書誨諭賜

王及妃冠服樂器陪臣冠服經書史書見藝文考張子溫之還明帝又賜本

國朝賀儀

明又遣侍儀舍人卜謙來頒科舉程式中書省移咨令本國鄉試中選

舉人出給公據赴京會試

明又遣秘書監直長夏祥鳳嶺岳鎮海瀆城隍神號詔

明又遣百戶丁志等來執蘭秀山叛賊陳君祥等以歸君祥積年在海

作耗及浙東平詐降于明復殺其將官率徒百餘人航海來居于古阜

明州人告于京師執之以歸

遣三司左使姜師贊如明謝册命並納元所降金印仍稟耽羅事曰耽

羅即是高麗之地也其所放馬匹騾子許令土人牧養其韃靼牧子亦

令本國撫為良民又請樂工發送習業及師贊還明帝命太常樂工赴

京習業中書省言高麗使人貢多齎私物貨鬻宜征稅又多携中國物

出境禁之便不許

明帝遣宣使孟原哲賈詔來告元亡始行大明年號

二十一年洪武五年明帝命貢耽羅牧馬以秘書監劉景元為宥旨別監往

耽羅揀選御馬韃靼牧子殺景元及濟州牧使李用藏以叛乃遣民部

尚書張子溫如京師請討耽羅又遣禮部尚書吳季南獻本國馬六匹

遣大護軍金甲雨獻耽羅馬五十四匹于京師後二年因中書省移咨以

所貢之馬皆非可乘之騎兼以盜賣二匹托以道亡甲雨及譯舌吳克

忠處斬

遺密直司事洪師範司成鄭夢周等一百五十餘人朝明賀平蜀兼請子弟入學還道大倉海中遭颶風船敗師範等三十九人溺死書狀鄭夢周萬死乃生割膽而食者十三日帝聞之具舟楫取來翌年秋乃還明帝遣前元院使延達麻失里等來錫王綵段紗羅王出迎于迎賓館遣姜仁裕等謝恩

張子溫廻自明明帝賜藥材藥方遣盧稹等謝恩

明中書省咨送陳友諒明昇家屬令不做軍不做民閑住過活

二十二年洪武六年北元遣使來自應昌破後朝廷不復知北元消息至是

北元遣波都帖木兒於山不花等詔曰頃因兵亂播遷于北今廓擴帖木兒為相幾於中興王亦世祖之孫宜助力復定天下初元使入境王

欲遣人殺之群臣皆執不可於是訪以拘留放還執送京師三策群臣皆言放還便及使至托以眼疾不見蓋畏明朝知之也

二十三年洪武七年遣密直副使鄭庇判繕工禹仁烈如明賀正請陸路朝

見又請方物仍舊及庇還中書省移咨曰朝貢三年一聘從海道來又云今鄭庇賫至禮物過於常貢實非事大以誠之禮况我朝四海一家豈資小邦之貢今於所貢物內受布六對餘物付來使領還

明帝遣禮部主事林密孳牧大使蔡斌等來索耽羅馬詳見兵考及還本國

使密直金義護送定遼衛又遣張子溫等謝恩偕行至開州站斌所至酗酒每欲殺義義不能堪乃殺斌及其子執密以甲士三百人進獻馬三百匹奔北元子溫等懼不敢進而逃還

王被弒遣密直使張子溫典工判書閔伯萱如明告訃且請諡及承襲以金義之變不敢達而逃還

遣判密直金潛如北元告哀或謂李仁任曰自古國君見弒爲宰相者先受其罪帝若興師問罪公必不免莫若與元和親仁任然之斌等之還遣贊成事安師琦陽言餞行密諭金義殺斌等以滅口由是人心疑懼未敢通使于京師遂遣潛等如北元被拘二年而逃還自是事北事南之議始起

辛禍元年

洪武八年

遣判宗簿事崔源告哀于明自玄陵被弒金義殺使之

後國人汹懼未敢通使于明大司成鄭夢周以爲宜速詳奏上國不可先自疑貳判典校令朴尙衷司藝鄭道傳亦言之時人皆憚行崔源曰

社稷苟安何惜一死遂遣源告喪請諡及承襲帝疑其詐拘源而遣使

吊祭

納哈出遣使來時金義在北元言王薨無嗣願奉瀋王爲主北元遂封

瀋王曷孫脫脫不花爲王納哈出遣使來問曰前王無子今誰嗣位耶

若有子朝廷必不遣瀋王也

北元遣使來曰伯顏帖木兒王背我歸明赦爾國弒王之罪於是侍中

李仁任慶復興西北面元帥池瀚欲迎之三司左使金九容典理摠郎

李崇仁應教權近典儀副令鄭道傳上書都堂曰若迎元使一國臣民

皆陷於亂賊之科他日何面目見玄陵於地下乎仁任等却不見令道

傳迎元使道傳曰我當斬使首以來不爾縛送于明辭頗不遜仁任等

怒乃流道傳于會津而繼而大司成鄭夢周典校令朴尙衷上書爭事
元之非言甚切至乃遣贊成事黃裳左副代言成石璘如江界慰還元
使

二年洪武九年遣使如北元北元河南王廓擴帖木兒遣使貽書於王開陳

利害請與夾攻大明又歸我行人文天式朝廷遂遣密直副使孫彥如

北元陳父子相傳之義請執送藩王又遣使報聘于納哈出納哈出曰

我本非與高麗戰伯顏帖木兒王遣年少李將軍擊我幾不免李將軍

無恙乎用兵如神真天才也將任大事於汝國矣

二年洪武十年北元封册使至禍欲冕服郊迎前密直副使朴成亮曰不可

昔元復命敬孝王爲王詔使來王不郊迎以便服出行省聽旨乃具冕

服拜命今元使來宜遵先王舊制從之

始行北元宣光年號

遣三司使李子松如北元謝册命元君臣見子松朝服行禮皆泣曰自

我播遷困於行間不圖今日復見禮儀待之甚厚自是使价往來不絕

北元遣使請夾攻定遼衛不從

遣周誼貢馬及方物于大明却不受

四年洪武十一年遣使入謝于明帝放還本國人丁彥等三百五十八人遣

判繕工事柳藩謝恩禮儀判書周誼等請諡承襲及藩等之還禮部奉

帝旨錄示以授曰朕起自寒微君主中國即位之初飛報四夷使知中

國之有君不過欲通和而已不期高麗王顯乃稱臣入貢斯非力也即

心悅也其王精誠數年乃者爲臣所弑今又幾年矣今彼人來請王顯
謚號朕思限山隔海似難聲教當聽彼自然不干名爵前者弑君而殺
行人今豈遵法律而守憲章爾大臣勿與彼中事如勅施行
明帝遣還行人崔源等憲府劾源在京師帝問金義殺使先王被弑事
源不遵使旨不諱國惡請治其罪乃下源鞫之不服竟殺之

復行大明年號

北元使來告其主豆叱仇帖木兒即位禍托病不迎使強之遂出迎行

省

十年

洪武十七年

遼東都指揮梅義詰責本國一不問訊朝廷以判三司事

金九容爲行禮使奉書幣遣之遼東諸將以爲義無私交執送京師帝

責以貢馬不至流大理衛行至瀘州承寧縣病卒

九容在道間關萬里備嘗艱難而無顧慮自惜之意曰吾死於王事

使中國人知吾姓名可謂得死所矣有詩曰良馬五千何日到桃花

關外草芊芊

遣禮儀判書金宜進貢馬一千匹于明又遣判事張方平進馬二千匹

以金銀非土產遣司僕正崔涓請減以馬代輸遼東都司唐勝宗爲之

請帝許之每銀三百兩准馬一匹金五十兩准馬一匹

北元遣使來至和寧府遣護軍任彥忠慰諭遣還以道梗留半歲而去

遣使入貢于明時財用匱竭復置進獻盤纏色依勅進五歲貢金五百

斤內解送九十六斤十四兩餘折准馬一百二十九匹銀五萬兩內解

增補文獻備考 卷一百一十三
送一萬九千兩餘折准馬一百匹布三萬匹內解送白苧黑白麻布數
足馬五千匹內已解送遼東四千匹今解送一千匹時奉使者多憚不
行附勢求免連山君李元紘銀川君趙琳俱以散官行
當遣聖節使人皆憚行規避最後乃擬遣密直副使陳平仲平仲以臧
獲數十口賂林堅味遂辭疾堅味即舉政堂文學鄭夢周禡召夢周面
諭曰爾來我國見責朝廷皆大臣過也卿博古通今且悉予意今平仲
疾不能行乃代以卿卿意何如對曰君父之命水火尙不避况朝天乎
然我國去南京凡八千里除候風渤海實凡百日程今去聖節纔六旬
脫候風洩旬則餘日僅五十此臣恨也禡曰何日就道對曰安敢留宿
即日就道晨夜兼行及節日進表明帝覽表畫日曰爾國陪臣必相托

故不來日迫乃遣爾也爾得非往者以賀平蜀來者乎夢周悉陳其船
敗狀帝特賜慰撫優禮以送遂放還拘留行人金庾洪尙載李子庸周
謙黃陶裴仲倫等且許通朝聘子庸道死禡引見庾等賜酒勞之曰卿
等奉使竄于絕域二萬八千餘里三年乃得生還予甚憫焉各賜鞍馬
李仁任以庾倡說國陰事白禡杖流順天道死

十二年洪武九年遣政堂文學鄭夢周貢布一萬匹馬一千匹于明請便
服及群臣朝服便服仍乞蠲減歲貢夢周入見奏對詳明得除五年貢
未納者及增定歲貢帝降旨曰高麗屢請約束朕數不允其請以試其
誠僞中國豈倚此而爲富今又請命宜損其貢數令三年一朝而貢良
騎五十匹以資鍾山之陽牧野之群仍命至洪武二十一年正朝乃貢

遣贊成事尹珍等謝恩

遣評理安翊賀聖節于明

時奉使人還執政視賂多少高下其官或不如欲必中傷之故奉使

者規免其禍皆貿易翊歎曰吾以為遣宰相朝聘為國家今乃知為

權門營產也

十三年

洪武二年

明使指揮僉事徐質來督進獻馬

詳見兵考

遣張子溫如明謝許改冠服表有曰實仰華風再勤陳請庶幾變魯而

用從周子溫至明帝以進馬驚下下錦衣衛竟瘦死獄中

元納哈出降于明於是金山等地皆平遣知門下張方平入賀于明至

憩水站遼東都司使人錄示帝旨曰今後高麗使臣不許赴送京師其

國執政凡百期約非過則不及未嘗誠意相孚可以絕交不可與之往

來方平等遂還乃遣永原君鄭夢周請通朝聘至遼東不得入而還有

人自遼東來言帝將求妻女官者牛馬各一千都堂憂之崔瑩曰如此

則興兵擊之可也

十四年

洪武二年

遣密直趙琳告誅亂臣林堅味廉興邦且請復通朝貢

不納而還

明帝以鐵嶺迤北本屬于元並令歸之遼東命立鐵嶺衛侍中崔瑩勸

禍起兵攻遼師次威化島我太祖倡義回軍執黜瑩等遣朴宜中請

寢立衛之命帝優禮遣還時中朝聞本國之變將興師問罪帝欲親卜

于宗廟方致齋適宜中至遂罷齋蓋自恭愍朝朝聘者多以金銀土產

增補文獻備考 卷一百一十三
彩帛輕貨雖有識者迫於權貴所托私裝居貢獻十分之九中國以爲高麗人假事大貪貿易而來耳宜中之行裝無一物遼東護送鎮撫徐顯索布宜中傾橐示之解所衣紵衣與之顯歎其清高以告禮部帝引見待之有加又命禮部饗於會同館序前元平章院使之上顯出語人曰僕宰相以下吾所見麗使多矣至尊禮待未有如朴宰相者遣贊成禹仁烈政堂文學僕長壽等于明告禍禪位兼奏崔瑩攻遼之罪帝曰前聞其王被囚此必其國有謀姑俟之以觀其變

恭愍薨明帝徵執政大臣入朝皆畏懼不敢行及李穡爲相曰今國家有釁非王及執政親朝無以辨之王幼不能行即自請入朝昌及國人以老病固止之穡曰臣以布衣位至極品常欲以死報之今得

死所矣設死道路以屍將命苟得達國命於天子雖死有榮遂與李崇仁金士安如明我 太宗大王爲書狀及至帝素聞穡名引見數四禮待甚厚從容語曰汝在元朝爲翰林應解漢語穡遽以漢語對穡久未入朝語頗簡澁帝笑之

辛昌元年

洪武二年

遣評理尹承順密直權近于明復請親朝禮部尙書

李源明詰之曰爾受國王之命而爲宰相爾不告王以爾爵私與於人亦無王命而私受於爾則國王其不罪之乎爾國之王受帝命承王爵今不奏請私與其子是何禮耶及還錄示帝旨曰高麗國中多事爲陪臣者忠逆混淆所爲皆非良謀君位自王氏被弑絕嗣後雖假王氏以異姓爲之亦非三韓世守之良謀童子不必赴京果有賢智陪臣在

位定君臣之分於上造安民之計於國雖數十歲不朝亦何患哉連歲來朝又何厭哉近中路開見而還先示李琳然後付都堂憲官劾近罪欲置死地我太祖伸救得免

恭讓王元年洪武二十三年遣密直趙胖等朝明表陳除去異姓復立王氏之由還奏曰禮部召臣等曰爾國有坡平君尹彝中郎將李初者來訴于帝曰李侍中立王瑤為主瑤非宗室乃姻親也瑤與李侍中謀動兵馬將犯上國宰相李穡等以為不可即將李穡曹敏修李琳邊安烈權仲和張夏李崇仁權近李種學李貴生殺害將禹玄寶禹仁烈鄭地金宗衍尹有麟洪仁桂陳乙瑞慶補李仁敏遠流其在貶宰相等潛遣我等來告天子仍請動天下兵來討乃出彝初所記穡等姓名以示之胖與

彝等對辨曰本國事大以誠安有是乎因問彝曰爾位至封君頗知我乎彝愕然失色禮部官曰天子聖明亦知其誣矣

三年洪武十四年明帝遣承徽院使康完者篤院使索羅帖木兒大卿察罕帖木兒等賈來禮部咨曰三韓之地君臣悖亂二紀于茲幸爾無爭城野之戰民安市鄉王氏苗裔君主斯民今特遣使賈表裡往勞以觀署政如何

遣使獻火者于明凡二十八人後帝聞因命有割人勢者止之

四年洪武十五年遣禮儀判書金澍賀聖節于明暹到鴨綠江聞我朝開國寄書夫人曰忠臣不事二

君烈女不更二夫吾渡江即無所容其身夫夫人有娠生男名以楊燧生女名以命德仍送朝服及靴曰以此為信夫人下世後以此合葬為我夫婦之墓以渡江上還向中朝之日為我忌日遂還入中原居于荆楚



遣評理金湊請誥命于明行至肅州即肅川聞麗朝革命不達而還

文獻備考曰高麗置別宮接宋使標曰順天館仁宗改號大明宮常

餞金使○元時以征東省為華使止宿之處名曰太平館

增補文獻備考卷之一百七十三

增補文獻備考卷之一百七十四

弘文館 纂輯 校正

交聘考四

本朝中國交聘

本朝 太祖元年明太祖洪武二十五年開國後遣中樞院使趙胖于明告即位

明帝引見詰責胖對曰臣生長中原曾見陛下於脫脫軍中明帝下榻

執手曰卿朕之交友厚待送之及還賫宣勅諭曰國更何號星馳來報

乃遣密直司事韓尙質于明以朝鮮和寧等號請上裁明帝詔曰東夷

之號惟朝鮮之稱美且其來遠矣可以本其名而仍之體天牧民永昌

後嗣

二年洪武二年使臣南在回自明明帝厚待之且命之曰爾國使臣行李往來道路費煩自今三年一朝

三年洪武二年明差內使黃永奇等賚至告祭海岳山川等神祝文有高

麗李仁任之嗣云云卽將本宗世系於李仁任不干事理具本奏聞

明帝以本國遣人至遼東賚金帛可以行禮誘邊將又遣人潛誘女真渡鴨綠江等事下手詔切責朝廷遣使上表辨明曰至若行禮於遼東是亦景仰於上國當使价往來之際有賓主交接之儀在禮則然於誘何敢其有女真隸土東寧旣皆作軍而當差安肯遣人而誘說但遼東都司起取脫歡不花之時其管下人民或有不卽隨行者由彼安土非臣勒留無所供於我邦各自守其舊業鄭道傳之辭也明帝以表辭倨傲益怒

命遼東毋納朝鮮使而已遣使諭送親男 上教靖安君曰天子若有所問非汝莫能對對曰宗社大計豈敢辭避 上出涕曰汝稟質病弱萬里之行無恙而歸乎是行朝臣皆餞之叅贊南在大言曰靖安君有此行而吾輩獨安坐死於牖下可乎自請以副价陪從與趙胖奉表從行華人見靖安君皆稱朝鮮世子甚敬之及至京敷奏詳明帝優禮遣還命復通朝聘之路時成祖文皇帝在燕藩與語大悅寵遇欵至及還或問天下大定乎靖安君曰未也我觀燕王龍鳳之姿天日之表恢廓大度非久爲藩王者也及文皇帝登極後眷遇異常數嘗語使臣曰朕嘗見爾國主眞天人也

五年洪武二年明帝覽賀正表箋怒以爲有戲侮字徵撰表人鄭道傳道

傳稱疾不往權近日撰表之事臣亦預知自請入朝叩頭曰小國事大
不因表文無以達情而臣等生於海外學不通方使我王之忠誠不能
別白於黈纁明帝待以優禮勅有司備酒饌具妓樂遊觀三日命賦詩
十八篇親製長律三篇以賜之勅仕文淵閣得與翰林學士劉三吾許
觀景清張信戴德彝相周旋每言必稱上事大之誠明帝聞而嘉之亟
稱老實秀才乃命遣還

太宗元年

明惠宗建文三年

明遣禮部主事陸顯行人司行人林士英賜大統

曆文綺等物

又遣通政寺承章謹文淵閣待詔端木禮賜誥命印章

二年

建文四年

明遣行人潘文奎賫勅賜九章冕服

漢川君趙溫回自明明帝賜文獻通考一部

互見藝文考

明成祖即位遣都御史俞士吉鴻臚寺少卿汪泰頒登極詔

三年

明成祖永樂元年

遣左政丞河崙平原君趙璞等如明賀登極崙等呈于

禮部曰天子既與天下更始則吾王之爵命印章不可仍舊禮部以聞
帝遣太監黃儼都指揮使高得賜誥命金印 上賜書褒崙等賜土田
臧獲鞍馬崙等辭 上曰卿等入奏天子以遺我子孫萬世無疆之休
用錫土田臧獲傳諸子孫卿無固辭遂賜宴于清和亭 命書各一部
明又遣黃儼賜大學衍義春秋會通真西山讀書記朱子成書各一部
及元史十八史略等書

漢川君趙溫回稱說祖訓條內云朝鮮國係是李仁任之後云云即將

李仁任祖與本國宗系各別乞賜改正等情遣使奏聞翌年禮部尚書移咨本國云奉聖旨朝鮮國王既不系李仁任之後想是在先傳說差誤准他改正

五年 永樂三年 明遣內史朴麟等賜樂器遣判承寧府事金承霖叅知議政府事李膺如明謝之

六年 永樂四年 明遣太監黃儼求銅佛 詳見學校考

七年 永樂六年 明遣內官鄭昇行人馮謹頒平定安南詔又遣太監黃儼迎取天寶山舍利仍賜綵段

遣世子提如明李天祐李茂李來等同隨行明帝賜御製詩令使臣和進又賜金銀段正書籍筆墨鞍馬等物

八年 永樂六年 具宗之回自明明帝特賜孝慈高皇后傳書五十本 互見藝文考

明以本國前後進馬三千匹遣太監黃儼賜銀幣

九年 永樂七年 明遣太監黃儼賜綵幣令更進好女子及好馬選知宜州事鄭允厚女子以進

遣僕眉壽移咨禮部乞免金銀器皿等貢尚書趙說召謂使臣曰爾國以不產金銀欲將別物代貢有違洪武舊制我不敢奏您欲奏則明日早自奏

光祿卿權永均回自明奉宣諭您再來時休打海上過只旱路上來爾那裡的使臣教他也旱路上來永均乃入京宮人權氏之兄也

十年 永樂八年 明以本國進北征馬匹遣太監田嘉禾少監海壽賜綵段銀



兩馬匹

十一年

永樂九年

移咨明禮部請差人赴燕收買藥材

明遣太監黃儼賜藥材又賜祭入京宮人呂氏父貴真

十七年

永樂五年

明遣太監黃儼少監海壽賜綵幣

譯官元閱生回自明奉旨令進的當女兒選宗簿副令黃河信知淳昌

郡事韓永疋女子同欽差黃儼等送進

十八年

永樂六年

遣同知摠制元閱生奏世子提多有失德不敢為後不

獲已使居于外第三子 忠寧大君聰明孝悌好學一國臣民悉皆屬

望請立後嗣

世宗元年

永樂七年

明遣太監黃儼光祿寺少卿韓確鴻臚寺丞劉泉備

禮錫命本國迎迓之禮亦有加焉竣事回確以帝旨落留

李之崇回自明禮部咨送欽賜為善陰隲書

互見藝文考

二年

永樂八年

明遣禮部員外郎趙亮行人易節祭 恭靖大王 上王

在樂天亭

上上謁仍迎兩使設宴使臣聘望歎曰新 殿下敬朝廷

敬老王忠孝兼全老 殿下既遣遣世事付托得人遂吟古人有錢難

買子孫賢之句 上王就使臣前謝曰今聞使臣之言不覺下淚侍宴

群臣亦皆感泣

互見禮考而作太宗二年

三年

永樂九年

明以本國進馬一萬匹以資國用遣少監海壽賜綵幣

四年

永樂十年

高奇忠自遼東還奉平定北虜阿魯台詔書以來

七年

明仁宗洪熙元年

遣使如明賀仁宗皇帝登極

增補文獻備考 卷一百七十四

八年 明宣宗宣德元年 金時遇回自明帝特賜五經四書性理大全書 互見藝文考

九年 宣德二年 明遣太監昌盛尹鳳等奉勅選取馬五千匹仍賜銀幣

十年 宣德三年 明遣太監昌盛尹鳳賜白素磁器青花盤元閱生回自明帝

賜世子六梁冠一頂

十一年 宣德四年 明遣昌盛尹鳳選火者及會做茶飯的婦女學樂的小妮

子兼求鷹狗等物

又遣內官金滿賜白磁器仍勅諭進鷹犬

遣誠寧君衲如明請免歲貢金銀器皿帝降勅二道其一金銀既非本

國所產自今貢獻但以土物效誠其二自今朝廷所遣內官及內史人

等至王國中王但以禮待之而已毋贈遺以物朝廷凡取索外國物件

惟憑御寶勅書應付若口傳朕之言語取索及非理需求者悉宜勿聽

焉王父子敬事朝廷多歷年歲逾久逾篤朕所深知者非彼左右近習

所能間也王無慮焉

十二年 宣德五年 吳陞回自明明帝降勅賜世子朝服一副

明遣內官昌盛尹鳳賚勅獎諭賜所御寶裝條環刀鈔銀幣磁器等物

仍索諸品海味及豹犬海東青白鷹

十四年 宣德七年 明遣太監昌盛尹鳳監丞張定安降勅獎諭賜綵幣仍令

選耕牛一萬隻送遼東和賣

十五年 宣德八年 明遣指揮僉事孟捏可賚勅宣諭曰朕已勅諭凡察李滿

住等各將所搶去人口馬牛頭匹盡行給還王亦須以所得建州等衛

增補文獻備考 卷一百七十四 交聘考 六

頭畜等物還之而自今各順天道輯和隣境戒飭下人勿相侵犯庶幾
共享太平之福

朴安信回自明賈奉勅諭曰覽奏欲遣子弟詣北京國學或遼東鄉學
讀書具見務善求道之心但山川修遠氣候不同子弟或不能久安客
外父子思憶之情兩不能已今賜五經四書大全一部以為教子弟之
用

十六年宣德九年明遣指揮僉事孟捏可勅諭忽刺溫野人埃還本國人口
仍勅諭本國亦還未曾還野人人口馬牛

十七年宣德十年明英宗登極遣郎中李約員外郎李儀頒登極詔仍賜綵
幣

遣南智奉奏朝明乞頒降各件書冊明帝賜資治通鑑一部詳見藝文考

二十年明英宗正統三年洪汝方回自明帝降勅賜遠遊冠服

二十三年正統六年元亡餘孽致書于本國邊將拒其使不納遣正使李邊

書狀官成三問等具由奏聞于明

二十五年正統八年遣兵曹叅判辛引孫執獻馬島擄倭于明初倭人寇上

國沿海地而又掠我濟州為邊將所破獲餘賊遁歸對馬島上遣李

藝諭島主執送島主不敢匿付藝以送遣使送獻于明明帝降勅獎諭

曰王嗣國東藩保障邊境克體爾先王敬天事大之心秉恭摠誠久而

彌篤肆朝廷加恩眷待不替益隆可謂君臣一心終是靡間者矣茲復

遣陪臣辛引孫械送擒獲犯境倭賊五十七名來獻足見王遵奉朝命

體國安民之意亦以見守邊得人而有禦暴之才朕甚嘉之特賜綵幣表裡用答王之忠誠

二十六年正統九年柳守剛回自明明帝賜冕服

三十一年正統十四年北虜也先陷遼東廣寧等處道路梗澁人皆憚行鄭

陟差聖節使獨無難色拜辭之日命世子饒慰以送途聞皇帝陷虜燕

京被圍衆懼欲遷延陟毅然不顧前進入燕朝新皇帝仍北向拜聖節

賀儀如禮

三十二年明代宗景泰元年以明帝勅送馬五千匹分十運追送在于京師

文宗元年景泰二年遣朴以昌等賀聖節于明以昌還到定州新安館拔佩

刀自殺蓋赴京使臣多齎乾糧至有致富以昌常痛陳其弊及是行適

霽霖慮中路糧盡加齎四十斗而往至是事覺拿推以昌曰既犯邦憲

何面目見 聖上與同列乎遂自決 上聞之悔悟遣官致祭特賜米

豆棺槨

端宗二年景泰五年黃致身回自明明帝降勅賜宋史一部詳見藝文考

世祖元年景泰七年明帝遣內官尹鳳金興賜誥命冕服綵段令選小火者

以進卽以上佐等九人送進

二年明英宗天順元年明遣翰林院修撰陳鑑太常寺博士高潤頒復登寶位

及復正皇太子詔且賜錦幣

四年天順三年因遼東謀者明朝得本國授建州奠董山正憲大夫中樞院

使制信帝遣刑科給事中陳嘉猷降勅切責又因使臣昌寧君曹錫文

之回賜勅書曰宣德正統年間所降勅諭欲令釋怨息兵未嘗許其往來交通除授官職且彼既授朝廷官職王又加之是與朝廷抗衡矣但事在已往朕不深咎自今以後宜謹守法度以絕私交

五年

天順四年

明帝遣禮科給事中張寧錦衛都指揮武忠勅諭令將浪卜兒哈事從實開奏及金淳回自京師帝降勅曰今得王奏殺死浪卜兒哈實情蓋因其通謀扇亂依法置罪等因具悉王之依法置罪止可行於王國不可行於隣境今乃以王國之法罪隣境之人雖欲不生邊釁其可得乎將來之患惟王可自圖之

毛隣衛野人屢搆邊釁

上命申叔舟大舉蕩平之欲具由報明而難

其人 上曰無踰尹茂松卽起復尹子雲爲吏曹叅判以遣之敷奏詳

明帝庸嘉之 上曰茂松可謂使乎

六年

天順五年

移咨明禮部乞頒洪武正韻禮部題稱奉聖旨朝鮮國遞年所進表箋章奏中間字樣別無錯訛今乞討洪武正韻一部查得印板原在南京國子監收貯卽今不曾印有見在無從給與

九年

天順八年

上幸溫陽聞明憲宗登極將遣賀使三公例爲正使時中國路梗難其人申叔舟進曰韓明澮出使具致寬年老臣請行具致寬曰叔舟首相臣在下當行 上特以黃守身爲正使奉石柱爲副使守身啓曰臣旣非文臣石柱亦武人請得一文官爲价於是以西河君任元濬爲副使卽日拜謝夕至栗峯驛夜半中使急傳 上命曰任元濬予方任使不可遠行以金禮蒙代之

十二年明憲宗成化三年以明帝命遣魚有沼等擊破建州衛遣魚世謙等獻

捷于京師到遼東三大人爲之設宴世謙揖而不跪御史云何不跪飲

世謙對曰我奉國命來朝諸大人特設宴慰我我安得跪飲御史不能

難

十三年成化四年明帝以本國討斬李滿住遣內官姜玉金輔賚勅獎諭仍

賜綵段白金紋錦西洋布又賜赴征將士魚有沼等銀幣

成宗朝權景祐以書狀官赴明譯官濫賣物貨駟路騷然其屬托之

家多聯權貴景祐一切探索以聞苟托市易者皆鞠于詔獄命超景

祐職三級

成宗三年成化八年遣成任賀正于明其弟覲以藝文館修撰拜質正官隨

行人以爲榮○燕山時李昌臣以正使赴明其子顥以檢詳拜質正官

隨行○中宗癸巳任樞以冬至正使赴明其子虎臣以說書拜質正官

隨行一代名儒贈詩以鳳將雛比之

六年成化十一年遣左議政金礪于明請追崇所生父母帝降勅曰得奏王

所生父諱先封世子早逝及所生母韓氏見在俱未有名號雖爲人後

者義不可顧私親然顯揚之義自不能已等因具悉王之孝忱茲特封

故世子諱爲朝鮮國王諡懷簡封韓氏爲懷簡王妃以遂王顯親之志

九年成化十四年奏請使尹弼商回自明帝准許每歲收買弓角五十副

十年成化十五年以明帝命遣兵助征建州衛俘虜人畜焚蕩巢穴遣魚世

謙獻俘于明京

十一年成化十年明遣內官鄭同姜玉賜白金紋錦領兵官尹弼商節度

使金嶠等銀兩紵絲賜勅曰建賊稔惡不悛朕出師征之王已發兵來

助雖前兵因江水凍解難濟不獲與我師同成厥功後兵亦抵巢攻勦

擒斬其部屬焚燬其廬舍藩峙得其所掠我邊衛人口又遣陪臣押赴

來獻王之忠誠於先世可謂能繼於朕命可謂無負矣

韓明澮回自明帝許每年收買弓角二百副

十五年成化二十年旌義縣監李暹漂風泊直隸楊州府順付回使朴健以

來

二十年明孝宗弘治二年左議政洪應啓曰本國使臣之還中朝例遣序班護

行到義州平安道困於支饋諸邑凋弊請因便達于禮部使不至義州

上曰中朝遣序班名雖為厚待實則以本國使价從行之人或狂率不

謹故欲令序班禁戢也他日使命之回可因便通于禮部

燕山六年弘治三年金永貞回自明帝降勅曰得奏累有下海人至海浪

島見島內居人多係本國州縣名籍逃移至彼生長男女誘引軍民漸

加滋蔓欲差人刷還慮有上國民人亦請勅官司搜發足見事大之誠

今不別遣使勅至王可差人前往彼處將海島逃民盡數搜刷如審係

中國之人或被搶掠漂泊等項卽差人送至遼東交割

中宗十三年明武宗正德十三年李繼孟得大明會典本國項下被誣事情以來

遣南袞李紆韓忠等具由辨誣

十四年正德十四年南袞等回自明明禮部題本曰我祖垂訓後先作述俱

有成書而其中義例或不盡同若會典一書所以詳載本朝國初以來官職制度俾文武諸司便於參考其中事關外國是非疑似之間者皆在所略况太祖姓舊諱得國改號皆出自太祖皇帝之命聖恩所授決非偶然且其不係李仁任之後又已奉有太宗文皇帝詔旨許令改正而一統志又明著王瑤昏迷太祖舊諱爲衆所推等語與今本國所奏大略相符臣等欲望皇上念其好文守禮之國鑑其爲祖辨誣之誠俯從所請降勅一道責付差來陪臣賈至本國諭以聖意則如天之仁覆冒海隅而遠人之心安矣奉聖旨是朝鮮國王之祖不係於李仁任之後我太祖文皇帝已有旨准他改正今又具奏陳情其誠孝可念還寫勅與王知道始袁等入明時皇帝移幸陝西榆林關距燕京一千

五百里袁欲退還書狀官韓忠曰吾等受命遠來而遭此變故義不可棄君命於草野遂與諸使臣日詣禮部呈文辨誣諸閣老遂奉旨准許改正仍寫勅慰諭備至令翰林學士楊廷和草勅本諭以着力構草無見笑於文獻之邦云及竣事還又遣譯官李和宗起居于行在

十八年

明世宗嘉靖二年

倭人藤原中林等共起作亂于上國寧波府殺邊將

而走被獲于本國邊將遣刑曹叅判成世昌奏聞于明仍獻俘馘被搶漢人八名帝降勅獎諭賜銀幣又賜領兵官銀幣有差

二十四年

嘉靖八年

柳溥在明京聞重纂大明會典呈文禮部乞本國宗系

從實改正尙書李時等題奉皇旨既有節奉祖宗朝明旨便備細開載送付史館采擇施行

二十六嘉靖十年年明禮部移咨令正朝進賀移于冬至

二十九嘉靖十三年年進賀使蘇世讓呈文明禮部乞罷門禁尙書夏言奉

皇旨題曰蘇世讓等欲行觀遊光瞻禮儀考質文物薰灸遷化固見仰慕上國之誠合候命下每五日一次許令該國正使及書狀官等出館於附近市衢觀遊本部仍劄付空閑通事一員陪侍出入以示禮待防衛之意

冬至使鄭士龍又呈文禮部乞依舊例勿拘五日自由出入尙書夏言奉皇旨題曰朝鮮國素秉禮義委與諸國不同况先年五日一次禁例原爲他夷而設朝鮮琉球二國不在此限合候命下行令該館提督主事於該國一行使人等聽其每日出入不必限制○又於明宗丁未

因謝恩使宋純呈文明禮部聽附近所在同書狀官及從人二三名遊觀出入

金安國送人赴京序曰余舊嘗忝承上朝時見從行者出入無禁或質禮叩疑於先覺或貨訪書籍於市肆或縱觀皇都文物之盛而以廣其見聞或薰灸中華道義之風而以資其學習益知皇朝懷綏之無間有異他邦似聞近歲以來使于上國者峻禁出入有若拘囚然與女真蠻獠獐子無異豈我國之使愆禮失檢違犯儀導而然歟或者掌故者未察歷朝恩遇之至意而偶出於一時之見歟若使是令久行而不復于舊則愚恐東國之士目昧而耳塗無復望於薰風進德霑皇化而革僻陋也

金安國嘗奉使朝明多購性理諸書又及古今表選曰我國事大表箋爲重而儒士不務學每當製述多窘故表選並購云

因使臣任樞呈文明禮部移咨本國今後進貢種馬隨冬至使行一齊赴京

慕華館前路上舊有紅箭門嘉靖十五年相臣金安老以爲迎送王人事體欠敬改立孤柱一間門扁曰延詔 中宗時明使薛廷寵謂迎有詔勅賞但名延詔似偏寫揭迎恩門未知薛額毀於何時而今則以朱之蕃所寫字揭額

三十四年

嘉靖十年

遣權機于明請將本國宗系惡名兩事詳加考核備

載首末禮部尙書嚴嵩等覆題曰列聖已悉其情皇上又許其請與之

辨白似亦相應但會典內所載祖訓之言豈敢輕議改正合無俯從所請將爾前後辨明奏呈及節奉列聖明旨送付史館及今撰修會典令其叙入朝鮮國項下祖訓會典兩無相碍傳信傳疑各有所據云

蘇世讓文曰翰林院侍講華察嘗奉使東來其後權判尹檉赴燕及還仍進侍講所獻梅燕畫簇各一軸自 上下于政院命爲歌詩記其顛末而進之蓋梅開先百花清高之樹也燕春來秋去有信之禽也願得如燕之去來以仰望我聖朝之清光也云

宋麟壽嘗以副价入明中國人稱之曰一片冰玉 同年遣李清等如明奉表陳慰時興聖蔣太后崩逝即世宗之生母也葬于湖廣皇帝隨幸 上欲遣欽問使廷議或以爲不必遣 上竟以

李清爲使遣之其還也降勅褒美且賜龍衣

三十五年嘉靖十年權檢等回自明明帝降勅曰爾國數以宗系明非李

仁任之後來奏我成祖及武宗朝具有明旨朕亦具悉矣但我高皇帝

祖訓萬世不刊會典所載他日續纂宜詳錄爾詞爾恪共藩職朕方嘉

爾忠孝可無遺慮也

仁宗元年嘉靖十一年明禮部奉皇旨以本國獲解福建下海人李王乞等

三十九人賜銀幣順付使臣等以來並賜使臣等銀兩

明宗元年嘉靖十五年明禮部奉皇旨以本國獲解福建下海人顏容等六

百十二名賜銀幣順付使臣南世健等以來並賜使臣銀兩

明禮部奉皇旨令使臣閔世良先送譯官以本國紙代席貢一二次卽

遣遼山君李夔齎紙進獻

二年嘉靖十六年順付聖節使張世豪奏聞失勅及科罪李夔等事明帝命

補賜所失勅書順付以來

舊例赴明使臣中葉以前或以武臣差送以文獻所及處言之

宗丁卯庚午成勝連爲副使中宗初同中樞趙賢範爲聖節使辛

未同中樞李允儉爲賀正使己卯兵曹叅判朴英爲聖節使乙酉清

溪君鄭允謙爲聖節使庚寅同中樞吳世翰爲賀正使甲午同中樞

李亨順爲謝恩使明宗丙午同中樞張世豪爲聖節使己酉兵使

李思曾爲聖節使此外無聞

條未詳

大臣不入此中○按魚得江文有曹潤孫再聘幽燕之句似在中宗朝而年

嘉靖間趙彥秀以聖節使赴明禮部尙書邀致私第曰人臣義無私交愛君德容越禮相見因贈以四書口訣

鄭惟善以謝恩使到北京日本使臣亦同寓於所居之館欲與我國使臣序班次及朝見朝廷不使之同日焉

八年嘉靖三年十二月捕賊倭望古三夫羅等三名順付冬至使李澤獻俘于明

明帝降勅獎諭賜銀幣絞錦仍賜獻俘陪臣及領兵官等銀幣有差

十一年嘉靖十五年獲解日本被搶漢人華重慶等三十八名順付冬至使

沈通源奏聞于明明帝降勅獎諭賜銀幣使臣及邊將亦賜銀兩紵絲

十二年嘉靖十六年遣趙士秀等以會典尙未刊布宗系改正與否未能的

知奏聞于明明禮部覆題會典雖已纂修未經頒布采擇附錄明白開

報仍候頒布之日續行昭示云

十四年嘉靖十八年獲解日本被搶漢人蘇才等三百二十二名順付冬至

使尹毅中奏聞于明明帝降勅獎諭賜銀幣使臣及邊將等亦賜銀兩

紵絲

十五年嘉靖十九年聖節使柳潛回到高嶺驛譯官姜英遇撻賊被殺

明禮部又以會典內刊印若干張付使臣以來使知改錄之意

十九年嘉靖三十三年舊例本國使臣赴北京回還經過湯站本堡差軍五六

十騎跟到江上謂之護送自設江沿臺堡兩堡相兼差軍而其數至於

二百多有饋贈之費至是都司因本國咨文行令兩堡今後勿復差軍

護送

二十二年

明穆宗隆慶元年

明帝遣翰林院檢討許國兵科給事中魏時亮頒

登極詔仍賜綵幣行到嘉山聞有國恤舍淚謂譯官曰前所未有之事
吾等適值殊為不幸仍問國王有子乎對曰世子夭歿無他嗣矣又問
首相何如人對曰李浚慶賢相也國人信之兩使曰無虞矣即使舍人
俞深托以問喪禮實題本先入都實欲偵探也及至都 上以權知國
事具世子冕服出迎于慕華館終始無違禮兩使注目歎曰這等少年
動遵禮節東方之福也行使事外以白綃團領別行吊禮自國朝以來
華使之賢以許魏為最云

許筠曰皇上立極皇長子誕生頒詔于本國用翰林科道有故則
或郎署行人吊祭亦用行人本國封王封世子則用內官內官奉
詔是大恩典中國親藩之封亦不許內官而我國獨得之云○我
國入朝宦者乞於帝前而奉詔東來因為定規本國宦者金英選
入中朝為司禮監太監有寵於憲宗不肯奉使本國曰吾安敢抗
禮於吾國王乎

又曰中國奉使于我者自倪文僖謙陳緝熙鑑董圭峰越唐紫陽
臯俱以一代名人不得入閣故翰林當使者最避之丁卯穆宗登
極當頒詔丁侍講士美范屏麓應期連為辭避時許檢討國請行
竣事而返後丁至侍郎而早歿范棲遲省署晚為南祭酒又忤當
路而去許公乙酉入閣官至少傅吏部尚書年七十而卒
李濱曰上國之使於東者必擇望崇者用示懷柔之義我國之接

伴亦必鈔選髦士爲從事凡唱酬爲文輒哀成皇華集以張大之一時操觚之類無不揚眉吐氣冀幸其執鞭而此路之斷亦百有餘年矣

時許國待李浚慶極其尊敬遂從容談論至於國家禮制風俗無不詳問請錄示浚慶即於座上操筆錄示曰崇信仁義篤好儒術禮讓成俗柔勤爲風士大夫喪葬祭禮一依朱文公家禮父母之喪率皆廬墓三年若有不勤者不齒士列其間或有啜粥終喪不食鹽菜或手自炊爨以供奠事婚娶必通媒納幣不娶同姓士大夫必立家廟四時仲朔必享忌日則子孫不食肉祭其主于寢堂六品以上祭三代七品以下祭二代庶人只祭考妣若嫡長子無子則衆子奉祀衆

子無后則妾子奉祀旁親無後者則班祔嫡妾俱無子者告官立同宗之子爲后士族婦女夫死則終身守節士大夫妻亡則三年後改娶若因父母之命或四十無子者許暮年娶每歲王親祀先農躬耕籍田以供粢盛王妃享先蠶後以率女功每歲季秋王行養老禮叅宴者皆加一級孝子順孫義婦并餉之王妃宴婦人于內殿並餉節義皆有賜物年百歲以上者歲賜米肉堂上官年滿七十者功臣父母妻堂上官妻並月致酒饌一品以上年尊德邵者春秋賜宴謂之耆英會孝友節義烈女隨其行蹟或賞物或旌門復戶清白吏見存褒獎身沒者子孫亦皆錄用戰亡人子孫亦存恤錄用宗親大臣之卒舉哀撤朝市遣官吊祭庀喪事因公在外身死者亦致賻祭宗親

雖秩卑亦賜賻祭營葬待讀官及臺諫勿論品秩高下一皆賻給遭親喪者亦如之設歸厚署備棺槨以周民間倉卒之需敗常犯賊者婦人再嫁者書名三司其子孫不齒士類五子登科之親歲賜米沒賻祭贈爵中文武科者賜恩榮宴其親存者則令所在官給酒樂而榮之名曰榮親宴沒則設祭之謂榮墳中第一者賜米直叙六品職凡民因貧乏過期不葬者婚嫁失時者皆給資財飢寒孤獨者與老而無托者亦給衣料弘文館官員更日直宿王開講筵宰相亦令輪叅又有夜對以盡群下之情官至二品年七十許致仕官至一品年七十而係國家輕重不許致仕賜教書几杖而優之堂上官實行二品以上職視其秩追贈三代士大夫及軍卒父母年七十則一子歸

養九十則諸子養每歲夏月頒冰于宗親文武堂上官年老在散者活人署病人刑獄囚人並給歷代及本國忠臣孝子烈女所行卓異者哀纂成書名曰三綱行實譯以方言廣頒中外使婦人小子無不曉解國中設成均館祀先聖又設養賢庫常養生員進士五百人屢年居館力學篤行屢舉不中年滿五十者叙職雖非生進通四書小學一經者亦陞補東西齋四方各有學校鄉士大夫子弟及凡民俊秀者年十八以上閭巷小童不得肄學者設童蒙教官訓誨州郡亦設鄉校皆倣四學成均之制觀察使巡到其邑師長儒生皆試講製課勤念以勸懲春秋釋菜觀察使守令親行之又大饗儒生成均館儒生每歲春秋議政府亦共諸館閣堂上命題製述科次置簿優等

增補文獻備考 卷一百一十四
者三人直赴文科覆試成均館陞補儒生及四學諸生每年六月定
考官逐日製述或講論通考優等者五十人許赴生員進士覆試諸
道亦然世子逐日問安視膳與師傅賓客僚屬三日講論凡每月十
五日會講必設大饗一書講畢則設宴饗又有賜物新除授官職者
參謁議政府吏曹屬曹無過十日立崇義殿以前朝王氏主之給廩
祿祭田以奉其祀前代新羅百濟高句麗王陵官禁田柴歷代始祖
及有功德及民者皆立廟降香祝令所在官春秋致祭設厲壇于北
郊漢城府官每春秋徧祀無主孤魂州郡亦如之囚人冬月則給鋪
席夏月則淨修獄中洗灑枷杻使無寒凍薰蒸之患又定醫官備藥
物給之貧不能養獄者官給廩料京外置常平倉穀貴則增價而買

布穀賤則減價而賣布以濟窮民又置別倉當春貸民以贍耕種秋
償其穀以備來歲每年以爲常如值水旱凶歉在在設賑以救之郡
縣每年春秋行鄉飲酒禮又京外小民每里立鄉長家出米布使鄉
長掌之春秋設酒供會以申其好謂之講信凡有疾病患難交相救
之若有死者備棺槨以庇之曾經三品職及臺諫侍讀官者子孫承
蔭每歲正月試才補官無蔭者之子孫擇其俊秀許三品以上保舉
吏曹更試經書隨才補闕若不稱並罪舉主科舉每於子午卯酉年
爲之設三場初場試論義二篇中場賦表終場策問會試則初場講
四書五經通者許赴中場試賦表中二篇終場策問通考取之殿試
策時務以第高下如遇大慶及王親幸學宮則有別舉王時時親行

釋奠或不時幸學宮與師儒講論或橫經問難或行大射禮親策儒
生凡中科者殿庭唱名御前賜酒賜花與優人呈戲鼓吹前導三日
遊街以榮之若幸學宮試取之即日唱榜者並賜袍笏鞍馬尤以爲
榮宗親年滿十五入宗學每日抽籤講讀以爲勸學禮曹每月考講
四學儒生所讀書京外儒生逐日所讀及其師職名簿錄藏於禮曹
每科舉後所訓儒生中及第二人或生員進士十人以上者加階祭
服一依華制每四時八節日及季夏土旺日鑽木爲火遺失小兒漢
城府本邑保受願育人處官給衣料朝鮮自平壤檀君肇國箕子受
封皆都平壤置四郡二府自是三韓派分馬韓統五十四國辰弁韓
統十二國厥後新羅高勾麗百濟鼎峙新羅之地東南至海西至智

異山北至漢水高勾麗東至海南至漢西北踰遼河百濟西南至海
東至智異山北至漢新羅滅百濟高勾麗及其衰也弓裔據鐵原稱
後高勾麗甄萱據全州稱後百濟高麗始祖統合三韓西北以鴨綠
爲限東北以先春爲界至我朝立都漢陽定爲八道中曰京畿西南
曰忠清道其西抵大海皆古馬韓之地高勾麗百濟分據其地東南
曰慶尙道其東南抵大海本辰韓之地南曰全羅道其南抵大海本
弁韓之地後爲百濟所有西曰黃海道其西抵大海古朝鮮馬韓之
地後爲高勾麗所有唐高宗滅高勾麗不能守其地新羅遂並之及
季世爲弓裔所據高麗始祖始有其地東曰江原道其東抵大海本
穢貊之地後爲高勾麗所有新羅文武王與唐將李勣攻滅之東北

日咸鏡道東抵豆滿江北接靺鞨本高麗之地忠清全羅慶尙地廣物衆州郡雄巨最爲富庶俗專詩書禮讓其中慶尙道號爲嶺南風俗之美道學之士比他道倍多平安咸鏡二道地接靺鞨俗尙弓馬兵卒精強云許國見之益加歎服

宣祖二年

隆慶三年

柳成龍以聖節使書狀官赴明將入班序班引僧道二

流序於前列成龍謂序班曰吾輩以冠裳之人不可入於僧釋之後序班言於鴻臚引却二流置後廷中動色

故事赴燕使臣於禮部有見堂禮鴻臚則無之隆慶初始重其任以文官爲鴻臚卿禮應相見而使臣只依舊例鴻臚怒貶使臣班令序於僧道雜流之下使臣不敢違三年己巳賀至使朴承任呈文禮部

反復論辨遂得立班如初後上覽中朝通報有朝鮮使臣失禮序班越祿等語命攷覈歲月盡罪前使一行○光海庚戌賀至使鄭經世至明以舊例序本國使臣於僧道之後譯官南胤咸購得大明集禮與序班爭辨禮部一依集禮位于文武班之東後遂爲例

五年

隆慶六年

明帝遣翰林院編修韓世能吏科給事中陳三謨頒登極詔

仍賜文幣又以本國解發人口賜銀兩絹段

尹斗壽曰常時詔使之來本國例有留詔節次殿下親於明使前懇留矣丁卯許魏兩使頒詔而來行到嘉山聞明廟不意薨逝卽於路上草出留詔一節以今上方在權署之中令大臣率群臣請留爲變禮也萬曆元年韓陳兩使之來本國初不詳權署時

變禮之由一以丁卯年留詔儀節為儀注送之韓陳亦不知源委因襲變禮而行之極為未安後日禮官不可不知

遣右議政朴淳如明賀登極故事外國進奏者率令由挾門入淳爭之曰陪臣出入既聞命矣若表文則奏御至尊豈宜由挾門禮部不能難許出入正門遂為定例留館日禮部問開市對曰寡君無所貿貨開市何為華人稱服

六年

明神宗萬曆元年

遣奏請使李後白尹根壽等如明乞將宗系辨誣等事

增入於續修會典明帝降勅書曰爾祖太祖舊諱久蒙不韙荷我列祖垂鑑已昭雪准許改正茲者纂修實錄欲將前後奏詞備行採錄以垂永久朕念爾係守禮之邦且事關君臣大義特允所請即令禮官抄

付史館備書于肅祖實錄內俟後修新會典以慰爾顛雪先世懇請

八年

萬曆三年

遣謝恩使洪聖民請將宗系惡名已辨誣事增入會典新書

明禮部尙書萬士和覆題俟修會典為之詳載云

十年

萬曆五年

謝恩使尹斗壽回自明賈禮部回咨云以未經御覽不得輒

付該國自宜遵照前旨及勅諭內事理安心以俟

宗系辨誣事也

遣奏請使黃琳乞詳錄會典新書等情奏聞于明禮部侍郎林士章等覆題曰該國遞年奏請蓋深避不韙之迹亟申先世之冤其忠孝至情委為切迫故我先朝特准釐正至我皇上復許其增入待書成頒到不必更憂脫漏

十三年

萬曆八年

聖節使李增回自明明禮部回咨曰本國辨誣宗系等情

既已編纂會典特爲昭雪無庸過慮祇因祖名二字之誤今復再請釐正無非謹慎詳密求遂其終始顛雪之誠也隨即挨查見纂會典或係一時傳寫訛謬致煩過慮今據來咨即備開送內閣細加查閱通爲校正更無矛盾脫漏之憂而至欲趁速頒降一節新纂會典綱目浩繁編摩累歲非朝夕可就緒者計汗青完帙進呈御覽後頒布中外

十四年萬曆九年遣奏請使金繼輝將委承恩典永雪先寃等情奏聞于明禮部尙書徐學謨覆題曰朝鮮國王專差陪臣候領會典全書無非欲亟雪其先世之寃等情備查史館于該國項下已將本王宗系及傳國被誣緣由俱各詳細開載節經奉有勅書及本部咨示該國知會如遇典成卽請依願頒賜該國不敢遲閣以虛恩命

時宗誣未雪極擇專對之才遣繼輝命自擇能文之士爲書狀質正拜辭之日解御衣賜之親執爵以餞曠世異數也

十七年萬曆十二年遣奏請使黃廷彧將順付會典成書以訖恩命等情奏聞于明明禮部尙書陳經邦等題請移文翰林院請撰勅書一道給付原差陪臣賈捧回國以慰彼君臣之望帝降勅特命史館祿示新條會典稿內載稱云云候書完進覽頒行之日差官齎送爾國先諭爾知之福建人阮喬柱漂到慶尙道蔚山郡順付冬至使尹仁涵奏聞于明朝奉聖旨送還人口候至十數名以上題請給賞

十九年萬曆十四年賀節使尹自新賀正使成壽益等在會同館失火回還後使臣以下並拿鞠定罪遣裴三益奉表陳謝

二十一年萬曆十六年遣奏請使俞泓如明乞頒示會典禮部以時未經睿覽難之泓與一行員役日詣陳情懇迫至叩頭出血涕泣固請尚書沈鯉為之感動具本題請頒示天子可之特賜本國付卷仍降勅宣諭有曰陪臣至誠懇請茲特徑賜云泓出關時主事馬維銘以詩賀之及還上下教曰賴諸卿之力今日得有此事皇恩罔極古之人君莫大於中興匡復舊物然此不過外物耳豈有如今日得雪數百年至痛使彝倫攸叙東韓再造乎予可以有辭于 祖先矣 上自和馬維銘詩一章令館閣諸臣和韻以進事載光國志慶錄遂命俞泓等一行賜宴于太平館又下 教曰禮云君賜衣服服以拜賜所以榮君恩也上年明帝賜蟒衣置之臥榻之上夙夜拱祝而惶恐不敢服今將祇見於 先王子欲服

此以觀 祖先於是服蟒衣親告由于宗廟

二十二年萬曆十七年聖節使工曹叅判尹根壽等回自明明帝頒降會典全部乃降勅書曰朕惟會典一書我祖宗舊章國家成憲藏之內府副在有司其在外藩未嘗輕示而以爾世修職貢夙秉忠誠備屏翰于東韓襲威儀于上國雪累世不明之系既遂懇祈慕昭代不刊之書仍思快觀朕視惟內服嘉與同文特賜全篇俾傳永久茲付陪臣齎回本國以慰爾惓惓陳請之至意爾其奉茲圖籍式是章程既顯被于光榮宜尊藏于秘密尚念綏懷之寵深堅翼戴之忱○翌年錄前後奏請使臣及伊時大臣為光國功臣以尹根壽為元勳

二十四年萬曆十九年通信使黃允吉等回自日本 上引見諸臣以倭情

增補文獻備考 卷一百一十四
奏聞明朝便否 上下詢于諸臣大司憲尹斗壽曰事係上國豈可隱
諱當直上聞領議政李山海曰正恐奏聞後天朝反以我通信倭國爲
罪耳兵曹判書黃廷彧如斗壽議副提學金晬等如山海言議久不決
上以大義所在不可不奏乃於賀節使金應南之行略具倭情稱以傳
聞付咨文于禮部以送應南入遼界一路譁言朝鮮導倭入犯待之頓
異到山海關關下人皆大罵曰汝國與倭同叛何故來耶從行唐陵君
洪彥純老譯解事嘉靖丁卯許閣老國來我國純彥爲隨行通事與閣
老舍人俞深最熟至是使臣憂懼使純彥裁密書抵深陳本國事情俾
達於閣老密購人先送行到通州路上望見一人坐高阜以手招之純
彥馳赴之乃俞深也深言近日福建等處皆奏汝國導倭欲犯順論議

藉藉閣老獨力保以爲曾使朝鮮知其至誠事大必不與倭叛今朝鮮
節使且至必有報變文字如無則果可疑也科道官或欲上本待汝國
使臣至請鞫問閣老云事不可知而先鞫使臣非柔遠之道以此論議
少寢特待汝國報變與否而處之矣今得書閣老亦甚喜使我先報路
中故來言訖恐傍人看覩疾馳不顧而去及到京呈咨文禮部侍郎韓
世能亦曾使我國者也以手書諭使臣云皇上覽本國咨甚喜悅爾輩
必有恩賞臨還使臣拜謝受宴於光祿寺宴罷有中官自內出以皇帝
命引一行入會極門門在皇極殿內其內有太液池外人所不敢到望
見袍帶內官三三五五調馬往來意態閒雅絕似常時所見畫圖內官
出酒饌供給令醉飽蓋異數也

增補文獻備考 卷一百七十四
遣陳奏使韓應寅于明備陳日本恐脅之狀且辨咨內流言之誣令僉知崔豈製奏文甚委曲而不能悉陳通使答問之事猶畏諱也應寅等入北京帝出皇極殿引使臣慰諭勤懇賞賚銀幣加厚降勅獎諭明帝久不御朝外國使臣親承臨問前所未有也繼遣謝恩使申點兼奏賊情

二十五年

萬曆二十年

聖節使柳夢鼎未及發程而

上去邠夢鼎只齎表

咨文不得封齎方物與譯官等隨駕至平壤大臣以爲告急使當發啓請且停節使適陳奏使韓應寅回自燕京言闕送節使則中朝必致疑也乃議復遣只齎咨表先行仍具咨遼鎮枚舉倭變節次且請援兵及內附○時申點方在會同館兵部尙書石星呼點至庭出示遼東報變文字點即號慟朝夕大臨呈文兵部請援柳夢鼎繼至哭訴兵部請救星感其意皆復帖慰諭比之申包胥

上次肅川李德馨李恒福請對爭請自往遼東乞師副提學沈忠謙以爲恒福方在本兵不可遣乃以德馨爲請援使赴遼東告急恒福送至西門解驂與之曰兵不出君當索我於重獲德馨曰兵不出吾當棄骨於盧龍聞者易容德馨至遼東六上書泣懇按察郝杰爲之改容未及上奏便宜遣祖承訓等東援

又遣奏請使知敦寧鄭崑壽請大兵來援時中朝雖遣遼東兵來援而大兵終不出又遣崑壽等 上面諭曰國之存亡在此一舉卿其勉之崑壽至明京呈奏文又詣兵部痛哭哀訴悲不自勝尙書石星亦感動

出涕力主東援之議遂發大兵來援先賜馬價銀三千兩崑壽冒暑而往冒寒而回行不留程奏請准事平壤克獲後下備忘曰今此討賊專由於明兵鄭崑壽從當重賞姑先加崇政階後又傳于吏曹曰當初請兵只告於遼東明朝泛然應之及鄭崑壽承命敷奏至誠專對今日恢復之功專在於鄭崑壽前雖加資不可以止此正一品職除授後錄扈聖元勳祖承訓既敗行在大震連遣沈喜壽尹根壽等請援於遼廣冠蓋相望兵部奉聖旨朝鮮素效恭順爲我屬國有寇豈宜坐視遼東鎮撫官卽發精兵二枝應援仍發銀二萬兩解赴彼國犒軍大紅紵絲二表裡慰賜國王

明帝遣行人司行人薛藩降勅慰諭曰爾國世守東藩素效恭順衣冠文物號稱樂土近聞倭奴猖獗大肆侵凌攻陷王城掠占平壤生民塗炭遠近騷然國王西避海濱奔越草莽念茲淪蕩朕心惻然昨傳告急聲息已勅邊臣發兵救援今差行人諭爾國王當念爾祖宗世傳基業何忍一朝輕棄急宜雪耻除凶力圖匡復更當繼諭該國文武臣民各堅報主之心大奮復讎之義朕今命文武大臣二員統率遼陽精兵十萬往助討賊與該國兵馬前後夾攻務期勦滅兇賊俾無遺類朕受天明命君主華夷方今萬國咸寧四溟安靜蠢茲小醜輒敢橫行復勅東南邊海諸鎮並宣諭琉球暹羅等國集兵十萬東征日本務令鯨鯢授首海波晏然爵賞茂典朕何愛焉夫恢復先世土宇是爲大孝急赴君父患難是爲至忠該國君臣素知禮義必能仰體朕心匡復舊物俾國

王奏凱還都固守宗廟社稷長保藩屏庶慰朕恤遠字小之意欽哉
遣正使閔濬書狀官李尙信等賀正于明以海松子畫硯筆墨數三種
充方物

二十六年萬曆二十一年遣清川君韓準將收復平壤兼賀平寧夏仍請善後
奏聞于明兵部奉皇旨許留劉綎兵五千

遣寅城府院君鄭澈于明謝收復三京

明帝遣行人司行人司憲賜銀幣降勅慰諭曰昨者王以大兵驅倭出
境還師舊國上表來謝朕心遂用嘉悅念茲復國重事不可照常報聞
特遣使降諭因賜大紅蟒衣二襲綵疋四表裏以示朕惓惓爲王遙慰
之意願朕又惟該國雖介居海山中傳祚最久昔在先朝未沾王化尙

能拓地守險雄視諸夷今爲我朝春秋貢獻憑席寵靈蓄養財力宜益
富强近者倭奴一入而王城不守原野暴骨廟社爲墟追思喪敗之因
豈盡適然之數惠徼福于爾祖及我師戰勝之威俾王之父子君臣相
保豈不幸甚第不知王新從播越之餘歸見黍離之故宮燒殘之丘墟
與素服郊迎之士女噬臍疾首何忍爲心改絃易轍何以爲計朕之視
王雖稱外藩然朝聘禮文之外無煩一兵一役今日之事正以大義發
憤哀存式微固非王之責德於朕也大兵且撤王今自專國而治之尺
寸之土朕無與焉其可更以越國救援爲常事使爾國恃之而不設備
則處堂厝火行復自及猝有他變朕何能爲王謀也是用預申告戒以
古人臥薪嘗膽之義勉之其尙及今息肩外侮再展國容之時撫瘡痍

招流散遠斥埃繕城隍厲甲兵實倉廩庶幾殷憂憤耻之後先業可興
大讎可雪此則計自今存亡治亂之幾在王不在朕戒之慎之故諭
初中原憂我國不振遂爲賊所乘論議甚多有給事中魏學堂者上
本處置我國中多醜詆之語兵部尙書石星持不可於是遣司行人
奉勅宣諭且察我國事時宋經畧應昌在遼東海平君尹根壽以伺
候陪臣在經略門下一日經略出魏給事題本示根壽且諭本國陪
臣筭付根壽回自遼東持詣朝堂時諸大臣皆有故獨原任沈守慶
領相柳成龍在座成龍却不視曰經略若公言則當移咨於主上
今無咨而獨有筭付非意料所測何可開見耶旣而明使至成龍率
百官呈文于明使歷陳本國遭變以後事狀皆由於不從倭賊犯順

之謀以致狼狽且及主上即位以來至誠憂勤勵精之實累千言
明使大感悟待之優禮而去

使臣許晉呈文于明兵部乞買弓面尙書石星題請折船銀二千兩給
付會同館開市貿易

二十七年萬曆二十二年遣陽陵君許瑄于明乞發粟賑飢遣海平君尹根壽
于明請册封世子禮部尙書范謙等覆題俟彼國寧謐果有勦亂奇勳
不妨另議優處其封典不宜輕畀

二十八年萬曆二十三年許瑄回自明奉皇旨命世子總督全慶軍務勅書有
曰將舉萬全之策永爲善後之圖俟有成功另議優處云

明朝用沈惟敬計題請册封關白遣臨淮勦衛都督僉事李宗誠僉事

楊邦亨賈持册寶金帛偕沈惟敬入釜營本國使臣黃慎朴弘長等跟往

遣清川君韓準于明謝總督軍務仍請册封世子禮部尙書范謙等覆題曰如謂册命未頒人心無所係屬則璽書即布大事業已責成國人又何疑焉事匪常經議難猝定徐竣三年有成果其賢聲益暢勞勩允著廼議請封亦爲未晚

遣清平君韓應寅于明更請亟封世子禮部尙書范謙覆題曰其若能獎率三軍枕戈待朝外捍桀黠內靖郊圻民望所歸國將焉往

二十九年萬曆二十四年明封倭正使李宗誠傳聞倭無好意夜半以微服棄印節逃去本國遣沈友勝具由奏聞中朝誠去以楊邦亨陞上使沈惟

敬充副使同本國黃慎等入日本秀吉待之極倨傲且曰若降皇女當受封朝鮮不遣王子來謝使臣且秩卑是慢我也并促令回還邦亨等不克成事而回本國遣鄭期遠具由奏聞賀至使閔汝慶回自明賈到琉球國賀復國咨

三十年萬曆三十五年倭兵蔽海復來特差應教權恢爲告急正使無副价而行兼程赴愬請兵而來後錄宣武勳以明朝許發兵糧再行救濟遣尹承勳等奉表謝恩明帝遣御史陳效監軍邢軍門差官齎到勅書曰朕念爾國近在東藩世效恭勤曩年倭奴殘破爾疆土奔播義州哀籲請援朕爲惻然特遣文武重臣帥師東征不啻救焚拯溺爾時舉國猶有固志共助天討復爾土地還爾王子

陪臣已倭奴畏遁俛首乞封朕念爾生聚未復姑從其請無非爲寧爾也胡休息數年不加訓練狡倭再入張皇奏牘請救天朝于是復有東征之役勞兵轉餉深歷險阻爲爾防援朕字小之仁恤難之義亦勤矣茲遣御史一員監軍督戰仍賜寶劔一口于軍門將士有不用命者並令先斬後奏爾君臣宜舉國努力以助王師無得自絕于天以貽後悔遣鄭崑壽奉表謝恩

三十一年

萬曆二十六年

明贊畫主事丁應泰上本構陷經理楊鎬二十罪不

遺餘力本國遣崔天健陳奏辨誣上又欲擇相臣有文辯善處事者遣之言于領相柳成龍曰左相辭病右相漸敗如之何右相李元翼言于成龍曰吾漸敗雖甚而尙可堪往但不可以文辭望於我奈何成龍啓

于上遂以元翼爲陳奏使發遣行至鴨綠水邊遇丁應泰避入林間應泰到義州始知之昏後發數三將官及軍兵追及元翼於遼界督使捲回元翼曰吾等奉國王命奏聞明朝今若中止是棄君命也爾等力可綁縛一行倒載而回則吾可有辭於國王將官知不可強遂回去元翼入明京逐日陳辨於兵部及通政司乞轉奏于上而通政司黨應泰終不納

又遣陳奏使李恒福等辨應泰誣時應泰憤我國伸下楊鎬構誣我國上奏參劾上閉閣不視朝擢拜兵曹判書李恒福爲右議政差正使兵曹參知李廷龜爲工曹參判差副使命廷龜製奏文兼程疾馳進奏於明帝又逐日陳辨於兵禮部又呈文于二十四衙門明帝覽奏遂下

詢于六部十三科道皆言應泰兇險乖謬幾誤大事朝鮮忠肝義膽令人涕涔涔欲下帝下諭快賜痛下應泰削籍爲民翌年遣申湜等奉表謝恩

明帝遣給事中徐觀瀾來勸島山功罪

三十二年萬曆二十七年遣清平君韓應寅等于明將再發兵糧終始救濟凶

賊敗遁邦域重恢等情奉表謝恩降勅獎勵仍賜綵幣復遣黃璉等奉

表謝恩

三十三年萬曆二十八年賀至使韓德遠回自明京齎來琉球國中山王尙寧

致賀咨幣

遣李時彥將義州遺下米豆勿許運回遼東以備不虞事奏聞于明朝

遣辛慶晉乞留南兵三千併給折色月銀鎮守南邊事奏聞于明明帝

命屯守重兵善後圖終遣閔夢龍等奉表謝恩

三十四年萬曆二十九年明帝賜義州遺下米豆十二萬餘石令賑飢民遣鄭

光績具奏謝恩

三十五年萬曆三十年倭差橘智正三次出來密問明兵有無情形叵測願

得水兵將一員量帶選鋒數百同本國邊將訓練兵卒使聲聞遠播等

情順付賀至使金玘奏聞于明朝翌年回自明京捧到勅諭曰以倭使

數至脅言興師奏請遣調以壯聲勢朕覽之惕然謂宜體悉但遣將一

員調兵數百以戰則寡以守則弱亦何濟之有莫如自強一改絃轍大

修耕戰逐一料理壬辰之事至今毛竦可不戒哉夫一旅中興於今爲

地補文獻備考 卷一百一十四
烈千里畏人舉世所笑王其勉之母辜朕意遣李鐵等奉表謝恩遣金
信元等請亟封世子以定國本禮部尙書馮琦等奉聖旨題云請封事
大難以輕率詳加擬議務求至當來奏

三十七年 萬曆三十二年 遣李廷龜等請儲嗣已定册命久稽亟加恩典以鎮

人心事奏聞明禮部奉聖旨題云行與國王再加繹思務爲長久之計
王大妃金氏據文武耆老宗室及散班儒生軍民等聯名狀啓具奏文
一本專差李必榮兼程奏聞于明又遣左議政李德馨戶曹判書黃慎
等賚 大妃殿奏文請亟降明旨册封承襲時遼東撫院差自在州知
州萬愛民遼東都司嚴一魁等到本國查勘一國臣民推戴實狀德馨
以爲差官將還而誣言先入則使臣繼至雖力辨無益不如先至京師

備陳實狀遂星夜兼程疾馳二十七日而至明京竣事而還光海主大
悅超其父民聖通政官判決事官其子六品優賜土田臧獲

光海二年 萬曆三十八年 鄭經世回自明齎到兵部咨除遵照節年收買焰硝
三千斤外今年准增買二倍之數以後不得援引爲例云遣鄭文孚等
奉表謝恩

本國年例進獻人蔘常用生蔘貢路遙遠未免透濕順差賀至使愈大
禎具由陳奏請代以把蔘許之

四年 萬曆四十年 明都御史楊鎬因浙江總兵楊宗業題移咨本國有全羅
慶尙四道半雜倭奴朝鮮臣民傾心相向等語備陳本國實狀順付賀
至使趙存性陳奏辨誣

六年萬曆四十二年賀節使許筠至自明時中國新遭皇太后喪纔經葬禮我
國陳慰使繼至而賀節則例賜恩宴書狀官金中清以為一宴一否雖
緣哀慶之殊情理相揜事理未安再呈文禮部而辭之禮部稱歎以為
君子理勝之文

七年萬曆四十三年對馬島主平義智屢通書契言關白源家康乞由朝鮮通
貢上國辭意叵測差朴弘耆具由奏聞捧到勅諭曰爾國以文物奧壤
武備久踈致狡寇啓疆幾于傾覆勞我師旅戍守海隅者七年糜軍餉
以萬計爾前王光復土宇再奠邦家是朕有大造于東也王以壯年繼
承先業宜亟修戰守思患預防茲倭警再傳失圖是懼朕為王計當臥
薪嘗膽簡將鍊兵深隍堅壘置堠傳烽寇至王躬擐甲胄獎率三軍滅

此朝食顧不偉歟朕業命防海將吏振旅詰戎遙為聲援王母恃中國
之寵靈玩寇啓侮則王之茅土常安而朕之藩籬永固矣王其勉之遣
海昌君尹昉等奉表謝恩

十二年萬曆四十八年移咨明禮部請加賀焰硝以備軍前之用禮部奉皇旨
許令常賀三千斤外增賀二陪

以上國有流言遣李廷龜尹暉等齎奏辨誣兼謝賜銀及加賀焰硝事
十三年明熹宗天啓元年明帝遣翰林院編修劉鴻訓禮科給事中楊道寅頒
登極詔仍賜銀綵時遼瀋相繼陷沒早路斷遣詔使由海路歸我國貢
使等將由海路入朝故遣譯官咨會山東登萊各衙門請開海路
陳慰使朴彝叙進香使柳澗書狀官鄭應斗由海路歸相繼淪沒陳慰

使康昱卒于道中惟進香使李必榮書狀官李祗先得歸

十四年

天啓二年

明朝推官孟養志齎勅書自椴島到本國廢主稱疾不見

留開城府踰年翌年反正後始入京傳勅而歸

明光宗卽位當送進賀使以海路多梗人皆規避數三改易至是遣吳允謙汎海遇颶風舟幾覆船人皆束手驚呼允謙把筆題詩晏如常度時赴明之人復命之時必載中國寶貨獻于宮中而允謙獨無私貽故廢主嫌之不許迎勅允謙至遂滯于西郊翌年三月反正後始入來

自水路朝明之後往來甚危人皆厭避聖節冬至使經年不送中宮

柳氏以諺書上疏請通使中朝不報

李暉光曰堯山堂外記曰宋時高麗使人到闕不過月徽宗欲令

觀殿試放榜遂留七十日云蓋特恩也今赴京使臣留館中朝以

四十日爲限國制則過三十日者使書狀推考其因事淹留者不

在此限萬曆辛亥余以冕服奏請留館一百四十日厥後李志完

等以誥命奏請留館又至二百日乃前所未有也

仁祖二年

天啓四年

明登萊撫院據禮部咨會遣官于椴島查勘本國事實

領議政李元翼等與宗親文武百官儒生軍民及八道按臣各具奏本

申訴廢置事狀差叅判李安訥齎往椴島准查而回

四年

天啓六年

明都督毛文龍因討索糧貨不給露奏詆順差謝恩使金尙

憲奏本陳辨

五年

天啓七年

金尙憲在北京聞本國被兵呈文兵部請援兵部題奉聖旨

令撫臣往援軍竟不出
毛文龍奏本醜詆本國使臣金尙憲等呈文該部辦理禮部奉皇旨伸
下其諭旨曰覽陪臣辨雪甚哲豈其屢世敬慕一朝背順朕永鑑爾忠
貞毋替柔懷既復命 教曰觀該部題本及皇上諭旨則我國被誣之
事非但快雪十行綸音字字丁寧奉使之臣至誠感天事甚可嘉進嘉
義階

六年 明毅宗崇禎元年 中朝以本國新被兵火不許特遣使臣順付陳奏使權
帖等頒熹宗皇帝遺詔新皇帝登極詔勅

七年 崇禎二年 山海軍門請改我國登州貢路從寧遠衛登陸
謝恩使尹安國到洋中滄死蓋以水路不便故也

以經畧袁崇煥奏本有構誣之語因賀節使李忔具奏辨明○翌年李
忔卒於玉河館

八年 崇禎三年 書狀官鄭之羽齋勅回有曰該國素嫻禮義世效忠勤所奏
事情朕自鑑悉不必陳辨

以皇都被兵遣鄭斗源奉表陳慰
遣高用厚奉表賀關內平復

本國所受中朝符驗因前後使臣滄海漂失者順付高用厚請照數補
賜

九年 崇禎四年 陳奏使鄭斗源回自明獻西洋火炮焰硝花千里鏡自鳴鍾
紫木花及諸圖書等物 上以其志在禦敵特加一資因臺啓還收

狀啓曰西洋人掌教官陸若漢來見臣願得一火砲歸獻若漢許之
並給其他書器列錄於後治曆緣起一冊天文略一冊利瑪竇天文書
一冊遠鏡書一冊千里鏡說一冊職方外記一冊西洋國風俗記一冊
西洋國貢獻神威大鏡疏一冊天文圖南北極兩幅天文廣數兩幅萬
里全圖五幅紅夷砲題本一千鏡一部窺測天文亦能於百里外觀
望敵陣中細微之物直銀三四百兩云日晷觀一坐定時刻定四方定
日月之行自鳴鐘一部每於十二時自鳴火砲一部不用火繩以火石
擊之而火自發我國鳥銃二放之間可放四五次捷疾如神焰硝花即
煮硝之醜者紫木花
即綿花之色紫云

十二年

崇禎七年

明帝遣司禮監太監盧維寧册封世子仍賜綵段維寧貪

婪攘奪罔有紀極所過鋪陳器皿房排雜物撤送船頭茶啖並令折銀
翌年謝恩使宋錫慶之回明帝以維寧所受贖行銀六千兩還付仍諭
該部咨會我國順差賀節使崔惠吉奉表謝恩

十四年

崇禎九年

賀正使金堵書狀官李晚榮等赴明舊例外國使臣無叅

賀班之規至是特命同廷臣進叅於冬至聖節正朝千秋之賀班蓋異
數也○翌年堵等在玉河館未及竣事聞本國被兵下城率一行員役
出館門外東向慟哭廷臣或請罪使臣帝以本國國小力弱不能自振
使臣奚罪特加哀憐慰諭備至下諭一路各別護送

增補文獻備考卷之一百七十四

弘文館纂輯校正

增補文獻備考卷之一百七十五

弘文館纂輯校正

交聘考

五

本朝中國交聘

二

仁祖十五年

清太宗崇德二年

始行清國年號

遣左議政崔鳴吉等陳自經兵禍國內空虛聞徵兵之命疑懼逃徙及上候未寧 仁烈王后再期迫近請還世子大君不許

禮曹啓曰常時唐差之來叅將遊擊以上則接伴差送郊外迎慰及入京後上下馬翌日宴設行都司以下只設上馬翌日宴今者清將果爲出來則其品秩之高下雖未能知之接伴官差使及設宴等事

令廟堂議處從之

十六年

崇德三年

將本國牛畜盡斃往蒙古地方貿易請給文憑差人護往

因英使言遣中官白大圭押侍女十人于清

遣豐寧君洪饗等備陳國勢凋弊難以徵兵之意乃遣李時榮柳琳等屯住邊上以待更命更遣金榮祖陳奏馬將責以師期遲誤傳諭嚴命即令退歸復遣錦陽君朴瀾口陳事情

十七年

崇德四年

以清帝西行廻還遣判書尹暉奉表起居因兵部咨遣北虞候劉纘先領砲手四百射手一百船一百十二隻偕指路清差兩人自西水羅下海進圍獐島擒叛賊慶昌河父子兄弟從人男女并十口發解賜銀褒嘉又令陞賞効力將士

中官羅葉回自瀋陽英將求桐油四百斤青花一百斤以桐油非國產乃送青花又求三碌二十斤依數送之

清帝還自寧錦遣叅議宋國澤奉表起居又遣右議政沈悅等賀戰捷悅中途病未克行時問安使尹暉還到安州未復命特命仍授尹暉奏請使代大臣更赴瀋陽竣事而還

以上候彌留議政府差都摠都事洪有量申禮部請世子歸省馬夫達吳超等來傳清國許寢馬步只徵水軍五千名具十二朔糧明年二月內會于安義海邊本國軍糧外又以明歲幣米一萬包用水軍戰船漕到三叉大小凌河之間以助軍餉

十八年

崇德五年

清禮部侍郎梧木道護鶴駕三月初七日入京四月初二

日回程
元孫回轅遣懷恩君德仁等謝之

將三色人刷出甚難及金尙憲等被誣實狀遣懷恩君德仁具其由奏聞于清

十九年崇德六年鳴江迤西有虎患咨報清兵部請行搜獵清駙馬車屹乃王子死專差禮曹正郎車達遠賫賻物咨送清禮部

二十年崇德七年清出送金尙憲等五人拘留義州令本府如法安置陪從宰臣韓亨吉等連續狀啓云龍骨大以清帝命來言漢船來到內洋而不事追捕皆報以還歸此必相通也急送剛明官查來爲此出送

翊贊崔濯又來言雖無戰船以平安四十二官之力豈無一船捕獲情迹可疑急送尊官查來爲此出送云貳師李景奭到安州逢查問使鄭致和查得宣川府使李炷客船事還瀋陽口達奉旨以爲宣川府使特

一螻蟻爾國欲免大官歸罪於微人也又招諸質命各通其家使用力譏捕又來言新降登州軍門洪承疇標下倪姓人謂昨年漢船到宣川

設宴厚待贈米五百五十斛人蔘五十斤銀子一千五百兩且付文轉奏南朝云又林慶業領舟師時佯言飄風而終不交戰云今見漢船之

載火器而終推諉不捕以此益知其言不虛也云

驛官李馨長賈到清勅日本國與明朝往來貿易私通不絕王之諸臣

何爲知而不禁王亦何爲失于稽查朕每欲保全本國似此事情知而

不問恐漸致滋蔓遣使究問復慮騷擾故令世子同固山額真英娥兒



增補文獻備考 卷一百七十五
代等至界上問明回奏

二十一年

崇德八年

清戶部郎中太平古捧到清勅曰近爾國出邊探蔘潛

與明朝買賣令僧人名獨步者往返通書遺之以銀蔘糧米奸細出入
亂行不絕明朝船至故縱不禁及朕降旨令發舟師遷延日月以誤期
限所指信地竟不到而還今將遣奸細之罪臣崔惑衆誤國之罪臣金
下之於獄其往來登州寧遠及島中貿易之高忠元申金等八人斬以
警衆外其前與明朝往來及厚遺貿易之人一切免宥自此之後有犯
前項罪名者及船至而不禁者定置於法宣讀于慕華館以方言解曉
都民

李昭漢回賈到清勅曰歲貢禮物皆出自民間民皆朕之民也故慮其
煩苦特爲量減崔金等雖罪在不赦朕亦宥釋令侍從世子義州監禁
申得淵曹漢英蔡以恒朴潢亦已赦出林慶業造亡國之罪乃不身任
其辜貽禍於弟兄族屬而竟自逃亡世豈有如此凶人然以一人之故
而戮其全宗殊覺不仁已盡原釋令歸本地又諭曰差去使臣俱以明
朝舊例所得禮物太多民頗不堪此非善政故特減其數以爲定例再
禮物在沿途驛遞餽送甚爲不便今後可餽之于王京至于沿途大小
驛站一應折席之例及侍女鷹犬盡行裁革其迎送僮接等儀如舊沿
途中火及歇宿等處彼處人役或乘機指索擾民者亦未可知當令使
臣到彼於凡食用之物斟酌減省之

幸臣崔惠吉奉使赴瀋陽聞清帝有疾預講喪儀以往既至果遭喪

增補文獻備考 卷一百七十五
以有素講故倉卒無乏事人稱季文子之深識焉

三十二年

清世祖順治元年

清波音所博氏捧清勅來傳破走李自成遣洛興

府院君金自點等賀平定北京

清攝政王多爾袞請世子及大君於闕內使龍將傳言曰嚮時未得北京不無疑阻今則大事已定彼此當誠信相孚世子以儲君不可久居於此今宜永還本國唯大君姑留與麟坪大君相替往來諸臣質子許令陪世子同還仍復諭曰今朕定中原登大位欲使恩及九州宣布寬恩將世子遣歸本國罷黜官員內李敬輿李明漢李景奭閔聖徽四員允世子請許叙用念歲幣盡屬民膏今將舊額量減其元朝冬至聖節賀儀路途遙遠三節俱准於元朝并付

在前冬至使正朝使聖節使分三行差出而各趁其日入去矣自乙酉年間以使行往來有弊合爲一行而只令趁正朝入去並致冬至聖節賀表方物而冬至聖節則雖過與不及不以爲拘至今爲例

二十三年

順治二年

清禮部侍郎藍所伊等來口宣曰前年少臺諫好生異

議致壞了國事慎勿復踵運米二十萬石須於夏初送到云時國家事力不逮以米十萬石運到寧遠而數內五千石贈攝政王

世子還自燕京

差工曹正郎尹聖舉咨報世子計于清禮部清工部尙書輿能禮部啓心郎鄔黑等來慰仍致祭世子攝政王又遣一等近侍石大里書慰吊

祭

時麟坪大君潛奉使赴燕設位朝夕哭臨翌日大官二人奉旨勸粥
又傳諭曰國王久病之餘新喪世子必哀疚添傷除朝辭速還侍奉
方物只令通事領納攝政王驢橐駝二鞍馬一

清內翰林弘文院太學士祈充格禮部郎中朱世器戶部主事谷弼馬
紅等奉清勅來言有日本國人十三漂到也春屯勅所司周其衣食但
念其父母妻子遠隔憫惻茲命隨使臣前去至日可備船還鄉仍移文
宣示俾其君臣共知朕意

二十四年順治三年遣右議政李景奭等于清以助米一萬石分作二運後
運則既已照納先運五千石則冬風不順前後敗沒員役八十病死二
十一欠米二千五百四十九石理宜補運而繼有十萬石之運倉庾如

洗悉發公私船至今未返且不幸荐飢赤地千里百計焦竭勢難措手
緣由移咨清戶部回咨准請但多發海船將遼東積粟運赴京師
又以所有兵船幾盡於上年運役此時更調力所不及見有運糧官裴
尙曾所領船二十餘隻方在蓋州地方請令以此隨便移用之意咨請
清戶部回咨特准罷免

使臣回賈到清勅有曰林慶業煽惑離間潛遣奸細私通列國及領舟
師故誤軍機推問之時卸責於王復結叛賊謀害本主自知事洩竄投
明朝朕先不發回原非姑息因平定中原施恩大赦一應罪惡槩行解
網今王欲得慶業以靖亂萌理所宜然即將慶業發與使臣解回

二十五年順治四年清戶部啓心郎秘書院學士布黨等爲例送禮物內紅

綠紬廣狹不同龍紋席比前甚狹捧到勅諭將當該官吏決杖遠配仍言凡使臣勿許假衙中江開市務要誠實貢米勿於鳳凰城而直輸北京遣麟坪大君潛等謝之

清禮部啓心郎鄔黑等捧到清勅曰前諭禮儀忽略差官違例者蓋以貨財雖細粗疎則非敬慎今後慮或復蹈前轍用以知曉特減年幣內細布色木黑角順刀胡椒等物遣永安尉洪柱元等謝之

二十六年

順治五年

清內翰林秘書院學士加一級額哈等捧到清勅曰向

日奉使官員王敬禮太過今後筵宴之時拂椅席送杯箸儀節俱不必行只對坐舉杯竟席而止又聞大定清川臨津等江三處搭橋人民勞苦義州至王京夜行火把亦屬煩勞并行停免向來使臣宿碧蹄次日

方進王京今後只在弘濟院住宿次日清晨即進王京所與使臣禮物

皆出自民間誠恐擾費先已減免今復慮仍煩百姓再行酌減定為條

例

先時使价宿碧蹄直入王京至是額使以弘濟院館宇圖材價使使營造撤太平館及仁慶宮餘存材木移構

遣右議政李

行遠等謝之行遠到義州卒令副使朴筵前進加帶軍官二員

北道大飢六鎮尤甚請貸也春餘粟以救魚噶事咨請清戶部

凡使臣越江時無銀貨搜檢之事故我國銀貨皆入彼國今後令則

義州府尹除計開外一一搜檢宋時吉將赴燕乞暇省墓疏中有有

老母語 上覽即惻然特命遞使仍教他有老親者勿差出疆使

孝宗元年

順治七年

攝政王獨本國例貿樺皮

清以築城事及引用山林六勅並來既罪領相李景奭等餘憂甚大時

麟坪大君方在 仁廟憂服而以國事危急奪衰差正使一年再赴燕京仍得無事自前凡國有危難之事輒遣麟坪彌縫且清亦以一年一入俾釋兩國之疑爲言故自壬午至丁酉十六年之間凡三赴瀋陽九赴燕京

麟坪大君之爲使臣也 上特遣中使護行其後 顯廟於宗室駙馬之行不廢其規甲寅青平尉沈益顯爲告訃使時領議政許積以國儲蕩竭刷馬有弊啓辭不送中使遂爲例

以宗室錦林君愷胤女名曰義信公主差判書元斗杓爲護行使領赴燕京

清兵部啓心郎額色黑學士賚功等捧到追尊攝政王母爲武皇后詔勅賚功回到黃州患痘死翌日入棺燒火收骨以行本國賻銀子五十兩土布五十疋綿紬十疋白綿紙六十卷油菴五番移咨禮部通計備局以護喪等事各別盡心之意而西監司及伴臣處啓請申飭吊祭令各該司舉行事定奪又啓曰吊慰祭賻之儀事係新規無可援據吊祭官當以重臣差遣而竊考舊年謄錄則往在丙申陳御史之喪名出於京中而其賻物則銀子三十兩土布五十疋白綿紙三十卷綿紬十疋連四幅厚油紙五部而目今事例似異於前合有變通加減之事請加銀子二十兩白綿紙七十卷而油菴不繫於此喪設或送之不須至於五番從之專价通計

准清戶部咨題請梨柿鋼鐵照舊到義州買辦奉旨這些微物何煩遠

買於屬國備辦勞苦百姓解運騷擾驛遞今後永行停止即將謝意咨復

三年順治九年專差司僕僉正李壽昌于清具陳金自點等獄情又咨兵部

以逆賊邊士紀等之子四名先期逃躲或向中國地方乞令邊堡嚴加

戢捕

四年順治十年以內醫院藥材近患缺料移咨清禮部許令換買仍作恒式

准清刑部咨據通官韓巨源等告古兒馬紅命鄭壽把持朝鮮擅作威福

審明具題本奉旨念素日出力應差姑免死發本主為奴仍將罪狀開

列其一義州殷山俱娶妻立家產其一庭跪郎官拴縛商人強作買賣

其一違部規食物取價其一沿路省官等處寫物求請其一干求子侄

陞職其一箭罩雨衣馬轡違禁私取其一私索馬匹即將其授職者罷革論罪所畜女人發回原情等咨復

五年順治十一年以原任議政李敬輿李景奭原任判書趙綱等自先王時

久著忠勤而為逆臣李馨長所忤與鄭命壽締結搆毀革職閑住今當

奸人屏迹沛澤屢降且舊臣繼沒特施曠蕩之典等由移咨清禮部

以歲幣水牛角弓面二百副內減一百副例貿於商舶近無南船難以

充數咨報清禮部回咨內相應折貢土產各部院需用高麗紙甚多皆

係價買今聽其免角折大好紙一千卷小好紙一千五百卷奉旨依行

因清禮部咨將好鳥槍一百桿另差曉解武臣眼同通官李夢善撥運

鳳凰城

增補文獻備考 卷一百一十五

九年順治十年因清勅遣北虜候申嚮領兵助征羅禪賊大破之禮部奉

旨賞賚戰亡及被傷將士銀有差

顯宗元年順治十年清禮部咨奉旨每年例鷹雖循舊例所糜不少跋涉

勞苦着依停止

二年順治十年時赴燕使臣適值清帝之喪禮部迫以喪服趨班書狀官

權格稱疾堅臥不起使兩使謂曰未有寡君之命職等未可以擅輒終

不聽

三年清聖祖康熙元年清太子太保兼工部尚書喇等來報平定緬甸遣領議

政鄭太和等進賀

近例赴燕使臣到山海關上副兩使駕轎以過書狀徒步至是書狀

官趙世煥詰守者曰書狀亦使臣何獨步行以失其儀乎守者不能

屈竟許乘車自是因以為例

十一年康熙九年清禮部咨赴京使臣閔鼎重下役梁廷燦私帶通鑑被捉

理當重處使臣等難免不檢之失而事在赦前免議嗣後宜嚴戒諭毋

得再犯

十二年康熙十年以上年遭前古所無之大侵今春虐癘邁輒殞斃重以兩

麥為毒霧所傷人無仰哺積屍相枕舉國坐待自盡咨報清禮部具題

崇德八年至順治八年禮物數目屢次折減理應加意敬謹反推諉灾

傷奉旨該國既將伊困苦預先說明從寬准免遣左議政鄭致和等謝

之

增補文獻備考 卷一百一十五 交聘考 十

肅宗二年

康熙十年五年

因島主平義真書契稱吳三桂輔翼先帝遺子仗節

舉兵等情咨報清禮部回咨內請勅該國差人曉諭逆順陳說利害勿

令諉為逆謀煽惑倘彼妄犯該國界題請到日迅發盛京寧古塔烏喇

等處精兵勦滅遣福善君柎等進賀謝之

曾於壬子謝使之回購得明十六朝紀內該載癸亥年事極其污穢將

冤痛情節冀許刪改事具奏順付

領議政許積啓曰辨誣使事體重大臣意以為不可兼行於年使而

右相之意亦如此故差出兩使矣左相以為事之成不成不在於使

之兼不兼而目今西路飢饉前古所無一時兩使糜費甚巨決無支

堪之勢年使除之以辨誣使兼行則似可云矣從之

三年

康熙十年六年

清禮部咨本部題使臣吳挺緯夥內慎行建帶各省地圖

為鳳城章京搜捉特遣大臣着該國王查奏慎行建供稱天下地圖自

古流傳或為屏簇帖册故欲知走路遠近帶行其摹寫紙樣可驗為我

國物等因具奏順付謝使

四年

康熙十年七年

清上駟院一等待衛馬等捧到皇后鈕祜盧氏謚勅副勅

侍衛噶等求觀東國文籍費去又求各體文大字真草等書遂差製述

官及能書人製書以贈之

詳見藝文考

瀋陽將軍盧海防踈虞欲設堡於牛庄請改使路自遼東歷十里堡

瀋陽邊城巨流河白旗堡二道并小黑山抵廣寧

九年

康熙十二年

清禮部咨奉旨歲幣米路遠驛煩應改進別項本部題貢

米有需用之處令仍進

十一年

康熙二十四年

清禮部咨奉旨鳴綠江三道溝繕畫輿圖駐防協領勒

楚等被朝鮮人放鎗致傷其犯人等若候大臣到日緝拿必致遲延先期拿獲以待審理云

清護軍統領佟寶內閣學士兼禮部侍郎丹代等捧到勅諭曰朕于東藩德澤尤厚今此遵旨前詣界內繪畫輿地山川之人爾國人潛伏險要放鳥鎗致傷特遣官前往將前項犯人與地方踈縱官嚴察擬奏其怠忽之愆亦難貫云

十二年

康熙二十五年

將犯人韓得完等二十七名擬斬地方官等論罪遣右

議政鄭載嵩等進謝

十七年

康熙三十年

清內閣學士兼禮部侍郎西安一等侍衛羅科多等以

慶興人林仁等犯越戕殺清人偷去衣蓼槍傷馬匹等事來查購捕擬律遣右議政閔黯等具奏謝之○又諭旨令進好鳥槍三千柄先將一千五百柄順付

西使求見宰相朝士中名筆因大臣抄啓定奪書贈

以綿布一種緣本邦物產鮮薄在本邦爲不贖之弊白金雖非土產而幸有賚與之寶錠願許以銀易綿等由移咨禮部回咨內各色木綿屢次減至見數而歷年已久今遽欲以銀易綿不便云

清禮部咨年貢員役張燦帶回一統志云云卽將燦究問供稱一統志只論山水詞賦中途偶買欲爲留館時消遣到柵被捉云云回啓內張

燦較前慎行建地圖事更重相應邊界充軍

清禮部又咨謝恩員役張炫帶去火砲二十五箇雖與軍器不同亦係

硝黃所做酌治罪即將張炫降二級調用

又將鳥槍一千五百柄順付年使

禮部又咨纂修一統志所載城池山河盛京與寧古塔來冊互誤發祥

之地關係甚大今所差大臣查山等將冊前往詳閱而鴨江至土門江

岸一帶俱係朝鮮驛店俱行預備埃大臣往看令知路人指去云云以

路甚險絕不通人馬之意回咨禮部題該國既稱土門江地方險阻道

路崎嶇不必由朝鮮地方前去奉旨依議

二十一年康熙三十四年清使求古今詩文及東文選蘭雪軒金誠立妻許氏崔孤雲

崔致遠字金生新羅人匪懈堂安平大君號君竹南吳峻號筆蹟使院官安慎金揚立寫

字官李壽長書字製述官洪世泰製詩以贈

二十三年康熙三十六年清散秩大臣永等捧到討平噶爾丹及太和殿竣工

臨御慶遣臨陽君桓等進賀

因歲荐飢移咨清禮部請自明春中江市米限數朔而止秋亦許賣且

於年使往來路勿禁貿穀於柵門奉旨朝鮮比年荐飢流莩相繼朕心

軫惻這中江貿穀着照所請行盛京綏哈城小姐廟現貯米六萬石運

至中江貿易又聽其來使貿去俟報歲稔照常停止水旱運令部院衙

門堂官一員前去監糶

二十四年康熙十七年清禮部咨太學士伊桑阿等欽奉上諭運至朝鮮米

三萬石着交侍郎陶岱將一萬石賞給朝鮮二萬石令其貿易戶部遵旨題請所賞米一萬石截留河南漕糧照運盛京例臣親率同差各官送到朝鮮云遣叅判趙亨期接伴○清禮部咨左侍郎稱將來米穀從山東海運至中江朝鮮亟送船至鳳凰城車島俟米到日指送中江云遣叅判申厚命接伴吏部侍郎陶岱領米到中江移揭帖別遣右議政崔錫鼎致幣慰勞仍揭謝○旋以雨暘不愆耕播以時移咨清禮部及運米二侍郎請停秋市

右議政崔錫鼎筵啓接伴使狀啓中清侍郎求能詩能書者云譯官

洪世泰

乃閩閩散而非譯官

以詩名世文官李碩及李龍徵亦善文此三人

宜令製詩律數三首而寫字官李翊臣安慎徽素稱善寫洪世泰書

法亦可自寫此人等處分付製寫下送從之

錫鼎又啓我國使臣赴燕時路費例求請於外方而使臣私自發簡及其備送之後使軍官修答而皆是白文非如踏印文書不但事體之苟艱亦無憑考防奸之道成一册子細錄各處應用之數踏印署押以爲後來使行參考之資中國則此等事有行人司掌之我國雖有承文院只管事大文書而已至於使行凡事無所主管臣意宜設行人司以禮曹堂上一員槐院提調一員爲提調郎廳亦置二三員而亦以禮曹槐院官兼帶使之專管則似爲着實而此則造次間有難猝定容俟更議而發簡求請一欸不可不爲先變通今後自備局行關諸道監司使之分付各邑依例備送則使臣成出捧上尺文踏

印以送似合事宜矣從之

二十七年康熙十年年使李光夏病故依康熙七年使臣李翊漢病故時

例請旨造材木園材紅緞一疋白布五疋給殯殮內閣撰祭文光祿寺

備祭品太常寺備香燭紙遣祠郎官讀文兵府備車輛人夫將棺送至

交界

三十年康熙十三年黃曆賈咨官渡江而彼掠於彼人鳳城將私自成約作

券俾勿傳泄譯官不敢違拒吏曹判書李頤命上疏請重究賈咨官及

譯官速令義州更通鳳將得其回通文書以來

三十七年康熙十年清禮部咨曰節該朕統御寰區撫綏萬國中外一體

而朝鮮國王慎守封畿恪循儀度四十餘年未嘗少懈撫恤國人靡不

悅服朕深為嘉美既嘗運米於賑濟貢獻又屢加裁減以至甚輕但國

小地隘其年例貢物內白金一千兩紅豹皮一百四十二張猶恐艱於

備辦嗣後着將二項永停又聞沿途館舍傾頽難以止宿歷年進貢奏

事人員甚為勞瘁着令各該地方官作速修葺堅固用副朕加惠遠人

至意

三十八年康熙十一年清烏喇總管穆克登來審定地界以朴權為定界使

詳見兵考

遣判中樞金昌集于清謝審定境界方物移准又獨豹皮犯越案免議

等四事翌年回清帝賜全唐詩古文淵鑑等書仍使進東國詩文

考

詳見藝文

三十九年

康熙五十二年

冬至正使金昌集啓曰今番書冊出送事通官輩

皆謂此實前古所未有之事節使之前當別送謝使又以為清帝今

年六十外國莫不來賀朝鮮亦不可不為之方物移准亦不待使臣

之請而許之宜有別樣陳謝之舉矣 上曰欲於節使兼為陳謝然

則似當先送謝使矣副使尹趾仁曰清帝以為不必別送謝使而所

求書冊順付來使為宜云而不言節使似是前頭立太子後當有賀

使故云爾清譯輩以書冊事大為誇張以為不可不送謝使云矣

上曰彼言既如此則冬至使前別送謝使可也

遣臨昌君焜于清進賀稱謝又謝賜書仍進東文選

詳見藝文考

四十年

康熙五十三年

遣晉平君澤于清將越海漁採船自今年夥然西北探

獵之類越境討索鹽醬至於捉去把守軍請另加鈐束等由具奏順付

四十三年

康熙五十六年

以

上候眼患專差院正李樞同內醫李時弼移咨

清禮部請質空青

清日講官翰林院侍讀學士阿克敦變儀衛治儀正兼佐領張廷枚等

捧到清帝勅曰王因眼病請質空青朕聞之深為軫念空青朕處有之

特遣官往賚凡一應禮節不必拘成例隨處可以相見傳諭遣錦平尉

朴弼成等謝之

四十六年

康熙五十九年

遠接使狀啓清使直往山陵欲行吊祭方以前例

所無防塞而終始堅執云領議政金昌集曰己丑年清使雖稱皇旨

而亦嘗援據禮經善為開諭矣今亦依此為之則彼不必終始堅執

增補文獻備考 卷一百七十五
矣左議政李健命曰己丑拜陵之請終許之今番清使若請拜陵則似難違拒矣

增補文獻備考卷之一百七十五

增補文獻備考卷之一百七十六

弘文館 纂輯 校正

交聘考 六

本朝中國交聘 三

景宗元年

康熙十年六年

清內大臣兼管鑾儀衛冠軍使世襲阿達哈哈番查

柯丹世襲一等阿達哈哈番又一拖沙喇哈番正藍旗滿洲副都統禮部右侍郎羅瞻等賈到祭文

戶曹判書閔鎮遠筵啓北使之貪婪前古所無稱以渠將皇帝無前特恩而出來憑藉求索作挈操縱罔有紀極事勢有難一一防塞參酌應副而計其所費則恰滿兩勅之需且聞今勅之貪慾比前尤甚

增補文獻備考 卷一百一十六
云徵求之弊必將有倍而去勅則雖以特恩憑藉今勅則己亥乙卯
屢經吊祭之勅既有接待之前例決不可一從其言凡干接待之事
乙卯膽錄外不可有加之意分付遠接使使彼人預知此意不得作
弊何如從之

戊戌年節使押物官金世炯至豐潤縣失銀一千一百兩至是禮部
咨原任豐潤知縣陳公錫今已賠出交與賣咨官劉再昌轉交金世
炯

二年

康熙十一年

清經筵講官內閣學士兼禮部侍郎阿克敦等捧到冊封

王世弟清勅有曰王如兆叶禎祥吉占熊夢王其再奏

遣全城君混于清謝冊封王世弟因將勅使再奏之教寔出於曲盡之
至意第念儲嗣有國之根本名號一定則廟社神人之托亶在於是假
令他日或有如聖諭中云云者豈容復有所陳奏揆諸道理更無可論
等由具咨順付勅使回便

在昔使价回還時一行員役所市物貨隨便雇車同時出來矣自己
已年間遼人胡嘉珮等十二人請設攔頭獨專雇利行留淹速唯意
所欲致有還入柵推卜人衆雜還潛相買賣之弊且或穿包竊貨諉
以見偷種種弊端逐年增加請罷攔頭依前各自雇載與使行同時
出來允爲便益緣由咨報

三年

清世宗雍正元年

遣礪山君枋于清陳慰進香

承文院啓曰今此陳慰兼進香使所賣去文書以康熙六十二年書

填矣今則新皇帝改元年號已爲騰來且勅使已迫頒詔當在於使
行未渡江之前既知改元之後仍用康熙年號或不無執頃之慮使
行文書中所填年號以雍正元年書填似爲得宜以新年號別具并
付使行以爲到彼後觀勢進呈之地何如答曰允

准清盛京禮部咨將攔頭輩爲弊滋多一向因循則將來之慮有不可
勝言以此意移咨禮部幸蒙深燭此弊題請奉旨遣官查明謹依旨內
事理發遣院正韓永禧金慶門司勇劉在昌金澤前往鳳凰城聽處分
緣由咨覆始查官等累日盤詰而胡嘉佩等一向抵賴及夫劉再昌等
四人進到以文字條陳其前後過惡及侵剝之狀事理甚明然後始乃
夾棍嘉佩則十二人合辭認罪查官言其所侵剝外國之處今既審明

以此歸奏則攔頭必罷而其人亦應得重罪也云戶部咨審事戶部侍
郎吳爾泰等疏稱將拉載朝鮮包子人胡嘉佩等自攔頭以來朝鮮國
包子只伊等拉載不令另雇車輛任意侵剝是實查律內凡外國朝貢
故意延拖騙勒遠人者問罪仍將攔頭十二人於館門首枷號三箇月
鞭一百嗣後應將嘉佩等停其拉包課銀二千兩亦停其徵取朝鮮人
貿易包子仍照從前聽從伊等任自雇載高擅腳價者該地方官嚴行
查治若不查拏以致朝鮮首告將該管官員交與該部嚴加議處其進
貢包子亦照厚定之例仍動駟站車輛拉還毋使苦累朝鮮國人奉旨
依議

以獨子奉七十偏親者外赴燕使行切勿許遞事永爲定式施行

增補文獻備考 卷一百七十六
遣密昌君穢于清告 景宗大王計

備局啓曰戶曹判書吳命恒曾在關西時本道勅需曾前一番所給多至萬數故令首譯輩竭力周旋多般往復於通官酌定其數一勅所給不滿四千兩比前太半減省支供亦從簡約接待四勅一例施行惠及窮民誠甚不貲此乃曾前最少前例今後則當以此定式故遞來時成出謄錄頒布各邑而苟或撓改則民將受弊此事都在於首譯居間周旋之如何四勅時首譯及都別將特爲論賞激勸後來勅使如或一毫撓改更爲層加則別樣論罪之意陳達於筵席矣此事關係西路利害者極非細小今後勅行一從四勅時減給謄錄施行一毫撓改則首譯拿問嚴處事定式施行何如答曰允

英祖元年三年 正清使散秩大臣覺羅舒輅翰林學士阿克敦回到平壤病死即日斂棺翌日發行專差宣傳官李馨遠移咨禮部通計賻送白綿紙五百卷綿紬三十四疋土布一百匹銀一百兩稍細麻布五十匹以管餉所儲劃出送之

二年四年 正遣西平君橈等將 仁祖大王被誣冀蒙從實記載快示昭雪事具由陳奏清禮部題請將該國王奏疏宣付明史館令纂集諸臣于朝鮮癸亥廢立之事刪除雜說確考明代方冊著爲定論以慰該國王題請之悃埃明史告成刊刻完日將朝鮮國列傳內立姓諱之事頒示該國王可也奉旨依議因清盛京禮部移咨灣尹以禮部之無皇旨而直爲移咨無前例且關後弊不敢擅受之意狀聞左議政洪致中曰

觀其狀啓措語則其所移咨事甚微瑣以此等事直爲移咨已涉駭異
非出皇旨且無前例據例不受實爲合宜矣 上曰灣尹之不爲擅受
有所狀聞誠爲得體而姑爲留置彼人於越邊云其賈來咨文據例不
受之意自備局斯速分付可也

使行舊例奏文文衡例爲製進而因李光佐

時領議政

所啓今番奏咨關

係至重下語極難以一人意思措辭命意未易曲折命曾經文衡大
臣諸臣及兩館提學製進又命宰臣趙文命宋寅明同爲製進○光
佐又啓今此使行必有呈文之事而凡撰文之道一題屢構文思易
竭使之別擇能文者文蔭中一人啓下率去何如大提學尹淳曰
其宣廟朝宗系下誣時以崔岵爲質正官有率去之事矣 上曰其言

好矣依爲之以別從事爲名可也

遣西平君橈于清陳奏討平亂逆又將逆賊餘黨之潛脫流入上國者
拿獲發回事具啓順付回咨內倘有此等罪犯潛逃者着即嚴拿解送
如有窩留藏匿定將本人從重治罪十家一併連坐事奉旨依議

因使臣陳達自今永罷赴京五處商賈以斷賒欠之路

五年

雍正七年

清禮部奉旨以朝鮮國賊黨敗露伏誅因使臣回賜該國王

粧緞等件四十四匹康熙字典性理精義詩經傳說彙纂音韻闡微等四
種書籍又以該國官員兵丁等捕賊有功頒犖銀一萬兩交與該國分
賞給以示旌賞之意

上年雖罷商賈而方物歲幣團練使押運瀋陽之際商賈輩代刷驅

增補文獻備考 卷一百一十六
冒入如前故累次呈文論辨於鳳凰城將及稅官幣物亦令自柵門
雇車輸傳于盛京禮部事永爲定式仍革團練使

齊回還上使尹淳筵啓潛商除欠之弊專由於方物歲幣人馬到藩回
還之際恣意買賣團練使差送不過江邊僉萬戶之類地微人輕不
能彈壓之故也今番則雖到柵雇載而此後使行時鳳凰城稅官或
不無防塞雇載之慮若以刷馬依前運入則其領回防奸之責不可
委於邊將輩依會寧開市以北評事檢察例平安都事以曾經侍從
兼有風力人另爲差送改其團練使之稱別立名號領率刷馬人夫與
使行同至瀋陽交付後與使行眼同點閱刻期領回則彈壓糾檢之
效斷非邊將輩差送之比而恣意潛商之弊自可防塞若然則遼鳳

商賈旣阻買賣之路車輛亦失雇載之利其勢不得不許開雇車永
爲成法從之

清禮部咨奉旨朕念該國三千餘里節使往來未免勞費嗣後凡屬陳
謝與三大節一同賚奏不必特遣使臣永著爲例

六年雍正八年羅州人金白三等漂到福建解至北京帶得天啓年月馬牌

禮部移咨令該國嚴行查明銷毀報部蓋白三等原係濟州之民假稱
羅州又以私藏古物憑作官標事照法處斬馬牌即令銷毀後咨報洛
昌君樞等賚來新修明史本記中本國列傳先時皇明祖訓大明會典
等書載我朝宗系及太祖開國事全爽其實宣祖朝遣使辨正而
猶未盡正於瑣史顯宗壬子本國使臣之赴京者見明十六朝紀載

仁祖登極事語多誣讎 肅宗丙辰遣使辨之及聞自康熙季年命熊賜履王鴻緒等修明史本記列傳雍正初又使張廷玉徐乾學等續修志表功既就緒 上曰若過此會雖悔曷追丙午命西平君橈等奏請釐正且請先頒本國列傳至是復因洛昌君樞等之行具奏力請始得准許清皇帝親御午門命禮部侍郎王圖炳以本國列傳頒賜曰皇上感國王誠孝全史刊布之前有此特頒

十年 雍正十年 遣左議政徐命均于清賈進江界犯越人金世丁等查議

狀 登年同還筵啓臣見燕中車制極其輕捷於行用故以平安監營不虞備銀貨買來一車而曾見備局文書則申飭平安監司使之多造

車子而尙不舉行故姑留本營使其取樣後上送矣

十四年 清高宗乾隆三年 清禮部咨伏查明史卷帙浩繁刊刻尙未告竣竣刊

刻完日將朝鮮列傳刷印頒示題奉旨該國王請頒發本國列傳情辭懇切朝鮮列傳既已成書着照所請先行刊刻頒給

三十五年 乾隆十四年 將本國人蔘絕種無以繼用照順治十年貿用藥材

例許令換貿等由具咨順付憲書官清禮部咨內該國所產偶有缺乏亦非常有之事卽據舊例亦止買用藥材並未請買人蔘本部未便轉

奏云

三十六年 乾隆十五年 清散秩大臣輔國將軍宗室鍾福等以大小和卓木

討平事來報

三十九年 乾隆十八年 准清禮部咨奉旨向來欽差出使朝鮮該國備輿迎

候此固屬國敬禮勅使但滿洲大臣素嫻鞍馬身膺使命四牡宣勅尤



不應乘用肩輿自圖安適嗣後欽差到境只頒預備馬匹其舊用肩輿永行停止使外國亦省繁文以示體恤等因即將禮待王人固當備儀而特軫小邦隨事體恤有此約損之命待來頭使行別申謝悃緣由咨覆

四十七年

乾隆三十六年

遣金尙喆等

時右議政

于清將去康熙丙子年間朱璘所

撰明紀輯略中掇拾明人陳建通紀論我國前後被誣事極謬悖并冀刊改等情具由陳奏禮部回咨內本部題奏查朱璘輯略於乾隆二十二年經浙江撫臣楊廷璋奏請板片書本通行銷毀陳建通紀京城內外書肆並無售者何所容其改削至該國王所稱書中誣讟二條雍正四年業經奏請昭雪蒙世宗憲皇帝宣付史館詳加釐正今恭閱欽定

明史朝鮮列傳已極詳明從前野史無稽之譚已悉剖白刪除復於乾隆三年允該國所請明史內朝鮮列傳刷印頒給若陳建通紀朱璘輯略自行查焚銷永杜疑竇等因欽奉諭旨行文直省各督撫將前項曾經禁止書籍或有銷毀未盡之處再行申禁毋許私藏通行曉諭云清散秩大臣漢軍副都統覺羅萬復內閣學士嵩貴等捧到冊封誥命勅賜綵幣兼費祭文祭幣謚號 眞宗大王 孝純王妃追封爵謚誥命禮部恭錄雍正十三年裁減饋遺使臣儀物上諭一道乾隆二十八年停止使臣肩輿上諭一道及改換新鑄清漢文篆體金印頒降移咨並頒平定金川詔勅即將前後勅諭既隆且贊聖旨之下恪遵奉行緣由咨復

領中樞李澂等使行赴燕時咨請禮部奉使之臣未能檢攝行李既被竊於奸人反受賞於官府義無所據事當固讓而冒昧帶來反損事面使臣與通事盡行革職令義州訓譯輸納鳳凰城轉達盛京禮部禮部又將本銀齎回而只是地方官賠償事異常規謹將賠銀一千兩交付弊价俾還于賠銀本衙門煩乞貴部照詳轉奏施行

八年

乾隆十九年

遣判中樞李徽之知中樞姜世晃使燕兼叅千叟宴時清

國設耆老會名曰千叟宴諭列國使臣進叅朝廷特差耆老兩臣趁期陪宴

因大司諫沈豐之所懷備局啓曰我國使行到彼之時上而有使事下而有交易而已尋訪筆談已極駭然而唱和之不足至求弁卷之

文字書札之不足至煩贈遺之來往轉相效顰去益務勝此非但大有乖於無外交之義若論末流之弊則易致生事請著爲令式添入禁條嚴飭使行一切痛斷從之

十年

乾隆十一年

遣禮曹正郎沈樂洙于清告文孝世子訃清仍派工部

侍郎蘇凌阿爲正使內閣學士瑞保爲副使馳驛前往致祭

十三年

乾隆十四年

遣判中樞府事李性源等賀清帝壽躋八旬謝使臣叅

宴

十七年

乾隆十八年

清禮部咨該國王咨稱該國使价之回還買錢貨前來

查會典內開軍民人等有帶外國人收賣違禁貨物及將一應兵器銅鐵等物賣與外國人圖利者問罪又載洋船換買錢若數目過大恐有

販銷之弊令守口官弁實力稽察如有奸商多載錢出洋者卽拿治罪名等語今國王咨請換買錢貨殊與定例不符嗣後毋得妄請

十八年

乾隆十九年

遣判中樞府事朴宗岳等賀明年乙卯清帝御極六十年之慶

二十年

清仁宗嘉慶元年

清盛京禮部咨正使沈頤之到薛劉站病故據大通

官鄭思賢呈請將靈柩并跟役人等照數出門回國將今此三節進賀事體至重有不容只令副价奉表進京謹差判中樞府事金思穆星夜

馳進事咨報清禮部

二十一年

嘉慶二年

遣判中樞府事金文淳等進歲幣清盛京禮部咨年貢

正使進門翌日身病猝重勢難冒寒驅馳不得不姑留調治除在邊守

護病症之人員外剩人員并跟隨副使書狀官前往進京俟正使病稍間派員護送趕赴京師

二十三年

嘉慶四年

清禮部咨內閣抄出奉上諭本年正月遣禮部侍郎恒

傑副都統張承勳前赴朝鮮該二員陛辭時朕面諭此次奉使非如常時該國餽送禮物不得收受乃昨恒傑等復命奏稱該國備送禮物伊二人堅却不受該國王再三懇收並將原奉高宗純皇帝准受正禮諭旨呈出閱看伊等仍不收受轉令差人賫禮物隨到鴨綠江而抵江岸時乃囑令原使帶回等語所辦殊屬拘泥不曉事體朕未知高宗純皇帝曾經降有諭旨是以令其勿受禮物今既據該國王懇陳則伊二人自可酌量收受以申其恭順之意於到京後據寔陳明方爲合理否則

一面收受一面將高宗純皇帝諭旨恭錄覽呈亦未爲不可亦或竟不
收受尙屬正辦豈有徒令彼國差人賈隨於江復又却回轉致彼國遠
道携隨煩勞已令軍機大臣將伊二人傳旨申飭並著將恒傑張承勳
交部議處緣由諭知該國

純祖元年

嘉慶六年

清使求東文選及近體科作詩賦表又要宰相名士中

善書大中小字賣去

二年

嘉慶七年

清禮部咨奉上諭該國王以冲年襲封適邪匪糾連謀爲不

靖卽董率臣工殄除魁黨寧謐國都並將辦理顛末臚章入告覽奏已
悉惟本內所稱邪黨金有山黃沁玉千禧等每因使行傳書洋人潛受
洋術等語此則非是京師向設西洋人住居之所祇因洋人素通算學

令其推測躋度在欽天監供職向不准與外人交接該洋人航海來京
咸知奉公守法百餘年從無私行傳教之事亦無被謗習教之人該國
邪黨等來京傳教一節其妄供無疑自係該國匪徒潛向他處得受邪
書轉輾流播及事發之後堅不吐實捏爲此言殊不可信惟應嚴飭本
國官民敦崇正道勿惑異端飭令沿邊大吏設遇該國匪徒潛入卽發
交該國自可辦理

十一年

嘉慶十六年

清盛京將軍衙門咨每年遣使領憲書進京向由鳳凰

城行走入內地時例有守門官吏查驗放行沿途官兵護送進京由來
已久現在查出守門官吏等收受遣來使臣饋送門規銀兩等事已叅
辦革職治罪矣此項陋規原屬違例自係使臣及隨從人等私行備送

該國必不知悉相沿已久成此陋習者受者同科勘覈立法至公著令甚嚴嗣後貴國毋許私備門規擅相饋遺云云

十九年嘉慶二十四年遣判中樞府事李魯益等賀清帝六旬聖節

二十年嘉慶二十五年清仁宗崩散秩大臣瑞齡等來告訃遣判中樞府事韓

致應等陳慰進香

二十一年清宣宗道光元年遣判中樞府事李肇源等賀清帝登極

遣判中樞府事李好敏等賀皇太后尊號嘉慶祔廟配天兼陳史誣

清禮部咨文獻通考內被誣句語請旨刊正知照云云遣判中樞府事

南履翼等謝之○將會於雍正年間明史改正旋即頒示惟此通考之

刊正前後一揆冀印頒事具由咨報

清禮部咨文獻通考刊正一編奉旨頒給知照云云

憲宗二年道光十六年遣判中樞府事權敦仁等賀清皇太后六旬加上徽

號

十年道光十四年清禮部咨奉上諭向來派往朝鮮使臣隨帶通官每至五

六員之多因思朝鮮年使往來語言熟悉通官本可酌減且恐該通官

等隨至該國或有騷擾需索等事此次册封使臣著隨帶通官一員嗣

後凡遇派往朝鮮使臣俱照此辦理該部纂入則例永遠遵行云云

十二年道光十六年江界府左中右三寨及上土鎮所管閭閻四把等地越

邊有清國人間間來接恰為四十餘處作舍結幕伐木墾田多般開諭

終不撤還移咨清盛京將軍及禮部申明前禁冀杜後弊回咨內曾經

奏派協領等官前往查拿人犯窩棚焚毀責成地方各官不時查拿務期淨盡今未幾年又有結廬墾地之事是本國人民警不畏法大千例禁必須嚴加究辦現派官嚴密搜不准容留寸椽尺土後應如何辦理經久不致再有奸民建墾之處令該委員等官悉心籌劃妥議章程以憑辨理惟思沿江一帶山廠遼濶草木叢茂雖派員搜捕恐致查勘不周必須指引查拏方期無縱無漏希即派委曉事官弁先期守候本國委員到日過江指引以便逐處查勘眼同緝拏平毀免致遺漏云云將劃即派官及時接應而至於派官之過江前來實係慎重不敢承遵緣由咨覆清盛京禮部咨據委員豐存等連次呈報於八月馳抵鑿江西岸與貴國差官等由江向上計二百餘里分路搜查拏獲正犯多名草

舍田土按照指引查明貴國委員眼同盡行平毀焚燼希將前報四十二處果否全行平毀焚燼有無遺漏之處查明見覆以憑具奏可也云云將盡行焚毀無一遺漏而猶慮其或有不周又此移咨尤可見纖悉曲盡之意緣由咨覆○又咨現派欽差大臣栢蔭明訓本會同將軍奕湘於三月初旬起程前往望即遴派職分較大明幹之員在原指查處所先期詣候一俟欽差到日過江指引眼同履勘倘別有建墾隨時呈明就便查辦希將派委何員在於何處詣候速爲見覆云云即將皇華啓程既有定期即派戶曹叅判李經在兵曹叅判李熙綱滿浦僉使許楫在鑿江去歲原查處所擬待緣由咨覆

十三年

道光二十七年

西洋船二隻來掛於古群山後洋又有從船十五隻一

增補文獻備考 卷一百七十六
併下陸結幕於沙岸問其來由則謂是大佛蘭西國人而大船爲淺礁所壞因言是伊國水師總兵官拉別耳副總兵利味厄爾與各多日諾利他官員大小共爲二十五員大清欽差大臣許送二通事奧思定李若望來投一封公文其中又有告示章程等文字即將小邦僻在東陲與西洋諸國隔以重溟書契之所不通舟車之所不至其所謂佛蘭西國云者今始聞之又照道光壬辰乙巳以暎咭喇國船事陳咨特蒙勅諭兩廣至有伊國人不復再往之語且以彼人所留文字推之槩是上國海徼交易往來承受節制之國也煩乞貴部轉達勅諭兩廣總督俾得先事開諭無有更擾事具咨順付憲書賚咨官回咨內已有旨交兩廣總督查辦知照云云

哲宗二年 清文宗咸豐元年 遣判中樞府事金景善于清下恩彥君被誣○禮部咨題請辛酉一案內府並未嘗編輯不必深懷枉屈永抱不安云云將今於伸辨之請誣案昭雪感結幽明謹擬前頭使行另伸謝悃緣由咨覆

十四年 清穆宗同治二年 遣判中樞府事尹致秀等于清陳辨并一史約編誣李尙廸等復呈文清禮部本邦國王祖先因康熙年間鄭元慶所撰約編內有訛傳八字已蒙諭旨頒下更正今職等應再呈請將所撰訛傳八字卽改王氏失政又無嗣繼八字另咨本邦國王以便鐫刻等語禮部咨云云查并一史約編訛傳八字之處業經奉旨通行曉諭茲據呈請更正相應行文該國於該國書籍內將訛傳八字卽行

更改可也

今上元年

同治三年

清禮部咨慶源地地方官遣人渡江投署備述兩國交

易官房今春被焚現欲修理因伊界木料維艱欲越圖們江界斫伐材木等語查朝鮮素稱禮義之邦從無越邊要求之事茲慶源地地方官逕具文移遽請越界伐木係爲修建交易官房起見與無故越境漁採不同公同酌議請旨飭下吉林將軍查看另擇偏僻處所酌量採取足用而止

三年

同治六年

清禮部咨法國公使照會內稱高麗國王將該處主教二人

及傳教士九人并本地習教男婦老幼盡行誅戮是以本國命將興師不日齊集朝鮮等因臣等查朝鮮與法國將有構兵之釁雖經總理衙

門排解似應行知該國使之熟思審處計出萬全云云即將弊邦自昨冬以來有凶徒匪類聚黨糾結潛圖不軌遂乃掩捕則異國人八名不知何處冒越衣冠言語與東國無別甚至奸昵婦女幻形匿跡異國人之漂到弊國者盡行護還至若無公憑潛越者一切置辟原係金石之成憲盖人臣無外交關市譏異言尤係守邦之彝典而今此法國之執言尋釁誠圖慮之所不及也弊國僻遠全昧機會而幸蒙諸大人之排難解紛教之以熟思萬全之計此格外眷佑之盛德至意也容俟前頭使行稱謝茲先備悉事由煩乞貴部深軫弊邦情實免有不虞釁端庸究終始之惠事專差司譯院前正吳慶錫咨覆

九月咨報清禮部洋人入據江華府驅劫男婦攘殺牛畜解署並入灰

地補文獻備考 卷一百七十六
燼列堡盡歸燒燬巡撫千摠梁憲洙盡力捍禦甲串富平碇留諸舶向南而去噫彼法國人之強欲尋釁涉我海洋毀我關防創殘我民人偷竊我蓄貯是豈弊邦有所失而然哉特以其溪壑無厭之慾作一海浪賊耳茲具被兵事由修咨詳陳煩乞貴部導示備禦之機略

六年

同治九年

清禮部咨奉上諭據都興阿奏稱惟鑿江西岸四百餘里與

朝鮮僅一江之隔地狹人稠擬於附近地方酌留三五十里劃清界限倘實格於形勢不能多留餘地唯有嚴禁民人不准過江等語俟朝鮮覆文到日即照所擬妥慎籌辦云云將今此展邊又出綏輯地方之深籌遠略况皇上特軫情形乃准三五十里劃清界限之議尤不勝感激第茲展邊以後上國憲令方仰更加申嚴小邦操束謹當較前密察而

崖岸陡絕之地毋庸置慮原野平遠之處愈貴稍遠俾小邦又安邊民緣由咨覆回咨內奉上諭著都興阿額勒和布恩錫查照該國王所請籌辦

七年

同治十年

將江界廢四郡與上國邊界限以衣帶原係禁地數三十年

之間漸成匪類逋逃之數多少憂慮無所不到即差四郡察邊使鄭周應前往看審矣該使臣回自該地條陳方略上土鎮陞為慈城厚州原係咸鏡道屬邑而移設於茂昌舊地邑名改以厚昌從浦等四鎮仍為革罷此次兩郡設施蓋出於固封守而嚴防汛之意敢此臚陳事咨報

清禮部

八年

同治十一年

清禮部咨總理各國事務衙門咨送美國使臣致朝鮮封

增補文獻備考 卷一百七十六
函一件由驛知照咨覆略曰書函轉遞寔出格外查照美國所投封函專爲丙寅年間該國商船二隻來到弊邦一則遭風被救一則人歿貨無莫曉其故欲得根由仍願他日該國商船如或在境遭難設法相救和睦相待等語弊邦三面濱海凡遇遭難客船給需護送美國難民之拯救護送先後三次至若人歿貨無必指丙寅秋平壤河事也伊時將情形咨覆又有米國副將費米日謂探此事來投照會明白回覆開釋無餘今此美使封函又稱一救一害莫曉其故者何也其稱體恤商民水手甚不欲別國任意欺侮凌虐云者此實四海萬國之所同然則平壤河船之自取滅沒不待辨說而可曉矣其云商辦交涉未知何事弊邦民貧貨儉工手龜劣未有一件貨物堪與交易今此美函雖未發端

既要商辦交涉則毋或爲此等事歟遭難客船照例救護毋待更確餘外事件別無商辦云云

九年

同治十年

將上國商船爲响馬賊追趕避入東江乞救卽發衛士往

救賊多墮水而死者下陸廝殺衛將重傷衛士殞命乞降明旨勦滅餘黨以爲懲奸靖邊事咨報清禮部回咨奉上諭此起賊船雖經朝鮮剿散而餘黨猶存命著都興阿檄飭沿海水師查拿奸宄剿滅餘孽可也十一年同治十四年清禮部咨准總理各國事務衙門片奏再准沈葆楨致臣等函稱據洋將日意格云日本尙有五千兵在長崎臺灣退兵後將從事高麗法美與高麗前隙未解必以兵船助之若中國能令高麗與法美立約通商則日本勢孤不敢動兵卽使日本妄動高麗力亦足支

增補文獻備考 卷一百七十六
等語法美立約通商之說從前各國屢有此意歷經臣衙門婉轉阻止今既有所聞誼應從實告之請旨飭下禮部密咨朝鮮國王豫籌辦理依議云云將小邦自夫明朝萬曆以後與日本講信修睦近三百年矣粵在同治七年該國邊臣傳來書契稱以該國官制政令多有變更方當大修隣好云云而文字稱號多違舊式東萊守臣義不敢矇矓受納以致持難然其邊民有無相資未之或廢則曷嘗有啓衅失和而五千兵從事高麗之說乃及於洋將之間乎至若法美之謂以前隙未解尤所究說不得者也蓋自八九年來洋舶之滋擾本國亦已屢矣總爲自來尋事不是本國先舉則若論前宿怨我重彼輕反欲勞衆費餉以助無名之師哉此其注意專在立約通商而向在同治十年歷陳事情由

總理衙門明白照會而又此流言以嚇誘之伏乞特降明旨曉諭日本管事人員俾勿稱兵妄動仍復洞諭法美使臣勿爲交涉紛紜緣由咨覆

十二年

清光緒元年

清禮部咨日本國使臣到京據稱欲與朝鮮修好抄錄

總理各國事務衙門原奏及往復節略飛咨云云即將弊邦近因他國船舶迭來侵擾每貽大朝之憂凡係邊政隨聞隨機肅咨通諭今又往來節略由五百里飛遞感頌曷極第今日日本使船來到江華府前洋方遣大臣會晤商辦續當詳前後顛末先行咨覆會寧完市撤還人復來稱因寧古塔副都統知會與俄夷打仗有無移咨禮部見今邊界雖幸無擾實未知俄人情形惟仰隨機軫察先事提警云云

修信使無事竣還詳探日本事情又以開港商辦理事宮本小一之船來泊通津府延接館餼于都城外公廨將與日本商辦等事略具顛末咨報清禮部

咨報清禮部竊念本邦西沿與上國毗連處以鴨綠江爲限上下數千里空曠其地或有內地人墾田造屋申咨禁斷非止一再今此沙河子築城設衙之地只隔抗葦彼此人民易致混藏不容不嚴立禁令無或踈虞云云

清禮部咨將總理衙門與日本使臣森有禮面論情形轉行朝鮮俾得知悉

十四年

光緒三年

清禮部及盛京禮部咨遵旨籌議奉省東邊外與朝鮮國

交界處所嚴立禁令以杜彼此人民私越云云

日本代理公使花房義質派來議定港口竣事發還咨報清禮部

十七年

光緒五年

專差副司直下元主咨報清禮部曰蓋聞兵可百年而不

用不可一日而無備顧惟小邦屏翰上國竭力禦侮不亦在乎兵備歟矧又邇年強隣窺覘正須戒不虞之時也曾自貴部有咨使小邦悉心籌劃計出萬全職由是耳一國輿論以爲亟宜選送明幹人員願學器械之意聞于皇上爲今急務唯猥越是懼不敢直具奏本先茲悉陳于部堂仰冀導達降旨俾小邦匠工學造津廠且簡選解事人員或於邊外習教云云禮部回咨奉上諭着李鴻章妥籌具奏

清禮部咨奉上諭茲據李鴻章奏與該使臣往復籌議學習製器練兵

着照所議咨照該國王自行的辦另片奏酌議該國員弁來學製造操
練章程四條著一併咨照該國王照議辦理原單兩件抄閱看

十八年

光緒六年

清禮部咨學習製器練兵各章程照議辦理朝鮮國朝貢
信使來往所經道路自必永遵成憲惟此次派人來學係屬破例之舉
若得徑從海道更覺便捷酌量變通暫由海道來往除來學之弁兵學
徒委員通事從人而外別人別事不得援照辦理專差吏曹叅議金允
植率領匠員前赴清北洋大臣衙門恭聽指揮具報禮部

十九年

光緒七年

咨報清禮部及北洋大臣衙門曰洋船迭伺邊陲日人近
開商埠惟上國與本邦互守海禁殊非視同內服之義亟宜於已開口
岸互相交易以分他人獨占之利亦許派使進駐京師庶可禦外侮而

固民志專差統理機務衙門主事魚允中李祖淵等前往質議云云禮
部回咨內惟商民貨物不准在各處交易現在各國既已通商自應准
其一體互相貿易應如何詳定章程着張樹聲函商李鴻章妥議具奏
此後該國貿易事宜應由總理各國事務衙門覈辦至所請遣師駐京
一節事多窒碍着不准行

專差副司直李應浚咨報清禮部曰弊邦曾無他國往來未免應接齟
齟幸有北洋大臣密咨審時度勢將與美國通好事宜指教周至而又
轉奏奉旨派遣候選道馬建忠及提督丁汝昌同美國總兵薛斐爾乘
兵船來泊仁川港以襄助兩國通好卽以經理統理機務衙門事申櫪
金宏集充差全權大副官面同美國公使薛斐爾講定修好通商條規

十四款鈐印畫押互相憑據以爲永遠金石之信先將條約册子照會文字及美國國書答國書兩國全權字據等各稿另行鈔錄庸備轉奏英國水師提督韋力士德國公使巴蘭德各乘兵艦來泊仁川馬道丁提督亦爲來會卽以經理統理機務衙門事趙寧夏金宏集充差大副官面同該公使各定修好通商條規十四款按照美約鈐印畫押謹將條約照會等各稿庸備轉奏緣由咨報清禮部及北洋大臣衙門清禮部及盛京禮部咨銘安吳大澂奏吉林與朝鮮向以土門江爲界該國民人越界墾種一摺奉上諭禁令甚嚴本應懲辦朝廷務從寬大不究既往卽着准其領照納租并由銘安吳大澂派員履勘查明戶籍分歸琿春暨敦化縣管轄所有詞訟案件均照吉林辦理并飭該地方

官隨時撫綏俾得安業該部咨照該國王嗣後嚴申禁令倘再有越界情事定當懲辦不貸云云

清署理北洋大臣咨現准出使日本國大臣電信內六月初九日朝鮮國亂黨滋事等因當經本署大臣函商總理各國事務衙門派委候選道馬建忠水師提督丁汝昌酌帶兵船駛赴朝鮮查探該亂黨膽敢聚衆圍打使館并擊王宮實屬好亂犯上亟應由朝鮮嚴拿滋事各犯究明懲辦如再拒捕玩抗肆其猖獗卽行飛報當奏明調發大兵乘輪東渡討除群醜云云

清署理北洋大臣咨蒙大皇帝軫念變出非常諭派水陸兩軍前往援護本署大臣已欽遵調集兵輪奏派廣東水師提督吳長慶統率勁旅

現已行抵貴國善後事宜與吳軍門等詳晰商達以副恤患之至意云

清北洋大臣鈔錄總理各國事務衙門覆奏及兩國商民水陸貿易章程咨會

清禮部咨朝鮮水陸通商章程業經奏准將會寧慶源勘市交易悉行停止該兩處例派通官毋庸派往鴨綠江對岸柵門與義州二處圖們江對岸琿春與會寧二處聽邊民隨時往來交易兩國於彼此開市之處設立關卡稽察匪類征收稅課

照會北洋大臣衙門及總理衙門弊邦與各國修好所有港口三處船艦往來須立旗號以便認識茲製國旗一面圖繪形色以備查照

清北洋大臣咨貴國與東西洋各國通商換約在前交涉機宜必須得人導助既經貴國王商請代聘賢明練達之士前駐津德國署領事官穆麟德代為延聘前往襄助關務須有華員伴往聯絡商辦候選中書馬建常亦令前往

二十年^{光緒八年}清禮部咨二品銜陳樹棠派充摠辦朝鮮商務委員照料華商聯絡聲氣

二十一年^{光緒九年}移咨清禮部現在海禁既開商民互往宜照原定章程派員前往駐紮天津照料朝鮮商民工曹叅判南廷哲充大員之任茲以派送

移咨清北洋大臣現今親軍數營新募練教仍設機器諸廠留心製造

第其鋪置規矩以天津東南兩局視爲準則特派本局幫辦下元圭前往津廠幸知照東南局摠辦因其所言酌量指劃回咨造銅帽修槍機等所需代爲購所募諸工匠俟下次派去
專差典園局幫辦李應浚于清槩報曰逆臣金玉均等勾結日本謀爲不軌政府因臣民齊憤請提督吳兆有營務處袁世凱摠兵張光前率兵入護日兵及亂徒均今逃竄伏蒙特派會辦北洋大臣吳大澂辦理奉天海防大臣續昌乘輪飛渡先日兵而至日使井上馨亦至不敢輕動兵端言歸于好謹將續約七條抄呈御覽至陣亡戰士十一人擬附入故提督吳長慶祠春秋派員致祭


二十二年光緒十年將土們江境界宜一查勘望煩轉奏派員踏勘事咨清

禮部

清禮部咨迅派妥員知會吉林地方官定期會疆界妥商辦理命安邊府使李重夏等會同吉林派員秦瑛等到分水嶺立碑處查勘將土門勘界圖並抄錄可考文件備文照會

清北洋大臣咨筭委美國人墨賢理前往朝鮮由統署委令接辦朝鮮各海關徵稅事宜所有各該關帳目案件應令前往朝鮮摠稅務司穆麟德交卸清楚俟交代事畢應仍飭穆麟德回津

咨清禮部及北洋大臣去冬亂民尙在日本撤防以後訛言愈滋小民無知驚動不安仰懇派兵鎮撫以防意外之患回咨奉上諭該國王以伏莽未除請派兵防患著李鴻章察酌情形隨時調撥水陸軍飛輪徑



增補文獻備考 卷一百一十六
渡扼紮防衛

清北洋大臣咨飭由中國電報局代辦朝鮮陸路電綫並派陳允頤勘路繪圖余昌守開工設線仍飭陳允頤於勘路事竣卽駐紮漢城坐辦朝鮮電報總局仁川分局派晏錫琦平壤派徐以修義州談震臨辦理將新稅章程中紅蔘之百抽十五偏重之患咨會清禮部及總理衙門回咨賈奏咨官由陸路來京行李物貨與年使一體免稅紅蔘稅減爲值百抽十

清北洋大臣咨查吉林寧古塔與朝鮮咸鏡道以圖們江爲界載在欽定會典圖皇明三通及一統輿圖證據確鑿近年朝鮮流民越界占墾屢議刷還安插申明疆界因該國安邊府使誤以豆滿圖們爲兩江必將勘明界限彼此轄屬較然明白而後可議刷還安插卽於開春兩國官員定期會晤云云將圖們豆滿爲一江轉音則疆界略已大定無煩覆勘惟該處水源有數處紅丹西豆兩水其源不出於分水嶺紅土山水一派出於分水嶺伏流四十里而爲豆滿江源與碑堆相符捨是而無可擬之處前勘繪圖一見可定惟疆圉大事在所慎重當經飭知政府諸臣一遵來咨辦理緣由咨覆

二十四年

光緒十二年

遣辦理大臣閔泳駿駐紮日本緣由咨會清禮部回

咨云中國已允朝鮮與各國通商必須先行請示俟允准派使後再赴各國方合體制茲朝鮮遣使日本裝束離發始行具咨請奏先派後咨未合體制來咨未便存案云云

專差禮賓寺主簿尹奎燮赴清陳下略曰准北洋大臣電開奉旨朝鮮派使西國必須先行請示俟允准後再往方合體制竊念外交一事特蒙眷念維持允與美國首先通好派員襄辦妥訂條約聲明朝鮮爲中國屬邦而內治外交均得自主等語使恪守侯度而在各國平行相待體制交涉務歸兩全嗣後各國續定和約皆以美約爲本美國於換約之後派全權大臣來駐都城小邦曾遣使報聘至各國則并與報聘而未違各國使臣屢請遣使互駐現派全權大臣擬往美英德意俄法諸國報聘駐紮理合據實奏明祈蒙恩准以完使事

清北洋大臣咨朝鮮係中國屬邦向來兩國官員往來文蹟皆有體制貴國王前與泰西等國議立通商條約均備照會聲明係中國屬邦分

內一切應行各節與他國毫無干涉等因今貴國派員赴日本駐紮並擬派員赴泰西各國通好惟查泰西及日本各國中國均派欽差大臣駐紮彼此往來文牘循照舊章與朝鮮立約時照會本旨勿相違背

二十五年

光緒十五年

清文華殿大學士李鴻章札飭袁世凱曰會勘朝鮮

吉林圖們江界案查明石乙水入紅土山匯流處爲大圖們江由小白山測量鴨綠江上源相距四十二里與西爲鴨綠東爲土們二語一一照合擬於此處酌定界址並設界碑

駐美公使朴定陽電稟探查物情有意斥退國書云云督辦趙秉式密商於清總理袁世凱轉聞中國出使大臣張蔭桓駁辨諸條請召還該公使詰明

派別遣官崔錫榮前往天津烟台上海等處購買織造機器

三十年光緒二十年派李冕相為大員駐紮天津

三十一年光緒二十一年全羅道東學教匪猖獗城邑失守請援清國清國提

督葉志超統領聶士成等率兵前來以統理交涉衙門協辦李重夏差

迎接官迎接于牙山白石浦

六月與清國改正約條復派送特命全權公使于列國

光武三年十一月清國議約全權大臣徐壽朋來以外部大臣朴齊純

為議約全權大臣議訂條約批准互換徐壽朋為欽差大臣仍駐

四年清國公館參贊許台身為代理公使仍駐五年陞出使大臣

六年二月以朴齊純為全權公使駐劄清國

八年二月以閔泳喆為全權公使駐劄清國

附韓清通商條約

光武三年十一月派全權大臣外部大臣朴齊純與清國全權

大臣太僕寺卿徐壽朋訂立通商約款

第一款 嗣後大韓國大清國永遠和好兩國商民人等彼此僑居皆

全獲保護優待利益若他國遇有不公輕藐之事一經照知均須相助

從中善為調處以示友誼關切

第二款 自此次訂立通商和好之約後兩國可交派秉權大臣駐劄

彼此都城並於通商口岸設立領事等官均可聽便此等官員與本地

方官交涉往來俱用品級相當之禮兩國秉權大臣與領事等官享獲

地補文獻備考 卷一百七十六
種種恩施與彼此相待最優之國官員無異領事官必須奉到駐劄之國批准文憑方可視事使署人員往來及專差送文等事均不得留難阻滯惟所派領事等官必須真正官員不得以商人兼充亦不得兼作貿易倘各口未設領事官或請別國領事兼代亦不得以商人兼充若兩國所派領事官辦事不合可知照駐京公使撤回更換

第三款 韓國商民並其商船前往中國通商口岸貿易凡應完進出口貨稅船鈔並一切各費悉照中國海關章程與徵收相待最優之國商民稅鈔相同中國商民並其商船前往韓國通商口岸貿易應完進出口貨稅船鈔並一切各費亦悉照韓國海關章程與徵收相待最優之國商民稅鈔相同凡兩國已開口岸均准彼此商民前往貿易其一

切章程稅則悉照相待最優之國訂定章程稅則相同

第四款 一韓國商民前往中國通商口岸在所定租界內賃房居住或租地起蓋棧房任其自便所有土產以及製造之物與不違禁之貨應許售賣中國商民前往韓國通商口岸在所定租界內賃房居住或租地起蓋棧房任其自便所有土產以及製造之物與不違禁之貨均許售賣在彼此通商口岸租地蓋房修建墳塋及交完地租地稅等事均應遵守該租界章程及紳董公司章程辦理不得違越 二兩國通商口岸除各外國公同租界外如有一外國專管之租界則租地賃房等事一遵該租界章程不得違越 三在韓國通商口岸所定租界外准外國人永租或暫租地段賃購房屋之處中國商民亦應享獲一切

利益惟租住此項地段之人於居住納稅各事應行一律遵守韓國自定地方稅課章程在中國通商口岸所定租界外准外國人永租或暫租地段賃購房屋之處韓國商民亦應享獲一切利益惟租住此項地段之人於居住納稅各事應行遵守中國自定地方稅課章程 四兩國商民在兩國口岸通商界限外不得租地賃房開棧違者將地段房棧入官按原價加倍施罰 五凡在各口租地時均不得稍有勒逼其出租之地仍歸各本國版圖 六兩國商民由貨物所在之國內此通商口岸輸運彼通商口岸一遵相待最優之國民人所納之稅鈔及章程禁例

第五款 一中國民人在韓國者如有犯法之事中國領事官按照中國律例審辦韓國國民人在中國者如有犯法之事韓國領事官按照韓國律例審辦韓國國民人性命財產在中國者被中國民人損傷中國官按照中國律例審辦中國民人性命財產在韓國者被韓國民人損傷韓國官按照韓國律例審辦兩國民人如有涉訟該案應由被告所屬之國官員按照本國律例審斷原告所屬之國可以派員聽審承審官當以禮相待聽審官如欲傳詢證見亦聽其便如以承審官所斷為不公猶許詳細駁辦 二兩國民人或有犯本國律禁私逃在彼國商民行棧及船上者由地方官一面知照領事官一面派差協同設法拘拿聽憑本國官懲辦不得隱匿袒庇 三兩國民人或有犯本國律禁私逃在彼國地方者一經此國官員知照應即查明交出押歸本國懲辦

不得隱匿袒庇 四日後兩國政府整頓改變律例及審案辦法視以爲現在難服之處俱已革除即可將兩國官員在彼國審理已國民人之權收回

第六款 中國向不准將米穀運出外洋韓國雖無此禁如或因事恐致境內缺食暫禁米糧出口經地方官照知後自應由中國官轉飭在各口貿易商民一體遵辦

第七款 倘有兩國商民欺罔街賣貸借不償等事兩國官吏嚴拿該通商民令追辦債欠但兩國政府不能代償

第八款 中國民人准領護照前往韓國內地遊歷通商但不准坐肆賣買違者將所有貨物入官按原價加倍施罰韓國民人亦准請領執

照前往中國內地遊歷通商照相待最優之國民人遊歷章程一律辦理

第九款 一凡兵器各項軍物如大小礮子開花彈子各種火槍裝槍藥筒附槍刀刺佩帶腰刀等札槍硝火藥棉花藥烈火藥及他轟烈各藥等應由兩國官員自行採辦或商人領有進口之國官員准買明文方許進口如有私販運售者查拿入官按原價加倍施罰 二鴉片在韓國係禁運之物中國人如有將洋藥土藥運進韓國地方者查拿入官按原價加倍施罰 三紅蔘一項韓國舊禁出口中國人如有潛買及出口未經政府特允者均查拿入官仍分別懲罰

第十款 兩國船隻在彼此附近海面如遇颶風或缺糧食煤水應許



其收進口內避風購糧修理船隻所有經費均由船主自備地方官民應加援助供其所需如該船在不通商口岸及禁往處所私行貿易不論已行未行由地方官及附近海關官員拿獲船隻貨物入官違犯之人按原價加倍施罰如兩國船隻在彼此海岸破壞地方官一經聞知即應飭令將水手先行救護供其糧食一面設法保護船隻貨物并行知照領事官俾將水手送回本國并將船貨撈起一切費用或由船主或由本國官認還

第十一欸 凡兩國官員商民在彼此通商地方居住均可雇請各色人等勤執分內工藝


第十二欸 兩國陸路交界處所邊民向來互市此次應於定約後重訂陸路通商章程稅則邊民已經越墾者聽其安業俾保性命財產以後如有潛越邊界者彼此均應禁止以免滋生事端至開市應在何處俟議章時會同商定

第十三欸 兩國師船無論是否通商口岸彼此均許駛往船上不准私帶貨物惟有時買取船上食用各物均准免稅其船上水手人等准聽隨時登岸但非請領護照不准前往內地如有因事將船上所用雜物轉售則由買客將應完稅項補交

第十四欸 此次所立條約俟兩國御筆批准至遲以一年為期在韓國都城互換然後將此約各款彼此通諭本國官商俾得咸知遵守

第十五欸 韓中兩國本屬同文此次立約及日後公牘往來自應均

用華文以歸簡易



增補文獻備考卷之一百七十六

明治四十四年八月

